

**EIGHTH LEGISLATIVE ASSEMBLY OF MIZORAM
(THIRD SESSION)**

LIST OF BUSINESS

FOR TENTH SITTING ON TUESDAY, THE 25th JUNE, 2019
(Time 10:30 A.M. to 1:00 P.M. and 2:00 P.M. to 4:00 P.M.)

OBITUARY

1. **Pu ZORAMTHANGA**, Hon'ble Chief Minister to make obituary references on the demise of the following dignitaries :
 - i) **Pu LALRINCHHANA**, Ex. Minister and former Member of Mizoram Legislative Assembly.
 - ii) **Pu P.B. ROSANGA**, Ex. Minister and former Member of Mizoram Legislative Assembly.

QUESTIONS

2. **Questions** entered in separate list to be asked and oral answers given.

LAYING OF PAPERS

3. **Pu ZORAMTHANGA**, Hon'ble Chief Minister to lay on the Table of the House a copy of each of the following :
 - i) The Government of Mizoram (Transaction of Business) 3rd Amendment Rules, 2019.
 - ii) The Government of Mizoram (Allocation of Business) Rules, 2019.

FINANCIAL BUSINESS

DISCUSSION AND VOTING ON DEMANDS

4. **Pu R. LALZIRLIANA**, Minister to submit to the vote of the House various Demands under his charge.
5. **Pu LALRUATKIMA**, Minister to submit to the vote of the House various Demands under his charge.

S.R. ZOKHUMA
Commissioner & Secretary

....

SPEAKER : Thudik chu lei la, hralh leh tawh suh. A ni, finna te, zirtirna te hriatthiamna te nen. Thufingte 23:23

Vawiinah hian kan hotu kal hmasa te sunna hun kan hmang ang a. Kan sun tur te hi Pu Lalrinchhana, Minister lo ni tawh te, Pu P.B. Rosanga, Minister lo ni tawh te an ni a. Tunah kan House Leader Pu Zoramthanga anmahni sunna hun hmang turin kan sawm e.

PU ZORAMTHANGA, CHIEF MINISTER : Pu Speaker, ka lawm e. Vawiinah kan hotu hmasa leh kan MLA, kan Minister lo ni tawh tun hnaia min kalsan ta te sunna hun hman a ngai thut mai a, a pawl kan ti em em a. An chanchin te hi sawi tur sei tak kan nei a, thiante pawhin an sawi duh ang a, a bul tan nan tawi fel deuhin keiin ka sawi ang a. Pakhatna ah chuan Pu Lalrinchhana hi Minister hlui a ni a, June ni 18, 2019 Thawhlelni tlai lam dar 6:15-ah khan cancer natna avangin NEIGRIHMS Hospital, Shillong ah kum 85 mi niin a boral a. Amah hi Pu Lalrawna leh Pi Lalzikpuii te fa a ni a, kum 1935-ah khan N.Serzawl kuaah a lo piang a. An unau hi mipa pasarih leh hmeichhia panga an ni.

Pu Lalrinchhana hi Pi V.L.Lily Chamdeli nen inneiin fapa pali leh fanu pakhat an nei a. Tu 13 leh tuchhuan 3 an nei mek a ni. Zirna lamah chuan matric hi kum 1955-ah Govt. High School, Aizawl atangin a pass a, JD College, Jorhat-ah Intermediate of Science a zir chhonzawm a, mahse a pa thih avangin kum 1960-ah a zirlai a bansan a. Khawruhlian-ah Middle High School Headmasterin a thawk a, chuta tang chuan PUC hi a zo ta a. Pu Lalrinchhana hi ram leh hnam vei mi a ni a, Khawruhlian Middle Schoola Headmaster a thawh lai chu kalsanin October 1966 atangin under-ground a zawm a, hei hi record sual a niang. October 1966 thla hmalamah hian kan hotu pawimawhah hian a awm tawh a ni, rambuai tan tirh atangin a ni. Underground chhung zawng hian nihna pawimawh tak tak Commissioner te, Deputy Commissioner te, Defence Minister te, Supply Minister nihna te a chelh a. Kum 1986-a inremna a awm thlengin Council of Minister-ah hian a awm a ni. Rambuai fel hnua Mizorama lo haw hnuin kum 1987-ah Mizoram inthlan vawi khatnaah MNF ticket-in Ratu bialah thlan tlin nghal a ni a. Cabinet Minister niin Health & Family Welfare Department a enkawl a, kum 1989 leh 1993-ah Ratu Constituency atang bawkin MNF ticket-in MLA-ah thlan tlin leh a ni a. Opposition nihna term a hmang zo ve ve a, kum 1988-ah Aizawl West-II

Constituency atangin MNF ticket-in MLA-ah thlan tlin a ni leh a. Cabinet Minister niin Revenue Department te, AH & Vety te, R&R Department te a enkawl a, kum 2003-ah Aizawl West II Constituency atangin MNF ticket-in MLA-ah thlan tlin a ni leh a. Cabinet Minister ni lehin Transport te, AH & Vety te, Disaster Management & Rehabilitation te a enkawl a ni. Pu Rina hi Tuikual Kohhran Upa atan January ni 25, 1998-ah thlan tlin a ni a, October ni 11, 1998-ah nemngheh a ni. Kum 2005-ah Zarkawt Kohhrana a pem hnuah Sunday School zirtirtuah a tang leh a, thuhrlitu te niin a thih thlengin he rawngbawlina hna hi a chelha a ni.

Pu Lalrinchhana hi April ni 17, 2002-ah aw bawm cancer a ni tih hmuhchhuah a ni a. TATA Hospital Mumbai-ah 2008 thleng enkawl a ni a. Kum 2009 atangin Mumbai pan tawh lovin Aizawl-ah a inentir a, a aw bawm cancer chu dam fela ngaih a ni. December 19, 2018 ah NEIGRIHMS Hospital, Shillong panpui a ni a, hetah hian urinary track infection (UTI) a nasat avangin khawih ngam a ni lova, Aizawl-ah a rawn haw leh a, khawsik leh zun thiin a tlakbuak avangin February ni 27, 2019-ah Civil Hospital-ah admit leh a ni a, April ni 15, 2019-ah NEIGHRIMS an pan leh a, investigation hrang hrang an tih hnu ah pumpui cancer a ni tih hmuhchhuah a ni a. June ni 11, 2019-ah a pumpui cancer chu zai a ni a, beiseina sang tak an neih laiin a zainaah leakage a awm tih hmuhchhuah leh a ni a. Emergency in June ni 17, 2019-ah zai leh nghal a ni a. Heta tang hian ICU-ah dah nghal a ni a, tha leh mai tura beisei a nih laiin June ni 18, 2019 Thawhlehi tlai dar 6:15 khan chatuan ram min lo pansan ta a ni. Khami chin kha Pu Rina chanchin ka sawi chu ni sela. Kan sawi angin sawi belh tur a tam a, tunah chuan tawi fel deuha sawi kha a thain ka hria a.

Pu PB Rosanga, a ni hi tun hnaia chatuan ram min pan san ta bawk kha a ni a. Pu PB Rosanga Minister hlui hi 19th, June, 2019 zan dar 8 khan cancer natna in Aizawl Hospital-ah kum 86 mi niin min boral san a ni. Pu PB Rosanga hi Pu Chhumbura leh Pi Chhingzovi fa niin 11th, June, 1933-ah Hnahlan kuaah a lo piang a. An unau hi mipa 7 leh hmeichhia 4 an ni. Pi Darrochhingi nen ni 19.1965-ah an innei a, fapa 3 leh fanu 3 neiin tu leh tuchuan 20 an nei a ni. Zirna lamah chuan 1964 khan St. Edmund's College atangin BA a passed a, BA a passed hnu hian ramhnuaiyah underground-in a chhuak a. 4th March, 1967-ah man niin lunginah 18th April, 1972 thleng a tang a ni. Tin, man a nih hian Silchar-ah thawn thlak a ni a, MNF hruaitu zinga

convict hmasa ber a ni. Lungin a tan laiin kum 3 chhung chu damdawi inah enkawl a ni a, kawl pawh bun tir reng a ni. Kum 1978 UT MLA election-ah PC party ticket-in Ngopa bialah thlan tlin a ni a, tah chuan Cabinet Minister a ni. Cabinet Minister a nih chung hian Health, Agriculture, Forest te a enkawl a ni. Hun reilote hnuah PC Ministry a tlak tak avangin, 1979-ah inthlan thatna neih a ni leh a. Tichuan Ngopa bialah bawk a ding leh a, thlan tlin a ni leh a ni. Brig.T.Sailo kaihhruaina hnuai a department chan ngai chang leh tur leh Cabinet Minister atan ruat nawn leh a ni. Kum 1998-ah Ngopa bialah bawk MPC ticket-in thlan tlin leh a ni.

Tichuan Pu Rosanga hi Kanan Kohhran Upa atan thlan tlin niin kum 1990-ah nemngheh a ni. Kum 2004-ah Diploma Certificate hlan a ni a, kum 47 chhung chawl lovin Sunday Sikul zirtirtu hna a chelh a ni. Pu Rosanga hi a kum a lo upat hnuin hrisel lohna hrang hrangin a tlakbuak ve a. Kum 2017-ah Max Hospital, New Delhi-ah kal pui a ni a, chutah chuan chuap cancer a ni tih hmuh chhuah a ni. Tichuan enkawl zui nghal a ni a, mahse natna hrang hrangin a tlakbuak ve a. Tichuan kumin 13th May khan Aizawl Hospital-ah admit niin a chuapa tuitling te siak a ni a. A natna hian zual lam a pan zel avangin 13th June, 2019-ah ICU-ah dah a ni a, tichuan 19th June, 2019 zan dar 8-ah Lalpa hnenah min chawlh san ta a ni.

Pu Speaker, kan mi hmasa Minister hlui uiawm tak tak ten min boral san hi pawl kan tiin anmahni kan sun a. Kan rilru a nguiin hreawm pawh kan tih phah em em a ni tih kha ka sawi theih chin ni rawh se.

S P E A K E R : Aw le, sunna dang sawi duh kan awm em ? Pu C.Ngunlianchunga i lo sawm ang.

P U C. N G U N L I A N C H U N G A : Ka lawm e, Pu Speaker. Vawiih hian kan hotu hmasa te Pu Lalrinchhana MLA vawi 4 lai lo tling tawh, helaiah sun an ngai hi uihawm ka ti a, mimal taka inhriatna thuk tak kan nei lova. MNF Ministry hmasa khan District Council-a kan awm ve lai Revenue Department a chelh lai khan rambuai chungchangah ama room-ah meeting kan nei ho va. District Council te kan dinhmun min hriatthiam pui hle mai a, chumia kan meeting-ah pawh chuan District Council te lam tanga thusawi tlat leh kan dinhmun Autonomy kan nihna min zah sak tlattu a nihna te chu

vawiinah kan rilru ah a lo thar em em a ni. Khatih hun laia sorkar te chungah pawh khan kan lawm hle mai a. Vawiinah hian natna avanga min boral san ta hi kan ui hle a ni. Kei pawh cancer patient inenkawl lai ka ni a, Mumbai ah khuan Mizoram House bul lawkah TATA Hospital a awm a. Mizoram atanga patient kal te tan hian a tangkai khawp mai a, na lutuk lo tan chuan minute 5-10 inkarah ke in kan kal a kan thleng mai zel a ni. Chungte pawh Minister Pu Lalrinchhana hmalakna zara khulaiah khuan sorkar-in House te pawh nei niin ka hria a, a hnutchhiah hi ropui ka ti khawp mai.

Tin, Bible-ah kan hmu a, Mosia chuan mihring dam kum chu 60 emaw 70 emaw a ni a, a hnu lam chu chakna avang a ni tih kan hmu a. Vawiinah kum 84 lai he khawvelah a hun a hmang thei hi a awhawm hlein ka hria. A kalsan tak a nupui fanau, a tu chhuante kan sunpuiin kan tuarpui hle a ni tih ka sawi duh a ni.

Tin, Pu PB Rosanga hi a graduate hun te sawi khan kan pian kum bawr vela graduate deuh tho te a ni a. Miropui a ni tih a lan chianna em em chu MLA wawi thum a tling thei te, cabinet wawi thum lai a ni thei te hi vantlang chunglam a ni tih a lang chiang hlein ka hria a ni. A chanchin Zoram pum puiin kan hriat amah hian democracy ropuina a tilangin ka hria a ni. Unau chhul khat chhuak, thisen khata piang constituency khata party pahnih ticket hmanga han khing mai a ni te kha Zoram khawvelah hian awm leh ang em aw tih ka ngaihtuah a ni.

Tin, an pahnih hian an awmna kohhran upa an han ni te pawh khan politician te kan dah balh viau laiin Kohhran hnarkaitu an han ni thei te hi a ropui hlein ka hria. Vawiinah hian Pu Lalrinchhana leh Pu PB Rosanga te kan ui hle a ni tih ka sawi duh a. An kalsan tak an chhunge Pathianin thlamuan se tih hi kan tawngtaina a ni e. Ka lawm e.

S P E A K E R : Member zahawm tak Pu Vanlalhlana ka sawm e.

PU VANLALHLANA : Pu Speaker, mi pawimawh tak tak pahnih wawiina kan sun turte hi kum thuah chuan kan pawl pha lo hle a, mahse vanneihthlak takin 4th Assembly-ah khan member kan lo ni tlang ve a. Kan House Leader-in a

sawi ang khan Pu Lalrinchhana kha Minister a ni a, department hrang hrang a enkawl a. A department enkawlte pawh hneh takin a enkawl a ni. Amah kha a hmel enin a nelawm vak lo naa han kawm chian erawh chuan belhchian a dawl hle a. Mi thuhnuairawlh leh mi zaidam, Pathian tih mi a ni a, a nunah khan zir tur tam tak a awmin ka hria .

Pu P.B. Rosanga kha a mimal takin politics-a ka tel tan atanga a hnung ka zui a ni a, kan inhre Chiang Thawkhath viau a. 1982 chhoa politics kan han tih ve tanah Khan Champhai tlangdung leh Khawbung thlengin kan inzui a. A thusawite ngaithlain a hnen atang hian thil tam tak ka zir chhuak a ni. Tin, 4th Assembly-ah khan member kan ni tlang leh a, PAC member ni tlangin India ramah study tour-in kar hnih dawn room khatah awmin kan inzui leh a. A nun a tlawm a, thil a hria a. Politics-a hun a hman hmain sumdawngin Mizoram dung leh vang a lo fang tawh a, chuvangin zin nuam a ti a, a bula awm pawh a nuam em em a. Tin, thil tam tak a lak atang hian kan zir a. Party angah pawh PC Party-ah mawhphurhna chi hrang hrang- Vice President, General Secretary, Treasurer leh nihna pawimawh dang dang lo chelh tawh a ni a. Tin, Assembly-ah vawi thum thlan tlin a nih rualin, Mizoramah hian record a ni hial em aw ka ti a, Pu P.B. Nikhuma kha Pu Chhunga hun laiin Minister a ni a, Pu P.B. Rosanga kha Pu Thena hun laiin Minister a ni leh a. Unaua Minister hi an awm em ka hre chiah lo, a ni chhunte pawh an ni mai thei a ni. Kan zingah a awm ta lova, sun a ngai ta hi thil lung a na a. Engpawhnise, an kalsan tak an nupui fanaute leh an tu leh fate zawng zawng Pathianin awmpuiin thlamuan se tih kha kan tawngtaina leh kan duhsakna a ni. Ka lawm e, Pu Speaker.

SPEAKER : Pu Ruatkima, Minister zahawm tak ka sawm e.

PU LALRUATKIMA, MINISTER : Pu Speaker, ka lawm e. Vawiinah hian he House zahawm taka member lo ni thin Pu Lalrinchhana leh Pu P.B. Rosanga-te sunna hun kan hmang mek a. Aizawl West-II bialtu ka nihna angin kan bialtu lo ni thin Pu Lalrinchhana chanchin tlem han sawi ka duh a.

Kan hriat angin ram leh hnam tana a hun pum pui hlantu a ni a. Ramhnuaiia zalenna an sual dawn khan “Ramin chhan a ngai an ti a, kan kal ta mai a ni” a ti a. Ram leh hnam vei mi a ni a. Tin, politics khawvelah a awm chungin term 5 a zawnin MLA atan thlan tlin a ni a. A political career han chhutin vawikhatmah hlawhchham hmel a hmu lo a ni. Chutiang chu mi tlemte an awm niin a lang a ni.

Politics a khelh chhungin hnuhma, sulhnu ropui tak tak a hnutchhiah a. Chutah chuan a bik takin kan ngaihthlak tawh ang khan Mumbai-a Mizoram House kan neih nachhan pawh hi amah a ni an ti a. Tin, Revenue Department, tuna kan hotute duhsakna a zara ka enkawl mekah pawh hian sulhnu tha tam tak a hnutchhiah a ni.

Chumai bakah politician-te hi mipuiin min hmuh dante hi danglam deuhna kan nei a, Kohhran Upa atan Aizawl khawpuia kohhran lian berte zing atangin thlan tlin a ni thei hi a ropuina belhchhahtu niin ka hria a. Tun hnaiah taksa bawrhsawmnain a tlakbuak a, damdawi inte an pan a. Tha taka an rawn haw kan beisei lain hun lo takah chatuan ram min pansan ta hi kan ui em em a ni tih ka sawi duh a. Aizawl West-II mipuiten kan bialtu MLA hi kan ui takzet a ni tih ka sawi duh a ni.

Pu P.B. Rosanga hi ka puzawn a ni a, 27.6.2018 khan a u Pu P.B. Nikhuma he House zahawm takah hian kan sun tawh bawk a. Nikumah khan makpa nih manah a chanchin han sawi kha thaa ka hriat avangin ka sawi tawh a. Hun inang deuh thawah an unauin sunna hun kan han nei ta mai hi thil mak danglam tak ni pawhin ka hria. Kan hriat angin kum 1978/79-ah Ngopa Constituency-ah an unauvin an inkhing a. Mizoram political history-ah hian thil danglam tak, thil awm zen zen leh a awm leh mai ang tih pawh rinawm loh tak mai record an siamin ka hria a. Tin, kan hriat angin Pu P.B. Rosanga hi 1964-ah khan MNF ticket-in Aizawl East Constituency bye-election-ah Pu R. Thanhlira, Assam Public Service Commission member-a a tel tak avang khan a hmun ruak hnawhkhat turin a ding bawk a.

Chutiang chuan Mizoram buai hma khan MNF-ah Secretary niin Pu Laldenga-te Silchar jail-a an tan laia Assam Chief Minister Pu Chaliha zuk betu leh tang zuk lachhuak tute zing ami kha a ni. Amah hi kut hnathawk mi, mi taima a ni a. Hnathawk lova awm mai mai thiam lo a ni a. Cancer natnain kum 2017, June thla khan a tlakbuak tan a. A hun hnuhnung lamah Kohhrana a rawngbawlina chhunzawm thei lovin chatuan ram min pan san a ni.

Heng kan member duhawm tak tak pahnih Pu Lalrinchhna leh Pu P.B. Rosanga te hi an chhungte kan tuarpui takzet a, kan tawngtainaah kan hre reng a ni tih ka sawi duh a ni e. Ka lawm e.

SPEAKER : Pu Lalrintluanga Sailo. Question Hour a la zel mai a, in phar viau nain. Engtinge ni ang? Pu Lalrintluanga Sailo sawm phawt ang.

PU LALRINTLUANGA SAILO : Pu Speaker, tawitein. Kan hruaitute leh member zahawm tak tak ten an sawi ang khan vawinah hian kan ram hruaitu lo ni thin Pu Lalrinchhana leh Pu P.B. Rosanga te sunna hun kan hmang ta mai hi channa nasa tak niin ka hria a. Tun hunah hian a bikin Pu Lalrinchhana hi ka mi hriatchian a nih avangin a chanchin ka hriat ang tlem han tarlan ve tulin ka hria a.

Pu Lalrinchhana hi tuna ka hmaa member ten an sawi ang khan MLA term 5 hneh taka thlan tlin niin Cabinet Minister pawh vawi 3 lai lo ni tawh a ni a. Politics-ah hian a hlawhtling hlein ka hria . Dik tak chuan tla miah lova thangthar zawkte tana seat kiantu kan neih politician mi tlemte zing ami a ni a, a ropui ka ti a.

Tin, amah hi kum 44 vel ka lo zui ve a ni a, a nunah hian entawn tur tam tak a awmin ka hria . A bik takin Pathian a tihna hi ropui ka ti thin a, indona karah pawh ram hruainaah te, sorkarah leh party hruaitu pawimawh tak a nih rualin ramhnuai kohhranah khan hruaitu pawimawh ber kum tam tak a ni a. Tun thlengin kan kohhranah hruaitu pawimawh tak a ni a Chutiang a nihna hi ram a lo fel a, remna leh muanna kan neih hnuah pawh a nunah a lang tlang zelin ka hria a. Mi duham lo leh corrupt lo tak hruaitu Mizo politician kan neih tlemte zinga pakhat a niin ka hria a, ropui ka ti a. Politician mah ni sela, midangte huatna rilru nei ngai reng reng lo mi a nihna ah hian Pathian a tihna a lang chiang hlein ka hria . Chuvang chuan vawinah hian hruaitu dik leh Pathian tih mi kan sun a lo ngai ta mai hi Pu Speaker, hrehawm ka ti a A nuna thil kan han tarlan tak ang te kha keini te hian ram hruainaah te, bial leh khawtlang kan enkawlnaah te hian chhawm nung zel ila tiin he House zahawm takah hian ka rawn tarlang a ni e. Ka lawm e

SPEAKER : Sawi tawh ang khan zawhna leh chhanna hun a kal zel mai si a, memberte an zahawm a. Amaherawhchu Pu L.Thangmawia, a hnuhnung ber atan sawm mai ila, min hrethiam ula, Pu Thiama te pawh a lo pianna chu a ni nain Pu L.Thangmawia i sawm phawt ang aw.

PU L.THANGMAWIA : Pu Speaker, kan ram hruaitu pawimawh tak tak lo ni tawh thin pahnih Pu Lalrinchhana leh Pu P.B. Rosanga te sunna hun kan hmang ta mai hi a hrehawm khawp mai a. Tawngkam hnih khat lek tak takin ka sawi ang a.

Pu Rinchhana hi keini naupang zawk te chuan thui tak chu kan hre chuang lova, a chanchin te kha chu an lo chhiarchhuak tawh a. Amaherawhchu kan hmuh theih chhun chu mi tak taka kan hmuh a ni a, chutichung chuan a bula awm hi a nuam em em a ni . Thiltih nikhua leh party hunserh hmang tura a dinchhuah atang pawhin a ti mai mai lo tih hi naupang zawk leh a kaihhruai ten kan hmu thei a Chuvangin a nunah hmuh tur tam tak a awm a, zir tur tam tak a awmin ka hria a, a uiawm khawp mai. Tuna ka rawn dinchhuah nachhan ber pakhat chu Pu P.B. Rosanga hi kan biala kan Minister lo ni tawh thin a ni a. Khang vel lai khan hmasawna ruhrel dintu pakhat a ni a. Tuna sorkar office hmun pawimawh leh thil pawimawh zawng hi a kutchhuak deuh vek a ni ti ila kan sawi sual awm lo ve. Chuvangin ka bial chhunga a bial thin ten an ui em em a, a boral ni pawh khan Whatsapp leh phone call tam tak ka dawng a, a ruang hi kan bial aiawhin ka zu tuam ve nghe nghe a, thui tak ka sawi lo ang a, uiawm tak pahnih kan chan a. Vawiih hian an kalsan tak an chhungte Pathianin thlamuanin awmpui zel rawh se tih kha kan tawngtaina a ni e.

SPEAKER : Kan sun te hi an uiawm baw a, House Leader zahawm tak pawhin member-te a kian a ni ang. A tawp nan Dr ZR. Thiamsanga kan sawm ang a, a hnunung ber ni rawh se.

Dr. ZR. THIAM SANGA : Pu Speaker, hun tawite hmang lo thei niin ka in hre lo va, ka lawm khawp mai. Pu Rinchhana hi politics-ah hian ka luhna la rei lo mahse politics-a ka luh hma daih tawh MNF-in remna Zoram in an rawn chhuah khan ka lo hre tawh a, Luangmual-ah kan lo inkawm tawh a. Mi zaidam, Pathian tih mimi pawisawi lo, mi inngaitlawm tak a ni. Minister a nih a, Minister a ni tawh hnuah pawh khan Civil Hospital-ah a rawn kal a, an inentir dawn a ni. OPD-ah a rawn intlar ngat mai , chutiang khawpa mi ingaitlawm a ni. ‘Ka pu, eng nge i mamawh’, tiin ka zuk kal ngat a ni. “Ka inentir dawn a, OPD Card ka la dawn a ni”, a ti. Chutiang chu kan Minister kal tawh nih dan a ni. Amah atang hian zir tur kan va ngah em ! Ngopa PHC-a ka thawh laiin, Ngopa PHC khi CHC-a min hlangkaitu a ni tih ka sawi duh baw a.

Tichuan, Pu P.B. Rosanga hi kan hria a, ani pawh hi politician zinga, mi inngaitlawm, bial tana inpe tawp, Pathian tih mi a ni a. Ka bial chhung Hnahlan khuaa piang a ni a. A chanchin tam ka sawi lovang. Matric ka pass zawh khan, ‘in

chhungkua in rethei em mai, hna ka pe ang che', minrawn ti ngat a ni. Chutiang khawp chuan miretheite ngaihsak mi a ni. Thu ka sawi tam lo ang a, Hnahlan bial leh a chhehvel zawng zawng ten vawiin thlenga nu leh paa an neih a ni tih hi vawiinah hian ka sawi duh a. Chu chuan thil thui tak a sawi a ni. Tam

tak sawi tur ka nei a, amaherawhchu kha kha ka sawi thei tawk ni rawh se. An kalsan tak an chhungte zawng zawng Lalpa'n awmpui zel rawh se.

SPEAKER : Aw le, anni pahnih hi kan Session laia boral an ni a, kan rel a, kan tih mai a tha ang kan ti a. Amaherawhchu, Session lai ve ve a boral an nih avangin kan ngaih pawimawhzia leh kan uizia lantir nan hetiang hian kan Chief Minister hoin ro kan rel a ni. Le, tunah chuan kan Minister lo ni tawh thin pahnih Pu Lalrinchhana leh Pu P.B. Rosanga te sun nan memberte ngawi rengin minute khat i lo ding ang u. (member te 1 minute ngawi reng in an ding). Tunah chuan zawhna leh chhannaah kan kal ang a. Starred Question No.156-na zawt turin member zahawm tak Dr. Vanlalhlana ka sawm e

Dr. VANLALTHLANA : Pu Speaker, Sports & Youth Services Minister zahawm tak chhan atan :

- a) Hawl Indoor Stadium Basketball Court hman dan tur ruahmanna siam tur hian tunge ruat a nih ?
- b) Ruahmanna hi engtikah nge peih fel a nih theih ang?

SPEAKER : Chhang turin a changtu Minister zahawm tak Pu Robert Romawia Royte kan sawm e.

Pu ROBERT ROMAWIA ROYTE, MINISTER : Member zahawm tak Dr. Vanlalhlana zawhna chhanna chu –

- a) Hawla Indoor Stadium Basketball Court hman dan tur hi a bika siam a ni lova, siam tura ruat pawh an awm lo. Department hnuaia Indoor, Hall leh Playfield etc, te enkawl dan tur chu ruahmanna siam mek a ni.
- b) Ruahmanna hi Mizoram State Sports Council General Body Meeting hmasa bera thlir ho a ni ang tih a ni e.

SPEAKER : Zawhbelhna zawt turin Er.H.Lalzirliana, chumi zawhah Pu Zodintluanga.

Er. H. LALZIRLIANA : Pu Speaker, ka lawm e. Zawhbelhna, Hawla Stadium hi Mizoramah tournament puitling buatsaih theih nana hmun remchang leh tha a ni a. Chuvang chuan discipline dangte hian an hman ve theih tura ruahmanna hi kalpui ni sela. Chutiang tur chuan tih theih a ni em? Tunah hian kan hriat danah chuan discipline pakhatin ta neih deuh rawta nei an awm ni te in an sawi a, hei hi discipline dangte tan pawh hman tura ruahman theih a ni em?

A Pahnihna-ah chuan Mamit-a Multi Purpose Indoor Stadium tura ruahmanna kha eng nge kan thlenpui tawh tih ka zawhna a ni e.

SPEAKER : Member zahawm tak Pu Zodintluanga Ralte zawhbelhna zawt turin kan sawm e.

PU ZODINTLUANGA RALTE : Pu Speaker ka lawm e. Session hmasa 20th March khan unstarred question ka zawhna - Sorkar hmasain work order a lo pek tawh te cancel an nih leh nih loh chungchang ka zawt a, a awm loh thuin chhan a ni a. RTI -in kan zawt tha leh a, RTI- ah chuan work order 10 lai mai cancel a nih thu leh a thawktu te party mi, mi 10 lai an pek thu kha a ni a. Chuvang chuan Pu Speaker, kan House zahawm tak hi information diklo an rawn pe kha pawl ka ti a, kha kha ka rawn sawi chhuak duh a. Ka zawhna chu Pu Speaker, construction of compound fencing State Sports Academy Zobawk ami saw tender chhuah tawh a ni a. Tender chhuah a ni a, work order chhuah vek tawh a ni a, amaherawhchu khami work order kha cancel na awm lo in, tu in nge ni phur deuh maiin a thawk ve ringawt mai a, tunah sawn. Nimin piah mai khan RTI zawhna a rawn thleng a, nimin piah deuh mai ah pawh chuan kha work order leh kha tender te kha cancel a la ni lo a ni. Chuti chung chuan tunge ni an hriat loh pawnlam mi sawn a thawk mawlh mawlh mai a, saw an thawh saw engtin nge bill te kan inpek ang tih kha ngaihtuahnaah a awm a. Chuvang chuan khatianga sorkar-in dan ang pawh ni lo, work order pawh hmu loa hna an thawk saw an titawp nghal thei ang em tih ka rawn zawt e.

SPEAKER : Zawhna neitu Dr.Vanlalhlana, a tawpna atan kan sawm e.

Dr. VANLALTHLANA : Pu Speaker, ka lawm e. Ni 11.5.2018 khan USAM meeting neih a ni a, chumiah chuan Joint Director, Sports & Youth Services hnuaia Sports Centre hote hman dan tur ruahmanna siam tura ruat a ni. Ani hian hma a la lo nge ka hrelo a, ruahmanna siam tur a nih hnua thla eng emaw zat-ah pawh engmah hmuh tur a la awm lo a. Hmanni lawkah kan hria ang a, Hawla Indoor Basketball Court hmanna turah Mizoram Basketball Association leh Mizoram Volleyball Association ten buaina an tawk a. Sports Council lamin inbe tawn tura tih an nih laiin pakhat zawkin Minister panin chunglam atangin inbe tura an tih ang ni lo in Association pakhat zawk chu a rawn chung tlak a, buaina pawh a awm nghe nghe a ni. Hemiah pawh hian kan Sports Minister pawh a buai hle a, a rilru pawh a hah viau a ni tih kan hria a. Hetah hian ruahmanna siam tur kha ruat ngei a ni tih kha ka sawi duh a. Ani hian engatinge a va peih har ve, a tih theih dawn tawh em tih kha ka zawt leh duh a ni.

Tin, Mizorama Sports hmunhma kan neih te hi Sports Association ho enkawltir tura ruahmanna siam a ni dawn em? Tin, state level Sports Association (a hma khan 31 niin ka hria a) te hnena financial assistance pek thin hi kuminah hian tihpun tumna a awm em tih a ni.

SPEAKER : Aw le, a in kar kik hlawm khawp mai a a then chu, a theih ang ang chhang turin Minister zahawm tak kan sawm e. Pu Robert Romawia Royte.

Pu ROBERT ROMAWIA ROYTE, MINISTER : Pu Speaker, ka lawm e. Mamit bialtu zahawm tak Er. H. Lalziriana zawhna kha chhan hmasak ber ka tum ang a. Pakhatnaah chuan Hawla Indoor Stadium khu Aizawl leh Mizorama Indoor Stadium kan neih that, discipline zawng zawngin hman an chak, an awh em em, khuta inkhelh tournament te organize a nih chuan sponsor te pawh hmuh a awl a, media partner hmuh te pawh a awl a. Chutianga discipline zawng zawng ten hman an chak em em khu sorkar suma sak, sorkar ta a nih ang hian discipline dangte hman ve theih turin ngaihtuah a tha lo maw tih zawhna chhanna chu sorkarin a ngaihtuah mek a ni tih kha ka chhan theih dan a ni a. Helai hi sawi tur tam tak a awm a, khu chang pawh khu a ni lo a, Mizoram-ah district lamah te pawh a ni a, state capital- ah te pawh a ni a. Kan sports infrastructure leh indoor leh football field te thlengin kan inchuh nasa em em a. Harsatna neuh neuh te pawh hi a awm thin a ni. Hei hi sorkarin en that tha a ti a, chutianga chuan asset management mumal tak kalpui kan

tum a ni tih kha Er. H.Lalzirliana, MLA zahawm tak zawhna hmasa zawk ka chhanna ni sela.

Tin, Mamit Multipurpose Indoor Stadium sak tumna a awm em tih kha sak tumna a awm a. Kan Chief Minister zahawm tak duhsakna Mamit District leh Sports Department ten kan dawng a. Mamit District pum puiah khuan basketball

te, volley ball te han inkhelhna ang chi, fur laia practice na tur ang chi hi a district pum puiah hian a awm miah lo niin kan hria a. Chuvangin a vawi khatna atan Mamit Indoor Stadium hi sorkar hian sak a tum a ni tih kha ka chhanna a ni e.

Tin, member zahawm tak Thorang bialtu Pu Zodintluanga zawhna pakhatna kha, khami Unstarred Question-a zawhna chungchang kha, ama hian lo ennawn leh se ka duh khawp mai. Party workers hna pek an awm em tih a ni a. Party workers hna pek kan nei lo tiin session hmasa lamah khan ka chhang a. Tin, Zobawk-a hna tender vek tawha pek tih lai kha a ni a, tender kha restricted tender a nih ka ring a. Chutianga pek kha B.M. Infrastructure tih pek an ni a, Lushai Engineers neitute ta tho niin ka hria a. Tunah hian B.M. Infrastructure hi cancel a la ni lo a. B.M. Infrastructure te hian hna hi an la thawk ti mai ila, an aiawh te pawh a ni ang chu. Chumi hnuaiah chuan a la kal reng a, bill pawh a buai lo turah ka ngai a, B.M. Infrastructure-ah khan bill chu pek mai tur ni awm a ni. Tuna kan hriat danah chuan thui tak thawh a ni tawh a. A bill hi pek chiah a la nih loh avangin bill pek dan turah khan member zahawm tak kha a lo buai deuh a ni mai thei a. Mahse bill chu dan pangngaiin a contractor tura a hunlaia an ruat ngei hnenah pek a ni dawn e tih kha ka chhanna a ni .

Tin, sawi tur neuh neuh te pawh hi a awm a. Helaia RTI hmanga mi 10 in an lo thawk reng si tih lai kha a mak khawp mai, keipawh construction field-ah hian thawk ve thin leh awm ve thin ka ni a. Contractor han hmuh zawh loh, a department pumin kan zawn huai huai pawha kan hmuh zawh loh ang chi te an

awm tlat thin hi a mak khawp mai. Lalrinsanga tih hi Sports Department hnuaiah hian tun thleng hian kan la zawng hmu zo lo va. Sports Department hna kha a hmu tam khawp mai a. Mahse te reuh te te a ni a, nuai 4, nuai 5, nuai 6 tih vel kha. Department pawh ‘zawng nawn leh teh u, in hmuchhuak thei lo maw, contractor hmuh zawh loh ringawt mai te chu’ te kan han inti a. Khatia kan zawn hmuh theih

loh thlawtah khan an lo pek dan ang chi tho khan nuai 10 hnuai lam te te kha a nih avangin kan sorkar hnuah khang 9/10 ka hre ta chiah lo va. Minister zahawm tak Pu C. Lalrinsanga bial amite pawh hi a ni a. Khang kha a diltu kan lo neih ve mek, party lam ngaihtuah miah lovin a thawk zo thei tura kan ngaih te kan pe ve thung a. Hneh takin, tha takin chungho chuan, zawn hmuh theih ho kha an ni bawk a, an thawk zo vek tawh a ni tih kha ka sawi tel duh a ni.

Tin, Dr. Vanlalhlana zawhbelhna Joint USAM meeting tih kha Mizoram State Sports Council Meeting a ni zawk em aw? Mizoram State Sports Council meeting, 2018-ah khan Hawla Indoor Stadium hi mumal zawka enkawl a nih theih nan Mizoram Basketball Association in an dilna kha an ngaihtuah a, Minister zahawm tak Pu Zodintluanga hunlai khan. Ngaihtuah awm tak pawh a ni a, tha takin ro pawh an relin ka hria a. Tichuan, Mizoram Basketball Association-in khu Hall enkawl/manage te pawh a ni ang chu, a basketball court lai bik khu an kuta dah kha approve a ni a. Mahse a terms & conditions, a minute pawh ka kawl a, playfield ang leh Indoor Stadium dang zawng zawng hi mumal zawka enkawl a ngai a. Chuvang chuan a enkawl na dan kalphungte rawn draft turin Pu John Tanpuia, Joint Director, (Sports Department-ah chuan kan officer chhuanvawr tak kha) ruat a ni a. A buatsaih a, kan thlir ho tawh a. A har ang reng khawp mai a, Indoor Stadium mal pakhat mai kha a ni lo va. Tin, Aizawl ringawt hi ngaihtuah chi a ni lo va, Kolasib-ah te, Lunglei-ah te a inchuhna leh a inhruipawhna nasat na hmun te kan District Headquarters te pawh hi a ni hlei hlei a. Chuvang chuan tunah hian kan la peih lo hret a. Tin, Finance Department rawn ngai chi thilte pawh kha a fee han tih ve deuh te a tha em tih te. Finance lam atangin heti zah hi sports infrastructure siam nan kan hmang a, state dangah chuan a fee te an la a, lak ve a tha lawm ni tih tawngkama lo intih deuhna te pawh a awm a ni awm e. Chuvang chuan Finance Department lam te nen pawh inrawn kual zak zak reng a ni tih ka sawi duh a.

Nichina zawhna (a) – na chhanna ‘tumah ruat bik awm lo’ tih ang deuha chhan a nihna chhan kha, keipawhin uluk deuhin ka enpui a, he chhanna hi. John Tanpuia kha Hawla Indoor Stadium enkawl na dan siam tura ruat a ni lo a. Hawla Indoor Stadium kha chu a tel ve mai tur zawk anga ngaih a ni. Rampum huapa Indoor Stadium leh playfield enkawl na dan siam tura tih zawk a ni tih ka sawi duh a.

Tin, member zahawm tak, a zawhna neitu Dr.Vanlalthlanan buaina awm lek lek tih ang chi kha. Kan hriat angin kumin inthlan kum a ni a. Mizoram Volleyball Association-in sponsor te nena a hma atanga an lo ruahman lawk thlap angin Pro-Volleyball an tih ang chi hi a lar em em a. An hun bituk a lo thleng a, R. Dengthuama Hall-a ti thei tura an inngaih kha, inthlan kha zo tawh mahse Election Department lamin an phal tak loh avang khan tihna hmun tur an nei ta lo va. Chuvang chuan Volleyball Association President, Dr. Lalmalsawma, MLA-ah te kan candidate pui a ni a, ngam takin minrawn phone a. Keiin chutiingin department pakhat an lo inti thu tlat tih hre lem lovin ‘a tha ngawt ang chu, Sports Council Secretary hnenah ka lo hrih ang e’, ka ti a. Mizoram Volleyball Association kutah an lo allot a. Mahse Mizoram Basketball Association-in, ‘sawihon a tha ang hei hi chu, kan tih thin dan a ni lo e’, an ti a. An sawihon a ni 8.4.2019-ah agreement pawh an sign thlap a. Chu an agreement-ah chuan Mizoram Volleyball Association-in hun an hman dan tur leh Basketball Association in a kar lakah khan programme an nei tho a, an inthen thlap a, May thla thleng khan khami bikah chuan. Khatia agreement te sign a, lungrual taka rel si chuan a hnuah MP inthlan hma ni chiah khan Mizoram Basketball Association Club Owners, ‘ten hei hi kan pawm lo’ tiin ‘sitting demonstration kan nei dawn’, an ti a. MP inthlan hma ni chiah khan neih tum angin an insawi a. Lungleia ka awm laiin ka lo hria a. Lunglei atingin ka tlan haw nal nal a. E! Chutiang te a dik dawn em ni,’ ka tia. Sports-ah rei tak kan lo inhmang ve tawh thin a. Hetianga nawrh leh eng emaw hi chu kan ti ngai lo khawp mai. Eng pawh ni se, ‘ka ho in sawihon ang u’, ka ti a. Kan inah ni 10.4.2019, zing dar 7:00-ah kan meeting a, kan kim khawp mai a. Chutah chuan agreement kan siam a. Mizoram Basketball Association hnuaiia Club Owners ho demand leh an demonstration te MP inthlan dawn hnai kha a ni a, kha tih lai kha chuan vote kan hloh ang tihte pawh kha kan hlau ve lo thei lo a. Chuvang chuan han insawi rempui theih dan kawng zawn kha a thain ka hria a.

Tichuan, keima ina kan sawihona-ah chuan Volley-ball in nikhat pawh an hman ai chuan a Hall khar kha an demand tlat a. Chuvang chuan lungrual takin ti mai ila, kan duh anga lungrual chu kan ni chuang lo ang a, a kal khawm kha anrawn kal kim vek a. Club Owners Association lamte pawh an lo kal a, Volley-ball pawh an lo kal a, Basket-ball pawh an lo kal a. Agreement kan sign a, Hawla Indoor Stadium khu thu leh awm hma chuan khar ni rawh se tiin anmahni duhthuin

agreement signed a ni tih ka sawi duh a. Hei hi khar hlen kan tum pawh a ni miah lo a, a tha thei ang bera kal leh vat hi kan duh khawp mai tihte pawh vawiinah hian he House zahawm tak hi ka hrilh duh a.

Tin, tuna khar a nih lai la la pawh hian Dr. Vanlalhlana hi MBBA lama an hotupate zing ami a ni tho a. Hmanniah minrawn ngen leh a, 'selection trial-te kan nei dawn a', tiin. ka zinnaah minrawn phone a. Chungte pawh chu kan hman tir leh lawp lawp tho a ni.

A tawpna atana ka sawi duh leh he House zahawm takin min hriatpui tura ka ngen duh erawh chu thil sensitive tak a nih theihna laite a awm rual hian sportsperson ang chi ho hi chu an rilru hi a thianghlim hlawm khawp mai a. Helaiiah hian a thazaiin kan Indoor Stadium leh kan Football field-te, sports infrastructure kan neih zawng zawngte hi mumal zawka enkawl dan thar hi sorkar-in arawn duang ang a, a tul chuan Cabinet-ah te pawh kan thlir ho ang a. Helaiiah hian boruak tha zawk leh a hmaa kan kal dan aia thaa kal kan tum a ni tih he House zahawm tak hi remchangah han hrilhhriat ka duh a ni. (PU ZODINTLUANGA RALTE : he House zahawm tak hi kan zah lo deuh thin ka ti a, mihring hmu zo lo tia arawn sawi mai te kha. Lalrinsanga, Chawlhmun hi 'Lalrinsanga kan hre lo' a ti a, Lalrinsanga, Chawlhmun tiin work-order cancelled-na lehkha pawh an thawn a ni. Ani hi VCP-te pawh lo ni tawh, VC member-te an ni a. Tin, Pu C. Rozidinga, Chhipphir work-order cancelled-na an thawn vat a, Vijay Kumar Kushum Kalapani, kan ex-VCP Pu Nihar-a bial ami an ni a, Pu N. Tasa, Serkawr hi Saiha-ah chuan an hre deuh vek ang. Chuvang chuan he House zahawm taka hetiang mihring awm lo leh hmu zo lo anga anrawn sawi kha chu Pu Speaker, a pawika ti hle mai)

Keima share kha chu department lam kha a ni mai a. A chhan chu work-order cancel mai mai hi keima ziaah pawh thil tih chi a ni lo tih hrechiantu ka ni a. Khatih lai kha chuan han tim deuhna kha an neite pawh a ni mai thei a. Tin, hriat loh hlana workorder lo inpek tihte pawh kha a awm deuh a, sawi tur hi a phen zawk hi ngaihnaawm tak a awm a, mahse a phen thleng thleng kha chuan sawi lo mai ang. Ka lawm e.

SPEAKER : Lalrinsanga chu an tam teh lul nen, hetah pawh 2 an awm a nia, engah nge in hmuh loh? Zawhna 157-na zawt turin member zahawm tak Pu Nihar Kanti Chakma ka sawm e.

PU NIHAR KANTI CHAKMA : Pu Speaker, ka zawhna Starred Question 157-na Urban Development & Poverty Alleviation Department Minister zahawm tak chhan atan-

- a) Housing for All (Urban) atan Tlabung-ah hma lak a ni ve dawn em?
- b) Hmalakna a awm a nih chuan engtik atanga hman/thawh tan theih turin nge ruahmanna siam a nih tih ka zawt e.

SPEAKER : Chhang turin a changtu Chief Minister zahawm tak i lo sawm ang.

PU ZORAMTHANGA, CHIEF MINISTER : Pu Speaker, member zahawm tak Pu Nihar-a zawhna chhanna chu-

- a) Housing for All (HFA) atan Tlabung-ah hma lak mek a ni. DPR siam fel tawh a ni a, 1st instalment ₹ 309 lakh dawn tawh a ni.
- b) Pawisa kan dawn tawh hi hman theihna Finance Department atanga peih fel a nih vele hna thawh tan theih a ni ang tih a ni e.

SPEAKER : Pu C. Ngunlianchunga, member zahawm tak zawhbelhna zawt turin ka sawm e.

PU C. NGUNLIANCHUNGA : Pu Speaker, ka zawhbelhna chu-Lawngtlai khawpui chhunga HFA 1st instalment hmu tawhte, in sa mekte engtikah nge 2nd instalment pek theih an nih ang tih ka zawhbelh e.

SPEAKER : Chhang turin Chief Minister zahawm tak, a changtu kan sawm e.

PU ZORAMTHANGA, CHIEF MINISTER : Pu Speaker, a hunbi kha han sawi mai hi a har tawh thin a. Vawiina kan tih ang khan sorkar-ah HFA, tuna kan zawhna neih kha Tlabung ami kha hmuh a ni tawh em? Engtikah nge thawh tan theih a nih ang tih chhanna ka neih kha tuna ka sawi ang khan a pawisa fai hi hmuh tawh a ni a. Finance Department-ah hemi hi kan process mek a, chumiah a theih hun hunah kan pe ang tih a ni a. Lawngtlai-ah khan kan han tum thut a, a nih leh a instalment dawt hi Lawngtlai lamah engtikah nge tih kha department kan inzawh chawp loh chuan rin aiin a hunbi kha a har khawp mai a. Chuvangin a theih anga hmaa pek kan lo tum ang, a process ngai kha khawinge in thlen tawh tih kha a inralkah deuh hlek a, ka hre mai bik si lo a. Chuvangin a theih anga hmaa pek kan lo tum ang e.

SPEAKER : Kan sawi ang khan Minister a awm lo a, a charge la a ni a, a lo inring vek kher lo mai thei a. Tun ami kha a tawk viau lo maw?

PU C. NGUNLIANCHUNGA : (Inaudible) a chian deuh zawk nan a ni a, ka tihsual palh a ni, a Minister concern a awm lo a. 2017-2018 atang khan Lawngtlai-ah hma lak a ni a, 1st instalment pek a ni a, in an sa a, 2nd instalment kha release a nih loh avangin an zo hlei thei lo a, an mangang khawp mai a. Khalai kha khawngaih takin kan House Leader zahawm tak khan min hriat sak se. A rang lama pek ngai an ni a, an bang a mawih zo dawn tlat tih lai kha ka han sawi duh a ni e.

SPEAKER : Chhan a ngai tawh lo a, a chhanna-ah a chiang tawh e. A hma thei ang berin kan lo en ang e a ti a, duh tawk ang aw. Starred Question 158-na zawt turin member zahawm tak Pu C. Lalsawivunga kan sawm e.

PU C. LALSAWIVUNGA : Pu Speaker, ka lawm e. Health & Family Welfare Department Minister zahawm tak chhan atana ka zawhna te chu -

- (a) Cancer Institute building tun thlenga sak a la ni lo hi eng nge a chhan? Eng harsatna nge awm tih a ni a. TB Hospital building hi thiah vek tawh a ni.
- (b) Radiation khawl hi engtika lei nge, engzat man nge, transportation-ah eng zat nge pawisa hman a nih?
- (c) Cancer Hospital-a thawktu Nurse, Grade-IV leh security te an indaihlo hle tih sorkarin a hria em? Sorkar hmalakna eng nge ni?

SPEAKER : Chhang turin a changtu Minister zahawm tak Dr. R. Lalthangliana i sawm ang.

Dr. R. LALTHANGLIANA, MINISTER : Pu Speaker, kan member zahawm tak Pu C. Lalsawivunga zawhna chhanna chu -

- a) Mizoram state Cancer Institute Zemabawk hi tunah hian sak mek a ni a, khawl lian Linear Accelerator (LINAC) Machine bunna tur sak hmasak a ni .
- b) Radiation Equipment-Linear Accelerator (LINAC), Model Variant True Beam leina turin purchase order hi sorkar hmasaah khan Dt.16.8.2016-ah pek a ni a, a man hi ₹ 14.42 crore niin, transportation charge-ah hian pawisa sen a awm lo.

- c) Cancer Hospital-a thawktu Nurse, IV Grade leh Security te indaihlohna hi sorkarin a hria a. Security rawih rawtna leh Nurse leh Grade-IV post ruak fill-up chungchang hi ngaihtuah mek a ni tih a ni e.

SPEAKER : Zawhna neitu Pu C. Lalsawivunga zawhbelhna zawt turin i lo sawm ang.

Pu C. LALSAWIVUNGA : Pu Speaker, a lawmawm khawp mai. Sak mek a ni tih kha chhanna a ni a, kan hmu vek a, khawl te pawh a lo thleng a, a dahna a awm lo va, rangvain in an sak hnan tawp a ni a, dah sawn hmanhmawh a tul khawp mai a. Cancer Society Building luah hawh a niin Cancer-a damlo te an awm a, an hmunhma saw a hrehawm em em a, chuangin, sak mek a nih pawhin tun aia chak zawka hma lak theih a ni ang em? Sak zawh thuai tuma hma lak a ni thei ang em tih kha ka zawhna a ni a. Tin, Grade-IV te, security te saw mi 2/3 vel chauh an awm a, an indaihlo em em a. Doctor te an lo kal a, indaihlo takin an awm a ni a. A bik taka Grade-IV, Nurse leh Security te hi dahbelh an tulin a lang a. Dah belh theih an ni ang em tih kha ka zawhbelhna a ni e.

SPEAKER : Hun hi a tawp a ni ruai a, chhang zo law law turin i phal mai ang u aw.

Pu LALDUHOMA : Pu Speaker, ka lawm e. Serchhip damdawiin-ah kan doctor duh tak mai min transfer sak a, a aiawh tur kha min pe turin kan han inngen a, min pe a kan lawm khawp a, amaherawhchu kar khat chhunga zawm tura tih a ni chungin, June ni 7-ah order a chhuak a, wawiina kar thumna thlengin a hmel kan la hmu lo va, kan nghakhlel hle tawh mai a, a rang thei ang berin kan doctor thar hmel kan hmu thei ang em tih ka zawt e.

SPEAKER : Chhang turin Dr. R. Lalthangliana, Minister i lo sawm ang.

Dr. R. LALTHANGLIANA, MINISTER : Pu Speaker, Pu Duha zawhna, a biala doctor la rawn zawm mai lo tih kha a rang thei ang bera zawm turin hma kan lo la ang e. Doctor transfer hi a buaithlak khawp mai a, tun hnaiah MPSC-in Doctor 31 min lak sak a, posting kan han ti a, sawi neuh neuh a awm lo thei lo va, harsatna chi hrang hrang a then chu genuine tak tak te pawh a ni a, hei hian harsatna min siam thin a, a pawh khawp mai. Amaherawhchu khalai bik te pawh kha kan ching fel thei turah ngai ila. Member zahawm tak zawhna neitun a rawn zawhna kha a hma ami

ang chi deuh tho a ni a. Ni e, Pu Speaker, sawlai saw a buaithlak khawp mai a, kan hun hma lama thil tam tak a awm a, contractor-te, ti khan felfai taka ruahmanna pheichu a awm a.

Thil pakhat buaithlak deuh mai chu, Govt. of India atanga pawisa kan hmuh tur ang chi 2nd instalment te hi hmuh loh khan a lo awm rei khawp mai a, contractor hnathawh chakloh phahna a nihna lai thui tak a awm a. Tin, khawl hi a lo thlenna hi a rei tawh ang reng khawp mai a, he House ah pawh hian ka sawi tawh a. Ideal ti mai ila, a dahna tur hmun fel fai tha tak a hmaa lo tih fel lawkna a awm thin lo laia hi a buaithlak a ni. ZMC-ah pawh sawn hetiang case hi a awm a, silpouline-in kan khuh tawp mai a, kan hun hma thil a ni si a. A that dan ber chu a lo thlen hmian felfai tha takin specification, heng cancer hemna ang chi pheichu uluk hi a ngai khawp mai a, a sak te pawh hi in pangai anga sak chi a ni miah lo a, khang kha tih lawkna pakhat mah a lo awm lo va. Chak takin hma chu kan la a, tunah hian a bik takin hemi kan khawl dahna tur hi electrification te, AC te leh thil dang dang kan han ti chho mek a, hun reiloteah kan zo thei ang em ka hre chiah lo va, chak takin hma kan la mek a ni tih erawh kha chu ka chhanna ni ta sela. Chumi rual chuan, zawhna neituin a rawn zawhna kha sawlai ah tu tute emawin in an lo thiah laklawh tawh ang chi te kha a lo tam tawh si a, a buaithlak khawp mai a. Kan patient-te leh enkawltuten chenna mumal pawh an nei lo va, pawikan ti a. Amaherawhchu, theihtawpin sorkar-in tan a la ang a, second instalment pawh hi kan hmu hma turah beisei ila a tha awm e.

Tin, chutih rual chuan hemi zawhna piah lamah hian, hmanni khan kan sawi zuk tawh a. Sawmi Cancer Institute kan tih mai hi sorkar hian thil chiang deuhhlekin kalpui kan tum dawn ta a. Speciality Hospital-ah tunah hian ruahmanna kan nei chho ta a, JICA kan ti mai a, Japanese funding titute nen pawh kan inberem fel khat viau ta a. Pu Speaker, vaibelchhe 500 project law law in ruahmanna kan han siam a. Tin, 100 bedded hospital ni tur angin ruahmanna kan siam a, hei hi kan tihlawhtling thei a nih chuan North-East ah hian zahpuiawm lo tak Hospital kan neih ka ring a. Tin, state dang atang pawhin he kan hospital hi rawn pana, inentirte leh treatment rawn la te hi kan nei thei hial mai awm mang e tih te tunah hian ngaihtuahna kan nei mek a. Chuvang chuan Japan International Corporation Agency pawh hian harsatna min siam miah lo va, kan lawm khawp a ni. Hemi chungchangah

hian ka han sawi belh lawk duh chu, kan sawi zau lawk ang a. Natna khirkhan tak mai, buaithlak tak mai kan buaipui avang hian mipuite pawhin an hriat hrim hrim a that ka ring a. 20% hi counterpart funding kan ti mai a, chu chuan min tum sak dawn a, 80% hi chu loan tur a ni a. Chumi avang chuan 1.5 emaw, 1.25% hi a interest tur anga ngaih a ni a. Fixed rate in kum 30 chhung vel he loan hi rulh tur, soft loan kan tih ang, hahthlak lutuk lo turah kan beisei a ni.

Tin, loan rulh chhungah hian kum 10 hi khawngaihna hun/inhriatthiamna hun grace period-ah khan min dah sak mek a ni. Heng hi kan tih theih chuan 100 bedded hospital tura kan thil ruahman mek hi India ramah hian a tam vak lo in ka ring a. Mizoram-in kan nei thei ang tih hi beiseina sang tak nen tunah hian kan thir mek a ni tih ka sawi duh a ni.

Accommodation chungchang harsatna lai tak MLA zahawm tak Pu Sawia zawhna kha a nih ka ring deuh a, a buaithlak khawp mai a. Temporary shelter ti mai ila, khatiang anga han tih dawn pawh khan a buaithlak zo tawh a. A plan pum pui-ah khan thil eng emaw tih tur tam tak kan lo neihna kar-ah khan harsatna kan tawk mek a.

A bik takin patient, damlote leh damlo chhungte leh Mizoram mipuite hriatthiam hram hramna kha vawiinah hian kan mamawh hle a ni tih ka rawn sawi tel duh a ni. Tikhan ka chhang maiin ka hria.

S P E A K E R : Aw le, zawhna leh chhanna hun a zo leh ta a. Laying of Papers-ah kan kal ang a. Chief Minister zahawm takin Finance changtu a ni bawk tih kan hriat kha heng “The Government of Mizoram (Transaction of Business) 3rd Amendment Rules, 2019” leh “The Government of Mizoram (Allocation of Business) Rules, 2019” te hi House-ah rawn lay se. I lo sawm ang.

PU ZORAMTHANGA, CHIEF MINISTER : Pu Speaker, i remtihna leh House phalnain House dawhkanah hian heng “The Government of Mizoram (Transaction of Business) 3rd Amendment Rules, 2019” leh “The Government of Mizoram (Allocation of Business) Rules, 2019” te hi ka rawn lay e.

S P E A K E R : A copy kha em ni se. Kan changkim em? Kan chan kim chuan Financial Business-ah kan kal leh tawh ang a. Tunah chuan Minister zahawm tak pahnih Pu R. Lalzirliana leh Pu Lalruatkima-te Demand kan sawiho leh ang a, vawiinah hian pass nghal kan tum leh dawn nia. Tunah Minister zahawm tak Pu R. Lalzirliana'n a Demand No. 23- Art & Culture Department, No. 27- District Council & Minority Affairs Department, Demand No. 33 – Land Resources, Soil & Water Conservation Department leh Demand No. 39 – Power & Electricity Department-te House ngaihtuah tura rawn chhawp chhuak turin kan sawm e.

PU R. LALZIRLIANA, MINISTER : Mr. Speaker Sir, on the recommendation of the Governor of Mizoram and with your permission sir, I move the Demand Nos. 23,27,33 and 39 for ₹ 10,00,61,69,000.00 only for meeting expenses during 2019-2020 in respect of the following demands. Demand 23 – Art & Culture – ₹ 12,57,55,000.00, Demand No. 27-na District Council & Minority Affairs ₹ 4,01,06,87,000/- leh Land Resources, Soil & Water Conservation ₹ 19,58,14,000/- Power & Electricity ₹ 5,67,39,13,000/- , a vaiin ₹ 10,00,61,69,000/-

S P E A K E R : Tunah chuan Minister zahawm tak Pu Lalruatkima a hna chanpual Demand No. 6-na Land Revenue & Settlement, Demand No. 26-na Information & Public Relations Department leh Demand No. 38-na Rural Development Department te House-a ngaihtuah turin, rawn submit turin ka sawm e.

PU LALRUATKIMA, MINISTER : Pu Speaker, Governor of Mizoram recommendation leh i phalnain ka Demand No. 6, 26 leh 38-te a vaiin ₹ 4,53,73,86,000 /- hi kum 2019-2020 chhunga ka department enkawl pathumte hman atan he House zahawm takah hian ka rawn pharh e. Ka department enkawlte chu Demand No. 6-na Land Revenue & Settlement ₹40,84,50,000 /- ; Demand No. 26-na Information & Public Relations ₹ 15,26,37,000 /- ; Demand No. 38-na Rural Development ₹ 3,97,62,99,000 /; a vaiin ₹ 4,53,73,86,000 /- a ni e. Ka lawm e.

S P E A K E R : Aw le, tunah chuan kan Minister zahawm tak pahnih ten an chanvo, hna chanpualte demand an rawn submit ta a, kan

sawihó ang a. Memberte kha minute eng zat nge kan in pek leh ang, minute 10 kha a tha leh mai em? Vawiin chu kan hahdam thei deuh ang chu maw le! Minute 10 ti leh mai ang aw. Aw le, minute 10 kan inpe leh ang a, minute 9-ah warning bell kan inpe ang a. Tichuan, tunge sawi hmasa leh ang le? Pu Lalrinsanga Ralte kan sawm e.

PU LALRINSANGA RALTE : Pu Speaker, ka lawm e. Ka han nghak deuh a, ka hawi kual a, sawi mai tum an awm loh avang hian kan pass nghal mai ang tih ka hlau si a, sawi duh ka nei nual si a, ka sawi hmasa ber mai ang e. Demand No. 39-na Power & Electricity Department hi ka sawi hmasa ber ang a, kan budget pawh 34.87 lai mai in a pung chho a, Power Minister zuan zang tak leh fel tak, biak nuam tak kan nei a, ani ho hian beiseina sang tak kan nei a. Tin, a zin taima a, harsatna hmun khawi khawiah emaw kan han neih leh power-a hma kan lakna te en in ani ho hian kan zin chhuak tawh a ni tih te ka sawi duh a, kan lawm hle a ni tih ka han sawi hmasa duh a ni.

Pu Speaker, Mizoram-in hun rei tak ata tawh kan mamawh, state puitling kum 30 chuang kan ni tawh hnu pawhin power-a intodelh hi kan ti hlei thei tlat lo mai a, kan ram a changkana hma kan sawn tak takna tur chuan power a pawimawh si a, chutiangah chuan tan lak a ngai hlein ka hria a, kan sorkar-ah pawh finance lam atangin duhsakna han pek theih deuh ni se, power-a kan intodelh theihna tura hmalak te leh a awmsa thuam that kawngah pawh hian a tul hlein ka hria a ni.

Transformer hi a spare kan neih a tulin ka hria a, Mizoram chu kan hria a, tlang panga awm kan niin, thli leh ruah avang ten kan bungruate a hlui tawh avangin emaw transformer chhia, kan nei deuh reng thin a, chung han thlak zung zung theihna tur chuan transformer te hi hman mai theiha kan neih a tul hlein ka hria.

Tin, staff indaihlohna a nasa em em mai a, lineman-te hian khaw thum, khaw li-te an vil thin a, staff indaihlohna hi kan puhruk sak a tul hlein ka hria. Tin, kan line hrim hrim pawh hi a hlui tawh viau mai a, Sentlang atanga N.Hlimen 11kv line khu 1994-a thlun a ni tawh a, tun thleng khuan N.Hlimen leh Thingthelh bik khu repair a la ni lo va, hun eng

emaw lai khan Bukpui thleng khu repair a ni tawh a. Chuvang chuan, Bukpui piah atang khuan Thingthelh leh Hlimen lam khu repair a ngai hle, theih pheih se chu Saiphai Sub-Station lam line pawh pheih hi a tha mah mah zawkin kan hria a ni a. Kan buaipui vat loh chuan ruah a sur emaw, thli a thawt deuh hlek hian line fault a siam zel a, current kan thim pheih thup zel a ni tih ka sawi duh a ni. Saiphai-ah khuan Power Sub-Station kan nei a, J.E tal khuan thut se kan duh khawp mai a, M.R. Grade-IV thiamna nei lem lo an awm a. Chuvang chuan Saiphai-a kan Power Sub-Station tharah khuan a bungruate han enkawla buaipui turin J.E min dah sak ngei se, a lawmawm ngawt ang.

Tin, Pu Speaker, department hian ram kan nei thin a, amaherawhchu kan enkawl hlei theih thin lo va, Vairengte-ah khuan mi in luahin chep takin an awm a, an ram neih tha takah khuan department hian office te, quarter te buatsaih theih se tih ka sawi duh bawka ni.

Pu Speaker, Serlui B Hydel Project kan hre vek a, kan House Leader zahawm tak kut chhuak a ni a, kum 10 kalta chung khan enkawl zui a ni ta lo hrim hrim mai a, eng emawah chuan loh theih lohin chei ve zeuh zeuh thin a ni. Amaherawhchu, hmannah kan Power Minister zahawm tak nen a hmunah kan zuk kal a, a thawktute quarter awmna zawng zawng khu a awngrawp deuh vek tawh mai a, luah tlakin a awm tawh mang lo va. Khu khu Mizoram-in kan neih pawimawh tak, mega watt 12 pechhuak theih a ni a. Serlui B Hydel Project-a kan insen hi sorkar hian insenna thlawna a ni lo tih hi kan hriat a tulin ka hria a. A thlabiin nuai za tam tak khu Hydel Project khuan min save sak a ni, state pawn atanga kan current lei luh te a thlabi hian nuai za chuang fe hian min save a ni tih kan hriat a tha a. Chuvang chuan, Serlui B hi kan chei that leh viau a ngai, a hringtu ngei maiin sorkar-na kan han la leh ta a, beiseina sang tak nen kan thlir a, kan Power Minister nena kan sawi dunah pawh khu lai chei thatna leh harsatna kan neih te kan Finance Minister, kan Chief Minister ni bawka hnenah thlen kan tum a, khawngaihtakin ani pawhin min lo ngaihpawimawh sak se, khumi khu kum nga chhunga kan chei that a, kan enkawl tha lo a nih chuan a ram palh mai ang a, tuikhuah awmze neilo kan nei palh mai ang tih a hlauhawm tawh tih ka sawi duh bawka ni.

Pu Speaker, Soil Department-ah hian tawitein han sawi leh ka duh a. Ram leilung hausakna haichhuak a, venghim tura department pawimawh tak, hun hmasa lamah pawh kan ram tana theihtawp lo chhuah tawh thin an ni a. Tunah hian chhanchhuah ngaiin an awm hlein ka hria. Soil Department hi staff indaihlohna a nasa em em a, thawh tur mumal nei lo khawp hian department thi hian a awm lek lek tawhin ka hria a. Chuvangin, Soil department-ah hian ngaihtuahna kan sen viau a ngaiin ka hria. Tin, an thiamna, an finna an hman chhuah theihna turin Engineering Cell te pawh din a, hma chak taka la a, hna thawk thei tura kan siam hi a tul hlein ka hria. SEDP kan kalpui tura kan lehkha dawnah pawh khan Soil Department hian kuhva te, rubber te, hmunphiah te, coffee te SEDP kan kalpuina tura thil pawimawh tak tak an enkawl chho dawn a ni a. Kan Chief Minister-in a sawi fo thin, “Mizoram intodelhna tur chuan rua leh rubber a ni,” a ti a. Chumi department enkawltu an nih avang chuan theihtawp chhuaha he ram tana hna an thawh theihna tur hian Soil Department hi kan enkawl uluk, kan duat deuh a ngai a ni tih ka sawi duh a. Rubber phei chu Mizoramah hian a hlu dawn khawp a. Rubber chungchang hi sawi teuh a chakawm a, mahse hun kan neih dawn loh avangin rubber, Soil Department -in an enkawl chhoh turah hian a khaikhawmnaah chuan thing rangkachak an ti tih ka sawi duh a, rubber chu a hlu hle dawn a ni. Chutiang buaipui thei tur chu an nih avangin Soil Department hi kan duat thiam deuh a ngaiin ka hria. Vanneihthlak tak maiin ka bial chhung khu rubber te, rua te, kuhva te tana hmun tha ber a ni mai a. Sorkar hnathawkin ACR an ziaha excellent, very good, good tihah hian triple excellent ang vel hi ka bial khu a ni a. Chuvangin, bial vannnei tak kan ni. Bilkhawthlir-ah pawh khuan Soil Department ten ram kan nei a. Demonstrator pakhat kan nei a, office leh quarter-te khu a chhe viau tawh mai a. A enkawltu, a buaipuitu tak tak, a hmunthu an nih dawn avangin khungte khu chei that a ngai hlein ka hria a. Tin, Vairengte-ah pawh khuan Assam hun laia sak tawh Soil Department office leh quarter te cheithat an ngai hle tawh a ni tih ka sawi duh bawk a ni.

Pu Speaker, RD Department Demand No. 38-na hi han luh leh lawk ka duh a. Kan hre theuh a, RD Minister changtu awm tak maiin a han chang a. Thingtlang mite tan biak a nuamin a mawng a zang khawp mai a. Harsatna kan thlen nasa thin viau, chungah pawh chuan min lo dawl zo thin khawp mai a, kan lawm hle a ni tih ka sawi duh a.

RD hi keini thingtlang bialtute tan chuan Pu Speaker, an hlu em em mai a. Kan innghahna tak tak an ni. Tunah hian BADP area ni lo te hi kan vanduai hlein ka hria a, budget kan han en hian. BDO leh staff quarter te han sak thatna tur pawh hi BADP area lo tan chuan kan nei mang thin lo a. Chuvangin hun rei tak tawh quarter chhe em em mai, office chhe em em mai an lo nei thin a. Hengte hi kan siam that theihna tur chuan Housing for Project Staff tihah hian pawisa kan dah sak leh ngei ngei a tulin ka hria a. Chutiang a nih loh chuan keini ang Pu Speaker, i bialte, ka bialte angah chuan BDO awm ve si, BDO leh staff quarter, BDO office tha tawh mang lo hi siam that ngaihna a awm lo a ni. Chuvangin, Housing for Project Staff-ah hian pawisa hman theih tur hi kan dah sak leh a tul hlein ka hria.

Pu Speaker, kum hmasa lama awm thin Social Education hnuaiyah pawh pawisa pakhatmah dah a ni lo hi a pawh hlein ka hria a. Helaiyah hian BADP area-a awm te chu vanneihna an nei a, khang atang khan siam theih a ni thin a. Kan bial chu BADP area a ni lo a, Pu Speaker, i bialte nen. Chungah chuan hall te, school te leh assets te kan lo siam ve na tur leh kan lo vauchher ber a ni ve thin a. Chu chu dah a ni ta lo hi pawh hlein ka hria a. Finance Minister zahawm tak pawhin hei hi min hriat sak se a thain ka hria.

Tunah khuan Saiphai hall phei khu chu a chhe nasa khawp mai a. Sound system thum ri dup dup ang chi phei chu fit ila a chim mai ang tih hlauhawm khawp a ni a. Khung sak thatna tur khuan RD Minister hi kan dil ang kan lo ti a, kan lo lawm ve viau mai a. Amaherawhchu, budget-ah hian Social Education-ah pawisa dah a ni lo hi a pawh hlein ka hria a. Hei hi dah sak leh theih dan zawn a tulin ka hria a ni.

Pu Speaker, RD atanga tun hmaa lo awm thin rangva han pawh mai tur awm thin kha tunah hian a awm ta lo va . Kan bialah khuan ka tlin tirh deuh khan inkang 2 kan nei a, Delhi-a orientation-a kan awm lai kha a ni a, kan mangang khawp mai a, tihngaihna kan hre lo a. RD Minister zahawm tak kan han phone a, ani chuan ruahmanna min lo siam sak zung zungin, rangva te min pe thei a. Khangte kha kan neih leh theihna tur hian kan Finance Minister hian ruahmanna min siam sak leh thei se tih ka ngen a ni e. Ka lawm e.

SPEAKER : Dr. F Lalnunmawia, Member zahawm tak ka sawm e.

Dr. F LALNUNMAWIA : Pu Speaker, ka lawm e. Minister zahawm takte pahnih Pu R Lalzirliana leh Pu Ruatkima te demand sawihona hun tha tak kan nei thei hi ka lawm a.

A hmasain Minister zahawm tak Pu R Lalzirliana demand-ah hian tlem azawng han sawi ve ka duh a. Art & Culture lamah hian han sawi ka duh a. Pu Speaker, party ang leh sorkar anga kan flagship ni ta SEDP-ah hian Art & Culture lamp kan ngaipawimawh hle a ni tih kha kan dah a. Zofate inpumkhatna tura kawng hrang hranga hma lak kan tumna kan han dah kha a ni a. Chungah chuan Mizo fate hmun hrang hranga awmte tana cultural meet siam te leh International Mizo Convention a remchan dan anga buatsaih a ni ang tih te kan dah a. Tin, Mizo pi leh pute hmun hlui leh hmunhma humhalh te, Mizo tawng leh hnam nunzia humhim tih te kan han dah pawimawh a ni a. Heng atan hian budget te pawh kan nei turah ka ngai a. Chutih rual chuan Art and Culture-ah hian kan beisei ang chu a ni lo deuh mai thei a. Amaherawhchu, kan Chief Minister Finance changtu hian a tul ang zelin heng atan hian min ngaihtuah sak ang tih kan ringin kan beisei a ni. Art and Culture lam hi Mizo culture humhalha chawikanna tur pawimawh tak a nih avangin sorkar pawh hian a ngai pawimawh ang tih ka ring a ni.

Demand 39-na Power and Electricity hi tlemte han sawi ka duh chu, P&E Department-ah hian kumin chhovah hian Budget nasa taka tihpun a ni a. Power man ba sorkarin a neihte rullh tum a ni tih te kan lo hria a, a lawmawm hlein ka hria a. Tin, kan flagship-a kan dah angin 2030-ah chuan power-a kan intodelh theih nan nasa taka hma lak kan tum thute kan hria a, hemi zawng hian hma kan la niin ka hria a. Heng zawng zawnga ruahmanna siamtu kan C.M. leh Finance Minister zahawm tak chungah P&E Department-a pawisa tam tak dah a nih avang hian lawmthu ka sawi duh a; mipuiten power hnianghnar zawk kan hmuh ngei kan beisei a ni. Tin, power kan neihsa te bakah hydro electricity tuikhuah mek eng emaw zat a awm a, hengte hi chak zawka hnathawh a nih ka beisei a. Tin, heng bakah natural energy leh solar energyte, wind energy te hmanga tangkai zawka hman a nih te pawh ka beisei a. Hengah te hian ZERA te pawh tangkai lehzuala kan hman te pawh ka beisei a ni.

Pu Speaker, ka bial chung hi han ti bik ila, hmun thenkhatah sawn electric ban hlui leh a hrui hlui tawhte, thliin a chhema tluk mai leh chah mai hlauhawm

hmun eng emaw zat a awm a. Sawng te pawh department-ah kan thehltu tawh a, Chamring leh Sialsuk-ah te electric ban mawih, chhum titih tawh te a awm nual tawh a ni. Chungte chu kan Minister zahawm tak min hriat sak atan kan han tarlang ve duh a ni.

Demand No. 26-na, Minister zahawm tak Pu Lalruatkima chan Information & Public Relations hi sawi ka duh a. Han sawi ka duh chu Chanchinbu mi leh media-a thawk te hamthatna chungchangah hian he department hmalakna hi fak ka duh a. Minister zahawm tak duhsaknain Journalist Welfare ngaihtuatu Committee-ah hian ka tel ve a. He Committee hian kan journalist-te hamthatna hrang hrang a ngaihtuah tawh a, a ngaihtuah mek zel bawk a. Chung zingah chuan an health insurance te, vanduinah leh thihna an tawh palh pawha chhawmdawl na ang chi te, journalist-te Zoram pawna an zin chhuaha Mizoram House leh hmun danga an thlena ngaihpawimawh an hlawh theih nana entitlement tha zawk pek te leh kawng hrang hranga duhsakna kha ruahmanna siam a ni. Kumin budget-ah pawh hianin kan journalist leh kan media te tangkai zawka kan chhawmdawl a, anni tan pawh chhenfakawm thei tura sorkarin hma a lak ngei ka beisei a. Heng atana budget-a sum dah a ni te hi a lawmawm hlein ka hria a ni.

Tin, Demand No. 38-na Rural Development Department chungchang hi han sawi uar deuh ka duh chu, R.D. hi thingtlang hmun tam zawka mipui te inngahna a ni a. NREGS kan tih hi thingtlang mipui tam ber ten an nghahfak leh an inngahna a ni. Tahchuan material component a awm thin a, terrace laih tih te, khawtlangin an thlang thin a ni. Helai hian Pu Speaker, tarlan ka duh chu terrace laih turte a zawnin an zawng tawh a, an zawng thin a. Tam takin an lo tui vak lo va, mahse khawtlang anga tih ngei ngei a ngai si a, a guideline-ah. Helai hi tlema a guideline hi relaxation siam deuh hlek a, mite an tui vak lo a nih chuan hnathawh tur dang, khawtlang tana tangkai deuh zawk, vantlang in an hman tangkai theih tur zawnga her rem dan te awm thei sela a tha awm mang e tih ka ngaihtuah a. Ka bialah pawh tunhnaiah terrace laih tur te a zawnin an zawng a, an hmuh mai loh pheih chuan hna han tikhawtlai deuh hlek te pawh a awm a ni. Chuvang chuan, a guideline hi her rem deuh dan te awm se a tha awm mang e tih ka ngaihtuah a ni.

Tin, SPMRM hnuaiah hian material component eng emaw zat a awm thin a. Kum kalta eng emaw zah chhhung khan departmental work-in kan lo kal pui nasa

deuh hlek thin a. Chungah chuan kan han hmuh phak chinah pawh keini bial angh pawh V/C kan neihna khuaah te, kan mi leh sa te inhlawhna duh leh harsa ve te te an ni a. Departmental work-a tih anih khan an hrilhai deuh thin a. Tunah Minister tha tak mai kan nei a, ani hmalaknaah hian kan bialah pawh heng inhlawhna SPMRM hnuuia material component, footpath siam te leh eng eng emaw hnuuia hnathawh tur awm kha V/C te kutah a tam zawk dah a lo ni ta a, kan lawm khawp mai a. Minister tha tak, a ngaihna hria kan nei a, a hmalaknaah hian lawmthu kan sawi duh a. Kan hun lo kal zel turah pawh a khua ami te hnenah hnathawh tur a tam thei ang ber pek ni se tiin Pu Speaker, ka rawt duh bawk a ni. Keini hmun tam zawk, BADP nei lo bialah chuan heng scheme te hi mipuite inhlawhna beisei neih chhun leh nghahfak a ni si a. Hetiang zawng hian ngaihtuahna tam zawk min lo neih sak leh se tih hi kan ngen duh a ni.

A tawp ber nan Pu Speaker, Demand No 6-na Land Revenue & Settlement Department hi tawitea sawi ka duh chu Mizoram-ah ram kan nei diah duah a, ram tam tak chu mimal ta anga awm si, hman tangkai em em loh te a ni. Hetah hian kan SEDP-ah pawh kan dah angin Land Reform te kan kalpui chhoh ka beisei a. Ram awl tam tak hman tangkai lohva awm si te hi kan SEDP hmanga ei leh bar thar chhuah kan tumnaah hian tangkai zawka hman a nih ka beisei a. Chung chu tangkai zawka hma lak a nih theih nan Minister zahawm tak pawh hian ruahmanna a siam ang tih ka ring a. Non reform hmang hian tun term chung hian Mizoram hian nasa takin hma a sawn ang a. Ram nei lote pawhin ram an lo neih phah nan leh nei seng lote pawhin an surrender emaw, tangkai zawka hman sak dan kha ngaihtuah a nih ka beisei a. Kan Minister leh sorkar hian mumal leh awmze nei zawkin hma an la ang tih ka beisei a ni. Chungte chu Pu Speaker, ka sawi theih tawk ni mai rawh se. Ka lawm e.

SPEAKER : Pu Andrew H.Thangliana, member zahawm tak i lo sawm ang.

PU ANDREW H.THANGLIANA : Pu Speaker, ka lawm e. Minister zahawm tak pahnih Pu R.Lalzirlina leh Pu Lalruatkima demand kan sawiho dawn a ni a. Ka lehkhabuah hian eng emaw note te te ka nei a, Pu Lalruatkima chan hi ka han sawi hmasa ang a.

Demand No.6, Land Revenue & Settlement bik hi han sawi dawn ta ila, kumtir lama kan Chief Minister zahawm takin Chapchar Kut lawmnaah khan 'May

thla-ah chuan A.R ram saw kan ta a ni tawh ang' a ti a, kut kan ben hnan kha a ni a. Tunah a lo la ni chiah lo va, engpawh ni se, eng emaw harsatna leh A.R lamte pawh an la inpeih lohna thute pawh kan han dawng ve leh ta tho a. Pu Speaker, sorkar demna lamah min lo ngaihsak lo la, kan ngaihtuah atana ka han sawi duh zawk chu A.R-in an luah mek ramah sawn encroachment anga ngaih theih tur case 50 chuang, LSC-te pawh lo nei, he department ngeiin a pek ni si hi a awma sawi a ni a. Heng thil hian nakinah harsatna min thlen thei ang em aw tih hi ka ngaihtuahnaah a awm deuh a. Ka rilrua thil pahnih lo lang ta chu, pakhatna-ah chuan A.R hian min lo chhuah san tak tak ta se, khang LSC ho kha a rawn inlar chhuah hunah chuan state sorkar hian kan beisei ai hian ram hi kan lo nei mang reng reng lo ang a tihte a ngaihtuah theih a. Pahnihnaah chuan hemi delay nan hian A.R hian encroachment hi ti fel hmasa rawh tiin sorkar hi min phut ta se. (hei hi state dangte pawhin problem an lo face tawh niin ka hria a), harsatna lian pui awm thei min tikhawtlaitu a nih theih ka ring deuh a. Chuvangin hemi chungchangah hian an chhuah hma si hian encroacher awm anga ngaih theihte hi identify-a an chungchang chin fel hmasak hi a finthlak ber lovang maw tih kha ka rawt duh a.

Rural Development chungchangah, kan Chief Minister leh Minister-te remruatna zarah Rural Development hnuaiah Chief Minister Rural Housing Scheme te kan bialahte pawh chhungkaw eng emaw zat tan min ruahman sak ve a, kan lawm hle a, bial aiawhin lawmthu ka sawi ni sela. He scheme sorkar hmasain a lo kalpui hi chhunzawm tlak tak niin ka hria a. Tin, MLA tin te GI sheet/rangva, beneficiaries pakhat tan bundle li zel tiin mahni biala pek tur min han pe te hi a hlu em em kan ti a. Hei aia tam mah hi provision dah theih ni se, thingtlang lamah pheih chuan a hlut zia leh mamawhna a san zia kan hre theuhin ka ring a ni.

Nichinah khan MLA lo ding tawhte khan an sawi a, border area bial nei ve lo tan chuan BADP sum hi kan khawih ve pha meuh lo nachungin, RD hnuai social education kan han sawi, hemi atana civic infrastructure , entirnan public hall kan tih ang chi te, conference hall ang chi te, mipuiten kan intawm theih, tin, Gram Sabha koh khawm nana kan han hman thin te, hetiang tlabal tak tak thawm that ngai khu bial tinah a awmin ka ring a. Heti lamah pawh hian ngaihtuah kan ngai nasa bik hle tih ka rawn tarlang duh a ni.

Minister zahawm tak Pu R.Lalzirliana Demand No.23, Art & Culture bikah hian, wawiin hi a zo thei ang bera inthuum tur kan ti a, kan vai pheichuan kan zawm lem lo a. ZPM lam pawhin kan ngaihpawimawh em em zirna sikul-ah te, office-ah te leh house furnishing ang chi-ahte reng reng Mizo culture leh Mizo zia lang tam thei ang ber leh Mizo siam ngei hman kan han tih thin kha, tuna kan sorkar hian bul min han tan sak thei se ka ti a ni. Kan hnam ziarang pho lan nan leh helama eizawng (Handloom) te tan a chhawrnaawm dawnin ka hria a. Eizawna tam tak kan siam sak thei dawnin ka hria a ni.

Tin, Art & Culture hnuaihan hmanna ka zawh tawh ang khan, Art & Culture hnuaihan Music & Fine Arts awm thin kha min ngaihtuah nawn sak leh sela. Mizo-ten hnah kan han tum thin, tunlai thangtharte chuan an hre meuh tawh lo a, a thiam pawh kan awm tam tawh loin ka ring a. Tuna hnah tum thiam kan han tihte pawh hi thiamna kan inhlan chhawn zel theih nan Music & Fine Arts ang chite kha kan mamawh em emin ka hria a. Tuna a thiamte an awm loh hunah hian Art kan neih ve te hi a ral mai ang tihte ka hlau a. Tin, thil dang tam tak pawh kan aia u zawkte chuan in hriain ka ring a, khatiang ral mai tur te, a chawikan ai mahin thangtharah chuan chawi nun thar leh a ngai niin ka hria a, chu chu ka sawi tel ve leh duh bawka ni.

Demand 39-na Power & Electricity chungchangah, nichin khan Serlui bialtu khan hmar tlang dung lam a rawn sawi a. Thinghelh atang khan a rawn tan a, a dik vek mai a, line inpawh kan ni a. Thinghelh hma lamah khan Bukpui te, North Chaltlang te, Nisapui, Lungmuat tih te, Serkhan, Sentlang-ah sub-station kan nei ve bawka. Sawnglai atang sawn kan harsatna hi a intan tawh zawka, ruah tlem a tlak emaw, a hnawn hlek hian a kar kar hian electric an nei lo a ni ber mai thin a, hei hi an endik tawh thin a, eng vang nge ni ang tihte, material that loh vang tihte a thenin an sawi a, major repair hrim hrim a ngai a ni tihte sawi a awm bawka. Tichuan, khawtlangin hnatlangte neiin thingzarte vangte hi a niang an ti a, thirhrui hnaih thingzar a theih ang anga thlakin clearance te pawh khawtlang angte pawhin an bei nasa tawh thin a. Amaherawhchu, ruah chhete pawh a tlak hlek hian khatiang harsatna kha kan tawka zel mai a, sawlai tlangdung hrim hrim saw a bik taka min ngaihtuah sak turin Power & Electricity Minister ka ngen duh a.

Tin, thil pakhat ka hriat chak mai mai chu kum 2015 atang tawha Power & Electricity Department, corporation a leh tura ngaihtuahna awm kha tun sorkar thar hian khalamah khan ngaihtuahna a siam em tihte kha nakinah wind up-naah min hrilhfiah theih chuan ka lawm ngawt ang, khang zawng kha ni mai rawh se. Ka lawm e.

SPEAKER : Vawiin chu Pu Andrewa te a rawn inchei Zo khawp mai a, Pu Zir, Darkhuang emaw Puanchei emaw pek dan a awm lawm ni le? Pu Duha leh Pu Chama chu telh ve miah suh u. Member zahawm tak Pu L. Thangmawia kan sawm e.

Pu L. THANGMAWIA : Pu Speaker, ka lawm e. Vawiinah hian department pawimawh tak tak demand kan sawiho dawn a, a lawmawm khawpin ka hria a. Pakhat zawk phei chu Mizoram-a Cabinet Minister a zawna term thum chelh chho tur a ni a.

A hnuhnung lam atangin han sawi tan ila. Minister zahawm tak Pu Lalruatkima chan Demand No. 6 Land Revenue & Settlement-ah hian hmannah pawh khan he House zahawm takah zawhna chhanna kan dawng tawh a. Pu Speaker, ka vei ve chu Mizoram-a mimal in ram an neih record pawh kha chhan theih a nih loh thu kan hre tawh a, hei hi a veiawm khawpin ka hria, Land record mumal tak hi ram pum huap hian kan mamawhin ka hria a, hei hi kumin vut vuta a tih theih loh pawhin sum tam tak ngai turte pawh a nih ka ring a, hei hi tih chhoh ni se a thain ka ring a. Tin, VC kutah ramte a awm thin avang khan eng emaw milian leh officer te, an khaw chhunga thil tha lo ti te, lawmthu sawi nana ram inpekte a awm thin a, keimah ngei pawhin chutiang chu ka hria a, khaw hnih khaw thumah. Khang kha record mumal tak a awm loh chuan chhiah chawi miah lovin ram kha anmahni ta a ni si a, an awm dawn tihna a ni a. Chuvangin, khang ang chi zawng zawng, VC- in an lo pek thinte leh thil dang record hi Mizoram pum ang hian mumal taka neih ni se. Sorkarin eng hmasawna kawng pawh ti dawn sela, kan ram duhlai kha 'chumi ram a ni, hei chu ram ruak a ni, hei chu khawtlang ram a ni' tih nghal zung zung theih tur khan. Tunlaih chuan hmanruate pawh a changkang tawh a, chutiang chu Pu Speaker, India rama state lian tak tak khung Karnataka te leh a dang dangte pawhin an nei tawh niin ka hria a, chutiang tur chuan hma lak chhoh hi a thain ka hria a. Chu chuan kan chhiah lo lut pawh nasa takin a tipung ang a. Tin,

mimal ram neih zat pawh kan hre thei ang a, khang atang khan chhiah kha a lo lut tha dawn a ni tih kha ka sawi duh hmasak ni ta sela.

Demand No. 38-na Rural Development hi keini thingtlang lam phei hi chu min khawih deuh bertu hi a ni mai a. Hmanniah he House zahawm taka ka sawi tawh ang khan RD Block hi kan nei tlem khawp mai a, NE state dangte nena teh hian. Tunah hian 26 kan nei mek a, kan state thenawmah keini let deuhthaw neite pawh tam tak an awm a ni. Ka sawi nawn tawh lo mai ang a, hmanni khan ka sawi tawh a, kan thenawm state te RD Block, Community Development Block neih zatte en in, keini pawh hi tihpun a hun tawh lawm ni tih ka rawt a ni. Minister zahawm tak Pu R. Lalziriana chan Power & Electricity, Demand No. 39 -na han sawi zau hlek ka duh bawk a. Ka bial lamah hian power contribution nasa tak awm thei turin hun kal tawh atang khan hmalakna a awm a, a lawmawm khawp mai a. Tunah hian Tuichang Mini Hydel Project 100 kw pe chhuak thei tura hawn theiha peih, commission theih mai tur a ni tawh a, department lam inpeih hun hunah hei hi commission theih a nih hmel a. Chu mai a ni lo va, tunah hian Leiva Mini Hydel Project 4 mega watt pe chhuak thei tur, nuai sangli zakua sawmruk project kha thawh mek a ni bawk a. Nikum February ni 1-a zo tura tih a ni a, amaherawhchu an la zawh hman loh viau avang khan kumin February ni 20 khan keipawhin a hmunah ka va tlawh a, tahchuan physical work 90% zawh a ni tawh a, amaherawhchu a khawl buntu tur NORTECH company- in an la tih theih loh avangin tunah hian hna a chawl ringawt mai a ni. Minister zahawm tak hnenah pawh lekhate leh ka hmuh dante leh theihtawp chhuaha he company pawh min nawr chhunzawm sak tura ngenna ka thehlut a, hma pawh min laksak nghalin ka hria a, a lawmawm khawp mai. Hei hi nawr hmanhmawh theih ni se, kumin kum tawpah emaw, a tlai berah nakum kumthar tirah emaw, khawl an tih chuan a dang tih tur a tam tawh lo a churangin helai hi min hawn hma theih lawm ni, NORTECH company hian a khawl an rawn bun vat theih nan hma lak theih ni se a lawmawm khawp ang a, hei hian mega watt 4 power min pek belh dawn bawk a ni.

Tin, power project, solar plan tur, theuneu lo tak Vankal-ah hian tih mek a ni bawk a. Kan hre theuh ang a, Tuirial-ah hian mega watt 60 pe chhuak thei tura siam a ni a, Serlui hi mega watt 12 a ni a, Vankal-ah khian solar plan mega watt 20 lai pe chhuak thei tur tunah hian buaipui mek a ni a. Minister zahawm tak pawh hi tlawh turte pawhin ka ngen a, ani pawhin remchangah a rawn tlawh dawn ni te pawhin ka

hria a, a lawmawm khawp mai a. Amaherawhchu, hetah hian thil pakhat erawh chu nikum October ni 5 khan department lam leh Vankal khawtlang khan agreement an nei a, chulaiah chuan he House zahawm takah mipuite thlavang hauh paha ka sawi tel duh chu, an agreement No.2 ah – Vankal Solar Park tana sub-station a thawk tur muster roll lak a nih chuan department-in Vankal khua amite sorkarah a recommend ang tih hi a awm a. Keini Vankal lam hi chuan Department leh sorkar pawh hi kan hre hrang mang lo a. Chuvangin hei hi sub-station awm hunah chuan min lo ngaihtuah sak tur pawhin ka ngen ni ta se. Mamawh tam tak hi a la awm ve bawk a. Kawlkulh hi kan buai fo mai a. Hmanniah a line te pawh ka han en a, department official te nen. Hetia electric line kal chho hi Kawlkulh paltlang siin, Kawlkulh atanga lak ni si lovin, Khawzawl-ah a tlang phawt a. Chuta tang chuan Ngopa lamah te, Champhai lamah te a kal a, Khawzawl atangin line te a lak let leh a ni a. Chu chu a hlui tawh avangin a chhe reng mai a. Kum tin hian a buaithlak a. Chuvang chuan helai hi Pu Speaker, a theih chuan department lam te pawhin, hemi line lian hi Kawlkulha lo lak a nih ve theihna tur emaw, Khawzawl atanga line te lakna hi tihthat dan emaw, khalai kha min zawnpui thei se a tha khawpin ka hria a. Tin, Control Room te pawh hi a chhe khawp mai a, khingte pawh khi siamthat ngai tak a ni a. Tin, alternative dang awm leh thei bawk chu, tunah hian revamping of 11 KV line, Pawlrang to Lamzawl Peng km 13, nuai sawmpasarih leh sing ruk leh sang ruk leh zakua sawmthum tur hi, April thla khan khilam SDO ten department-ah an thehthla a. Hemi hi tih theih a nih chuan Kawlkulh lam hi Ngopa thlenga line lian kal kha a pe let ve leh thei dawn bawk a. Khami alternative pawh kha a awm theih nan nuai 17 chuang hret man pawh hi min tih hlawhtlin sak chho thei se a duhawm khawp mai. Sawi tur chu a la tam khawp a, mahse khami chin kha ka sawi theih ni phawt mai rawh se. Ka lawm e, Pu Speaker.

SPEAKER : Dr. B.D. Chakma i lo sawm ang.

PU B.D. CHAKMA : Pu Speaker, ka lawm e. A hmasain Demand No.38, Rural Development chungchang kha ka sawi duh a. A hmasain Minister chak tak, fel tak RD Minister kan nei hi a lawmawm ka ti a. Term hmasa pawh khan Best Parliamentarian Award dawngtu zingah pawh amah hi telh a ni a. Pu Speaker, engpawh ni se, a hmasain Chief Minister Rural Housing Scheme hnuaiah grant, Minister hmasa berte zingah amah hi a ni a, Pu Speaker. Chuvangin RD Minister chungah lawmthu ka sawi duh a ni. Chumi rual rualin ka ngenna pakhat chu, ka bial

hi bial 40 zingah bial zau ber a ni a. Khua pawh a tam lutuk a, 83 ka nei a. Chuvangin, beneficiaries hranpa ang hi kg 1 buhfai mi 15 in ei ang chiah an ni a, Pu Speaker. Chuvangin, Chief Minister Rural Housing Scheme hnuaiah tlem chu khawngaihmin min dah belh thei se tih ka ngen duh a ni .

Tin, PMAY Housing chungchangah pawh RD Block dangah chuan kan hre lo a, a bikin ka bialah hian RD Block pakhat chauh a awm a. PMAY hnuaia selection tih dan hi tun thlengin ka hre ngai lo a ni . Chuvangin haphazard way, a seriala kal miah lovin, a duh duhin an pawt chhuak thin a. Chuvangin duplicacy pawh a tam si a. Dawng thei lo, dawng tlak lo pawh a dawng turte list ah tam tak an awm thin a ni . Kha kha chu uluk lehzualin en ngaiin ka hria a. Hun lo kal zelah bialtu MLA pawh hi khami Committee-ah khan rawn tel thei se ka duh a ni. Tun thlengin bialtu MLA hi an rawn ngai lo a ni , block lam atangin. Chuvangin, hei hi chu engtin nge an tih dawn kan hre lo a. Tunge select tu ber pawh hi kan hre lo a. PMAY select danah hian Gram Sava meeting neiin VC te chuan an sawiho thin a ni a. Chhungkua zawng zawng te ko khawmin, chutiang chu tun thlengin ka hmu ngai lo a. Chuvangin, hun lo kal zelah pawh MLA te hi min rawn ve thei se, tanpuina dawng tur select dan chungchangah pawh a lawmawm hle ang.

Tin, BADP chungchangah pawh hman atangin, kum 2011 atangin ADC hotute lam atangin central lam pawh kan dawr nasa tawh a. BADP, ADC pathum huam chhungah RD Block nei zawng zawng kha, BADP huam chhungah fund allotment te chu direct-in ADC kutah hian dah thei se tih kan ngen nasa. Central pawh kan dawr nasa tawh a, khiti lam atang pawhin lehkha pawh an rawn thawn let a ni. Tin, heta tangin central RD Ministry-ah an thawn leh thin a. Chutiang zelin, ball hi come and go angin tun thlengin a la awm si a. Chuvangin kha pawh kha khawngaihmin Minister chak tak, Minister fel takin min hriat sak se ka duh a ni. Tin, BADP implementation lam pawh CAG Report-ah pawh kan chhiar a. Uluok lehzualin ka chhiar thin a, irregularities tam tak a awm a. Implementation a that lohna chhan pakhat chu lack of sufficient man power tiin a lang chiah a. Hmanah session hmasaah pawh khan ka sawi tawh a, tun session ah pawh ka sawi leh a ni. RD Block hi tuna awm sa hi 26 a ni a, 26 atangin tihpun theih dan hi awm thei se. State dangah te chuan state te te zingah te pawh 40-50 bawr vel an neih lain keini chuan 26 chauh kan nei hi a tlem deuh a ni. Hei hi chu ngaihtuah thei se a tha ka ti a.

Tin, I&PR chungchangah pawh tlem, suggestion pakhat ka pek duh chu information, sorkar kal dan leh tih dan kha chu member tinah, hmanah Minister ka nih lai, ka MOS lain kar khatah vawi khat chu I&PR lam atangin Weekly Bulletin hi a lo chhuak thin a. Kha kha MLA tinah sem chhuak thei se. Zawnah tam zawk hi Question Hour-ah pawh a ziaawm ang tih ka sawi duh a ni. Chuvangin Pu Speaker, hei pawh hi min ngaihtuah sak thei se. Weekly Bulletin hi MLA zahawm tak takte hnenah kar tin I&PR lam atangin sem theih ni se tih ka rawt duh a ni.

Tin, Land Revenue Demand No.6, Land Revenue chungchangah thil lawmawm pakhat chu budget estimate hi an tipung nasa a, lawmawm ka ti hle a. Chumi rual rualin suggestion pakhat chu, thu thar daih a nia Pu Speaker, Assam Rifles ram hi a ruak dawnin ka hria a, free land tam tak a awm dawn a. Tin, mimal zingah pawh an sem dawnin a lang a. Chuvangin ka ngen duh pakhat chu thingtlang lam atangin kan MLA tling thin zingah house site nei lo tam tak kan awm thin a. Chuvangin Assam Rifles hmunah mipuite nen, khang MLA te, Legislators tana house site, free ni lovin, as per the government existing rate-in min pe thei se kan lawm ngawt ang. Hun lo kal zelah pawh MLA thingtlang lam atangin an lo kal zel dawn a, inhmun pakhat mah nei lovin an awm dawn a. Pu Speaker, existing market rate, commercial market rate-a lei tur chuan kan rethei hlawm a, sorkar rate talin min pe thei se. Tin, MLA kan nihna angin, hmun ruakah allotment min pe thei se a lawmawm ngawt ang.

Tunah kan Minister chak tak leh senior tak, term hmasa-ah pawh Home leh RD department-te pawh a chang tawh a, P & E ah ka kal phawt ang a. P&E-ah hian Mizoram pum sawi miah lovin ka bial ka sawi lawk duh a. A bik takin Thega, Indo-Bangladesh border area-ah khaw 25 vel kan nei a, heng zinga khaw pali chauh electrified a ni a. Heta lawmthu sawi tur ka neih chu MDC bye-election-a kan kal lain transformer tam tawk an phurh ka hmu a, kha lamah khan chak tawkin hma min lak sak thei se tih ka han ngen duh bawk a. Tin, Chawngte pawh hi kan eng thalo khawp mai a, a bikin Chawngte 'C'-ah a technical mite sawi ang ngeiin current regular taka pek theih loh nachhan chu technical problem an nei an ti a, load shedding hi a awm a ngai a ni an ti a, chuvangin load shedding awm tawh loh nan additional transformer tal hi vuah sak thei se.

Tin, Pu Speaker, District Council & Minority Affairs Department, Demand No 27- hi ka en a, Mizoram sorkar hnuaiia department 44 te zinga department pakhat a ni a. Department dangah chuan hlawh hi 7th Pay hisap-in an pe nasa a, kha kha chu lawmawm ka ti a, mahse chu mi rual rualin ADC pathum ah hian engatinge a tlak hniam le? Kha kha chu khawngaihni DCA minister chak tak hian min sawi fiah sak thei se, nakinah Revised Estimates ah dah thei dan a awm lawm ni tih ka zawt duh a ni a. Tin, a bik takin CADC hi irregularity hi a tam lutuk a, hmanah pawh House zahawm takah hian ka sawi tawh a, lehkha pawh ka pe lut tawh a Assembly property angin, kha kha min en sak thei se. Appointment, pay upgradation hi back date-in financial benefit hi an pe nasa lutuk a, kha pawh kha uluk deuhin min en sak thei se ka lawm hle ang.

Pu Speaker, Art & Culture Department chungchangah hian tlemte sawi ka duh a. Rawtna thar pakhat state dangah hian social festival hmang tur hian sorkar-ah fund a awm thin a. Mizoram-ah hnam hrang hrang, community hrang hrang kan nei a, hemi bikah hian entirnan Mizo-ah chuan Chapchar Kut te an hmang thin a, Chakma-ah Biju an hmang a, Bru zingah Boisu an hmang a. Community festival hmang turin budget-ah hian fund hi awm thei se a lawmawm khawp ang. Pu Speaker, hun min pek avangin ka lawm e.

SPEAKER : Tunge sawi leh ang le ? Member zahawm tak Dr. Vanlaltanpuia kan sawm e.

Dr. VANLALTANPUIA : Pu Speaker, ka lawm e. Kan Minister zahawm tak te demand an pharh hi lawmawm ka ti a. Demand No. 23- Art & Culture hi han sawi tha ka ti a. Hei hi kan Minister-in hneh takin a chang a, hetah hian sawi chak deuh deuh ka nei a. Ka thahnemngaihna thil leh kan hmasawna tur thil nia ka hriatte ka han tarlang ve zawk ang a.

Kan hnam kalphung hi a lo zalen ta viau a lo ni mai thei a. Kan tih dan phungte leh kan value system, kan ngaihhlut zawngte hi a danglam ta khawp mai a. Advertisement leh thil han fak reng rengah hian zalen lampang leh peaceful lampang thil hi kan dah tawh a. Keini kan naupan lai deuh pawha kan tih ve thin, entirnan thingtlang naupangin huaisen inzirtir nan thingthunung kan indah hlat siak a, zanah thlanmualah te kan han dah thin hian hlutna deuh a nei a. Hemi ka han sawi duhna chu kan culture, kan nun

ziarante hi phawrh nawn leh a ngai viauin ka hria a. Tunah hian kan ramri te humhalh a ngai a, huaisenna kan lan tir-te a ngai a, mahse dik tak chuan politics avang leh kan NGO thenkhatte avanga ramri kan humhalh tih loh hi chu ramri tana thih ngam thalaite hi kan tlem tawh a ni Pu Speaker. Chuvangin kan hnam hi kan inennawn a ngai a, chu chu kan thil tih/event kan organize hrim hrim ah hian a lang a. Banner kan tar ah te hian nula hmelta lam deuh hlir, lam delh delh leh nula/tlangval inchhai deuh hlir hi Pu Speaker, a ni tawh a nia !

Khing Nagaland-ah te an tradition-a tha deuh chu an war cry, ral beihnaa an authawm ang chi te vawiin thlengin an hnam lam hmunnawm ber a ni ta a ni. Keini chu Chheihlam/inchhai delh delh hlir hi a ni tawh a, huaisen inzirtirna tak tak, kan naupan lai game pawimawh tak kha chu, thingthu kan indah siak a, ramhnuaiyah a dah thui thui kan ti thin a ni. Chuvangin, hetiang lamah hian kan thanharh a ngaiin ka hria a. N.T. Rama Rao, Telegu Desam Party dintu khan Telegu-a harh tharna kha nasa deuhin Arunachal Pradesh-ah hian kan kalpui tawh a. Chuvangin kan politics-ah hian thil ngai deuh nia ka hriat chu, Mizo kan traditional value zing ami, huaisen inzirtirna te, tlawmngaih inzirtirna te, aia upa zahna te, Zawlbuk kan nei tawh si lo va. Heng lampangah hian kan Art & Culture changtupa hian tan rawn la se ka duh khawp mai, amah pawh he thil-hi mimal takin ka sawi pui tawh a. Hei hi ram pum huapah han tarlan a tul ve hrim hrimin ka hria a, kan hnama harhtharna, kan House zahawm takah hian tawng humhalhna te pawh hi a ngai khawp mai a, Deputy Speaker pawhin a sawi tawh a. Keini saptawng thiam lo ber te hi saptawng word lam zing zing kan lo ni te hian kan tawng hi humhalh a ngai ta hle a ni tih a lantir in ka hria a. Chuvang chuan Mizo hnama harh tharnaah hian tan i han la hret teh ang u tih hi tun Ministry-ah hian ka sawi duh a ni. Chung zing ah chuan min thlahtu te chhui leh an sulhnu chhui ah hian tan kan lak a ngaiin ka hria a, SEDP-ah pawh hian an ziaak a. Chung zingah chuan Lunglei North ah hian thil hlu deuh deuh mai a awm a, entirnan chauh ka pe duh a. Pasaltha Chawngbawla thlan kan nei a. Pu B. Lalthangliana, kan historian ropui ber te zing ami hian Pasaltha Chawngbawla hi a complete berte zing ami Vana Pa nen hian a ti a. A chhan chu ral rel a thiam a, sa hrang hmaah an zam ngai lo, sahrang hmaa huaisen a ni a, tlawmngai a ni bawk a. Chungah chuan ral rel thiam hi a rawn dah

sang khawp mai a, kan pasaltha in chhui bingna a neih ah khan. Chawngbawla pawh hi Mizo in pasaltha kan neih zinga ral rel thiam complete tak pasaltha a ni a. Hengte hi an thlan kan nei a, a cheina te hi min duhsak ka duh hle a, thil hlu deuh deuh mai Chhipphir Lal fapa vai lian pahnihna, Tarmita/Shakespear- an a rawn chhoh a man a rawn tum ngawt mai Lalnu Ropuiliani hi tlawm ngai lo kan ti thin a. Hetiang deuh chiah hi chhipphir Lal fapa Rolura Sailo fapa Vansanga an manna thing hi ka bial Kanhmun South-ah sawn a la awm reng a. Chungte chu humhalh tha hlein ka hria a. Nula hmeltha Chawngvungi han tih te, Serkawnah hian Zosap ho/missionary ho sulhnu thil hlu tak tak te, Darkhuang tlang, Pu Darphawkan Mizoram tana hmathlirna a lo neihna hmun te kan nei a. Hengte hi min humhalh sak a, min ngaihhlut pui ka duh a, Art & Culture lam atang khan ka sawi duh a.

A dawt lelah chuan demand hi ka sawi hman lo ang tih ka hlau si a, ka ngaihpaawimawh zual pakhat demand parukna – Pu Ruatkima chan Land & Revenue Department lamah hian sawi duh ka nei a. Kan ramah hian ram tan sorkar hmun anga kan lo neih tawh, mumal taka kan hman si loh, Pu Sawmzuala tawngkam han hawh lawk ila, ‘ram tan’ tih hi kan ngah em em mai a, hemi hi chhanchhuah ngaiin ka hria a ni. Chuvang chuan Land Reforms tam tak hi lak a ngaiin ka hria kan ramah hian, chungte chu ka thawh duh a. Land ceiling, mi pakhatin ram an neih theih zat te hi bithliah a ngai khawpin ka hria a, mi pakhatin LSC an ngah lutuk thin a, mi hausa ten ram enkawl sen loh an ngah lutuk thin a, hengte hi awmze nei deuh hleka progressive kan tih deuh ten la a, enkawl loh hi chu to deuh talh mai sela, a enkawl theih chin chauh kha la sela, hetiang deuh a nih loh chuan mihausain ram an ngah lutuk a, mirethei kan chep lutuk a, hei hi kan ram leilung enkawl naah hian a ngai tak zetin ka hria a ni. Chu chu khawngaih takin Ministerin min lo hriatpui se ka duh a.

Tin, he House zahawm takah hian ka sawi nawn fo thin a, ka han sawi leh teh ang, zah pawh ka zak lek lek tawh a, Pukpui- ah sawn sipai hmun hi 1986-ah sipai brigade khan ‘Pu Laldenga khua’ ti khan an thut hmuk mai a, Brigade ropui tak an thu a, 1986 inremna atangin an chhuak a, waviin thlengin re- settlement a awm thei lo hi chu a mak ka ti a ni. File kan keu a, record a lo chhe em em mai bawk a. Directorate ah pawh land record a chhe lutuk a, ka han en hian mak ka ti em em mai a, milian thenkhat ten LSC te an lo nei a, a khaw neitu, an in leh lo hal sak a, nu- nau nena tlanhhuak te hian re-settlement tun thlenga an la nei lo te hi a mak ka ti a. Ka

hriat chinah hemi rambuai atana survey te pawh hi vawikhat mah neih a la ni lo va, hei hi khawngaih takin kan official te pawhin min hriatpui se ka duh a. Kan Minister pawhin min en sak se ka duh hle a ni.

A dawt lehah chuan Demand No 38 na Rural Development ah hian a sawi tawh ten an sawi ang khan Miaoram ah hian. RD Block hi kan lo nei tlem em em mai a. Thenawm state te ho chuan a rules en hian 112 an nei a, Nagaland in 74 an nei a, Meghalaya in 76 an nei a, Manipur hian 33, Tripura in 58 an nei a ni, Mizoram in 26 chiah kan nei a, chuvang chuan development works tam tak hi RD Block mil te a sanction a nih thin avangin tan la deuh tur leh RD Block te pawh hi ti tam deuh turin ka duh a, kan development works te pawh hi kal chak tir deuh turin ka duh a, a tha khawpin ka ring a. Minister hian min lo chhinchhiah sak se ka duh a ni.

Information & Public Relations Demand 26 na hian, sawi a hlawh lo viau dawn a, kei pawh ka hre tam lutuk lo na a, he department hi AIR, All India Radio kan tih te leh photography kan tih te a lo keng tel tih te ka hmu chauh a. Thalai te tunlaih photography-ah an tui nasa a, hei hi mumal deuh hleka tiha eizawna tlaka kan photography tui te tan hian kawng zawn a tha awm mang e ka ti a. All India Radio channel hi tihpun a, thenkhat hi chu entirnan hriselna channel FM kan tih te a tha khawp mai a, tlema helamah hian tan lak a ngaiin ka hria a. Manila khawpuihah ka han kal a, channel kha an lo ngah em em mai a, keini ramah khan pakhat emaw chauh kha kan lo nei a, a zahthlak ang reng a. Hna zawnglai te tana tan lak a, hna zawna tur channel tih te, hriselna atan te, zunthlum vei ten rang taka an hriat theih tur ang chi channel tam zawk te hi I&PR lam te hian tan han la se ka duh a.

A tawp ber ah chuan P&E hi ka sawi hman dawn lo va, ka inbuatsaih nual lehngal a, Demand 39-na ah khan Serlui Hydel Project hi tan lak a ngai khawpin ka hria a. Kan state in power kan tharchhuah tamna ber niin ka hria a, Englaipawhin Mega Watt 8 kan lo siamchhuak a ni a. Vawiin thlengin commission loh a la ni a, rang taka commission a thain ka hria a, kan Minister pawhin min chhinchhiah sak se. Khulai hmuna thil tul ang zawng zawng quarters te, a enkawltu tur te pawh tihchak a thain ka hria a ni.

Tin, Lunglei-a Khawiva Mini Hydel Project hi a pawn tawh lutuk a, Mega Watt 4 thar thei tur a ni a. A tui kha a pawn tawh lutuk a, silt

deposit tam lutuk te hi min lak chhuah sakin project te hi min siam sak se ka duh hle mai tih kha hmanhmawh takin ka sawi duh a ni e.

S P E A K E R : Member zahawm tak Pu Zothantluanga i lo sawm ang.

PU ZOTHANTLUANGA : Ka lawm e, Pu Speaker. Demand No.33-na Land Resources, Soil & Water Conservation-ah hian. Rubber hi Mizoramah hian a tha duh khawp mai a, a tlang sang ni lo boruak lum laiah hian a tha thei deuh vek a. Kan state thenawm Assam leh Tripura ah te khuan an lo ti hmasa tawh a, Tripurah-ah pheih chuan mirethei leh harsa ten eizawn nan an hman ber pakhat a ni tawh a. Serlui bialtuin a sawi ang khan a hlawk a, mirethei ten rangkachak kung an tih ang deuh khawp khan an lo hmang tawh a. Kung sangkhat kan neih chuan officer pakhat nei ang kan ni an ti thin a ni Tripur-ah khuan. Tunah khawthlang lamah te, Serzawl lamah te leh Tuirial kam hrang hrangah te an ching ve a, a lo tha khawp mai a. Serzawl ramah khuan mi enge maw zatin an hnai tawh a ni. Tin, Kanhmun ramah khuan chhungkaw eng emaw zatin an hnai mek bawk a. Kei pawh a hmingin enge maw zat ka nei ve a, a buaithlakna ber chu a chi kan lakna hi Tripura atangin kan la a. NLUP ah khan sem a ni tawh a, mahse a chi dik leh diklo hre lovin an sem thin a, a timing a dik a ngai a. Rubber hi bud vek a ni a, a kung chhe zawk atangin a kung tha RRIM 600 mother tree atangin an bud a, chuta tanga lo chhuak chu Tripura leh Assam amite leh khawthlang ami tam ber kan chin chu a ni. Tichuan an han bud a, a lo chawr chho va , ft.3 vel a nih khan phun tur a ni. Rubber phun hi inbuatsaih ngai a ni a, lo kan vat a, kan hal a, a khur tur te kan lo lai lawk a. Rubber Board of India Kolasib-ah khuan Office neiin an awm a. An duh dan ber chu ft. 15 kar dana phun tur a ni a, a aia zau zawk phun kha an duh dan ber chu a ni. Amaherawhchu, Mizoramah hian fur ah hian hnim hi a thang chak si a, a kar a hlat khan tha a heh em em a ni. Tripura-ah khuan kan hmuh tam ber chu zing te te ah an ching a chu chuan hnim a zap chhia a, tichuan reilote ah thlawh vak ngai lovin an awm thin a. Keini a la hre vak lo te khan Rubber Board duh dana kan kal avang hian harsatna kan tawk a ni. Kan phunna kar chu a zau va, a hnai pawh a tam ang, amaerawhchu mirethei tan chuan labour ngai reng a nihna lai hi a buaithlakna chu a ni.

Tin, kan sorkar pawhin SEDP-ah hma lak a tum niin a lang a, NLUP an tih hunlai kha chuan a chi kha September-ah te, October-ah te an sem thin a ni. A phun a hun tawh lo va, an dah tha a, a kum leh May, June vela phun tur kha a ni si a. An dahthat kha a lo thang sei lutuk a, ft.7 vel te a lo tling a, khami phun kha a harsa tawh em em a ni. A zung a lut tha thei lo va, support siam a ngai a, thli a ngam lo bawk a ni. Tin, rubber hi tang nei, hnah chhah deuh mai, rit duh deuh mai a ni a. Amah hi thing ram deuh a lo ni bawk si a, furah hian a tliakin a tlu duh lai tak hi farmers te kan buaina chu a ni. Chuvangin a phun hun dik tak ft. 3 vela phun a, support ngai lo va a than len kha a tha ber a, chu chu ka sawi duh a ni. Nakinah chuan rubber-ah investment tha tak kan nei chho dawn niin a hriat ni.

Tin, kuhva hi Mizo te tan eizawna pawimawh tak mai niin ka hria a. Khawthlang lam Hachhek tlang dungah khuan kuhva a tha duh deuh vek a, tunah khuan mi tam takin an ching a, an harvest tawh a ni. Kum tinin an income a lo pung zel a. Zawlnuam ruam a phai chinah hian an kitin an lo paih tawh thin a ni, a phai zawlah khuan a variety thliar hran a, tin, tlang dunga phun tur a variety te kha department te hian in han hriathran a, kan farmers te hnena a phun tur a chi dik kha kan kawhhmuh theih chuan, Mizoramah hian sorkar sum emaw, sorkar hnate zawng lo va mahni intodelhna tur kawng a inhawngin ka hria a ni. Pu Speaker, hun a tawi si a, Demand sawi tur hi a tam bawk si a, ka kal leh phawt mai ang a. Land Revenue & Settlement Department-ah hian sawi tur tam tak a awm bawkin ka hria a. Nichinah kan thianten an sawi tawh a, ram buai hi a tam em em mai a, LSC leh periodic inthuah te, periodic leh VC pass inthuah te, intibuaite kan tam. Heng hi chin fel thuai thuai ni se a tha ngawtin ka ring a. Tin, thingtlanga miretheite hian ram hi VC pass angin kan insem a, chu chu kan mamawh leh kan harsat apiangin kan hralh a. Khawpui mihausate ram vek alawm kan ti hi a dik nachen a awm a. Khawpui amiten an duh hrim hrim vang pawh a ni lo va, thingtlang amiten kan mamawh avanga kan hralh a ni zawk a.

Chuvang chuan Pu Speaker, revenue (sum) kan mamawh tho tho bawk si a, kan ramte hi identify ni se la, valid pass insiam ila, chhiah pe vek mai ila, tichuan sorkar-in sum tam tak a hmu bawk ang a, kan ram neih chungchangah harsatna kan nei lo bawk ang tih ka rawt duh a. Chumi a nih loh chuan khawpui mite hnena ram

hralh lote pawh hian ram zau tak tak an nei a, an kawka a, engmah chhiah an chawi lo va, eng atan maha hman tangkai an tum lo bawka a. Chutiang ram pawh chu tam tak a awm a. Chuvang chuan settlement siam a, valid pass siam a, chumi hmanga sum leh pai kan hmuh hi a thain ka hria a. Pu Speaker, a laklawh lutuk, tuma tan dinna hun a awm tawh lo. (SPEAKER : Nidangah kan rei thei lutuk a)

A nih chuan ka bul ami hi Serlui bialtu a ni a Serlui hi a ngai pawimawh khawp a, kan Serlui reng mai a ni keini hi chu. Serlui hi kan ram ta, kan sorkar ta a ni a. Thil thate hi tu tih pawh ni se kan ram tan a that hi chuan chhunzawm zel ila, duat ila a that tehlu nen Serlui Hydel Project-ah pawh power kan generate reng a, kan hawng duh lo va, kan hawng theilo nge tih chu thu dang ni se. Vawinah hian tuma tan pawh ni lo, kan thar chhuah ang ang kan ta liau liau, pawisa kan chawi pawh ngailo a nih avang hian Pu Speaker, a enkawlina chungchangah te, power tam zawk kan thar chhuah theihna tur, kan generate theihna tur atan te pawh a maintenance ti tha a, quarter leh thil dangte pawh han tih that zel chu a tha khawp mai. Information leh Power tihte ka sawi hman tawh lo a ni e. Ka lawm e.

SPEAKER : Sawi leh rawh u. Pel hret mah ila nizan kha kan rei deuh a. Han sawi leh rawh u, 10 mins hun ka pe tho ang che u. Pu V.L. Zaithanzama.

PU V.L. ZAITHANZAMA : Pu Speaker, ka lawm e. Demand No. 6-na, Land Revenue & Settlement Department hi ka han sawi hmasa ang e.

Revenue Department hi ka lo hriat danin thawktu an indaihlo hle niin ka lo hria a. Chhiah chi hrang hrang an khawn nasa em em mai a, Zoram chhiah thlengin a hmuna khawnte a lo ngai a. Hengah hian thawktu an mamawh tam hle mai a, chhiah khawn hna hi outsource ni thei se. Pawl entirnan YMA-te emaw thleng hian percent eng emaw hlawh ve tur hian ti ta ila chhiah hi kan khawn thain sorkar revenue pawh hi a pung zawk ang em aw tih ngaihdante ka nei a, chu chu ka sawi duh a.

Tin, ka rilrua awm pakhat chu ka information dawn hi a dik chuan Recruitment Rules hi ennawn a tul hle niin ka lo hria a. Joint Director thleng hian seniority-a luh mai theih ni awmin ka lo hria a. Hei hi tak tak a nih chuan kan Minister hian min lo en sak se ka duh hle mai a. Entirnan, Surveyor basic training zo chauha lutte Joint Director thlenga an kai zel mai chuan a department hian harsatna

nakinah a la tawh thei dawnin ka hria a. Direct-a Group-A a mithiam luh theihna dante hi awm se a va tha em tih ka sawi tel duh a ni.

Tin, New Capital Complex-ah khuan District Revenue Office hi 2017 atang daih tawh khan hawn tan a ni tawh a. Vawiin thleng hian chowkider an la nei lo niin ka lo hria a. Hei hi a fuh zan lo, sorkar hian a rang lamin ngahtuah sak thei se ka ti a. Tin, in hmun dil dawna a form office atanga lei mai lo va Minister atanga an la thin hi kum 4/5 zet kan lo practice tawh niin ka hria a. Hei hi tunah chuan kan Minister tan pawh hian a buaithlak mai mai lawm ni? An dil kha an hmu ngei dawn tihna pawh a ni lo va. A dilna form chu Revenue Office atanga lak ve mai kha a va tha ve tiin ngaihndan ka nei a, chu chu ka sawi duh bawk a.

Tin, Aizawl khawpui dai vel hi mimal ram hian a khat deuh vek mai a, mimal ram deuh vek a ni. Amaherawhchu, chhawr tak tak si loh, in sa chuang si lo hi a tam zawk kan ni a. Nichina ka hmaa MLA zahawm tak Dr. Vanlaltanpuia sawi ang khan (SPEAKER : Dar khat a ri a, zo lawk law law mai rawh se aw. Aw le) hei hi ennawn ngaiin ka hria. Chuvangin MLA zahawm tak Dr. Vanlaltanpuia sawi kha ka thlawp a ni.

Demand No. 39-na, Power & Electricity Department chungchang kha ka sawi ve leh lawk ang a. Tuirial – Bawktlang sub-station, 132 KV Line hi single a ni a. Hei hi a bikin full load-te a'n lak hian chhiat mai hlauhawm tak a ni a. Tin, a chhiat chuan power kha eng emaw chhung chu a generate thei dawn lo va, chuvang chuan line dang thar a rang lama siam hi a va tha ve. Tuirial Mizoramah chuan tuna kan power pe chhuak tam ber a ni a. Chuvang chuan hemi lamah hian ngaihtuahna hman a va tha em tih kha ka rilruah a lo awm deuh a.

Tin, electric chungchang hi ngaihtuah pawh a ngai ve hle mai. Revenue hmuh tur department-in a siam hi tunhma khan a phak lo tlangpui niin ka lo hria a. Dan lova electric pawtru te hi kan han ti hluai a, kan chhunzawm lem lo thin ni hian ka lo hria a Chuvang chuan dan lova electric pawtru hian harsatna tam tak min siam thin avangin helamah hian department hian tan lo la deuh se, tih ka sawi tel duh bawk a ni.

Tin, Distribution Box hi engtiklai mahin kan indaihlo a ni awm e. Box thar duh ang hman tur a awm lo thin a, chuvang chuan electric banah hruih min vet sak

tawp zel mai a. Hei hian power su duk duk te, phe zuk zuk te a siam thin a. Chuvangin distributor box thar hi duh anga hman theih tur awm tur hi tan lak ni thei se, tih kha kan rawt tel duh bawk a ni. Pu Speaker, ni 18th March, 2019-a he House-a ka zawhna Minister-in min chhannaah khan tun dinhmunah Mizoramah hian a tlangpuiin power Mega Watt 8 bawr vel siam chhuak thin ang khan chhanna ka dawng a Kha kha Serlui 'B' atanga kan dawn a ni. A chhanna ka hmuh khan Serlui 'B' kha a ni a. Serlui 'B' khu nichinah khan kan ngaithla tawh a, Mizoram in keimahni thar chhuah ngei a nih avangin kan thar chhuah khu Mizoram ta 100% a nih avangin a pawimawh hle mai a Chuvangin Serlui bialtu MLA zahawm tak Pu Lalrinsanga Ralte rawtna kha ka thlawp duh a. A chei thatna khu a tul em em niin ka hria a, nichina ka sawi Mega Watt 8 ka tih kha Minister zahawm tak Pu Lalziriana hmalaknain kawngte pawh ti thain Mega Watt 12 pe chhuak turin tunah khuan peih tawh niin ka lo hre nghe nghe a. Chuvang chuan kan Minister chungah pawh ka lawm a. Khu khu tha lehzualin sum sen pawh hreh lovin chei teh ang u tiin ka rawn rawt a ni.

Nichina ka rawn sawi Bawktlang - Tuirial kha chu Tuirial project a ni a. Tuirial atangte khu chuan 12% chauh kan chan avangin khutiang ang khu chu ka tui hran lo va. Serlui 'B' Brig. T.Sailo chhul chhuak a nihna angin a lo hmalakna Serlui 'A'/Serlui 'B' ti vel hi ka ngaimawhin tih that a nih theih nan theihtawpa hma la turin ka Minister hi kan ngen a ni e. Ka lawm e. Pu Speaker.

SPEAKER : A lawmawm e. Kan chawl ang a, dar 2 : 00P.M-ah kan chhonzawm leh dawn nia.

RECESS TILL 2 : 00 PM

2:00 PM

SPEAKER : Sawihona kan tan leh ang a, tunge tan ang le? Dr. Z.R. Thiamsanga aw.

Dr. Z.R. THIAM SANGA : Pu Speaker, ka lawm e. Vawiiinah kan Minister zahawm tak pahnih te demand kan sawi dawn a ni a. Demand No.23 na, Art & Culture hi ka sawi hmasa lawk ang a, a changtu kan Minister hi Mizopa tak, kan Minister-ah pawh experience ngah tak mai a ni a. Ani hi pa huaisan, a hmelah pawh Mizopa tak keini ang ve bawk hi a ni a, vawiiin phe chu Art & Culture Department

kan sawiho dawn avangin Mizo inchei takin kan Deputy Chief Whip zahawm tak khan inchei tur a tih avang khan kan rawn inchei a ni a. Pu Speaker, i rawn incheina pawh hi a pui riauin ka hria a, ka la hmuh ngai loh a ni a, i puan rawn bah kha a ropuiin ka hria a. Mizo riauin ka hria a, khang te pawh kha House zahawm tak hi min hrilhfiyah la ka duh a, kan la hmu ngailo a, a ropui riauin ka hria. Khangte kha a hmasain ka sawi duh a. Art & Culture chungchangah hian.

SPEAKER : I zawh laiin, hei hi chu Pu Vuttaia, Sailo Lal puan ngat kha a la nih hi. Kum 140 vela upa a ni.

Dr. Z.R THIAMSANGA : A ropui hle mai, he House pawh hi a ti Mizo a, a ti zahawmin ka hria. Art & Culture chungchangah hian Mizo culture chhunzawm zelnah hian an hnathawh hi a fakawm hlein ka hria. Department-a thawktu te pawh hian tan an la in ka hria a, department lamah te pawh hian lawmthu ka sawi mawlh mawlh ni sela. Chutihruah erawh chuan duh thawh hi a la nasa a, department lampang sorkar pawh hian kan Mizo incheinate hi kar khatah vawikhat tal, Nilaini niin ka hria, ka hriat sual loh chuan Mizo incheia inchei tih ruahmannate kha an siam niin ka hria a. Traditional dress kan ti a, amaherawhchu traditional dress-ah pawh hian engchin nge a huam tih pawh hi media-ah hian an inhnial nasa khawp mai a, hengte pawh hi kan enfiah deuh hlek chu a ngain ka hria .

Thla hmasa khan vanneithlak takin PUC-ah khuan anmahni College senso a an buatsaih, Certificate Course in Mizo Cultural Studies tih function-ah min sawm ve a, ka zuk kal a. A lawmawm khawpin ka hria a, a zawngchhang tlak hlein ka hria. Khutiang mai ni lo khuan Mizoram-ah pawh hian state dangin an tih ang hian Certificate Course mai ni lo, Mizo Cultural Studies Centre te pawh hi din thain ka hria a ni. Champhai-ah te pawh hian min han din sak nghe nghe se tha ka ti a ni. A chhan chu Champhai khi Mizo khua tak, vai sumdawng pawh pakhatmah an awm ngam lohna, tun thlenga an la awm lohna a ni a. Khingah te khian min han din nghe nghe ula a thain ka hria a.

Art & Culture hnuaiyah hian kan sawi duh pakhat chu affiliated NGO enge maw zat an awm a, pakhatna-ah chuan MZI te kan ti a, kan zaimi hote, chulo-ah chuan Mizo Academy of Letters te. Mizo Cultural Organization, MCO te , hengte hian theihtawp chhuahin kan culture, thu leh hla ah te khatiang atan khan nasa takin an bei a. Chuvang chuan anni pual ang te pawh hian Pu Speaker, budget a hranga

han dah te pawh hi a theih ve lawm ni, department-a a hran a dil dil lo hian budget ah hian a hranin enge maw zat chu dah ve theih ni se. Kan culture chungchangah te pawh hian hma kan va sawn awm em tih te ka ngaihtuah a, chu chu ka sawi duh a.

Tin, chulo-ah chuan Power & Electricity chungchangah hian ka sawi leh duh chu, tawi te te in ka sawi ang a, hun a tlem si a. Champhai District han sawi ta ila, keima bial mai ni lo, kan Minister zahawm tak Pu TJ.Lalnuntluanga bialte pawh a ni vek a, district pumpui khi. Kan power lakluh khi 132 KV hruipui Saitual khi kan hmang a, khimi khi a chhe zing khawp mai a. Khawchhak lam power lakluhna a nih avang khian Saitual atanga kan lak a ni a, a hrui khi. Saitual a chhiah hian Pukpui kaltlangin 30 KV level in Lungdar, Khawzawl, Champhai-in power kan lalut thin a. He line hi 132 KV level-a lalut tur hian hma te pawh hi min laksak thei se chuan khawchhak lampang district zawng zawng khian power pawh hi kan hnianghnar ve thei deuh chuan ka ring a. Chuan hei Champhai chu kan hria a, leilet thatna hmun a ni a, Hnahlan Lali phai te, Ngur Zihri phai te, Tuisa phai zawng zawngte khi power nei tha ila chuan buh leh bal te pawh hi vawi khat mai ni lo in, kum khatah vawi hnih vawi thum te kan thar thei ang a, kan ram tan hausakna hnar a ni thei dawn a ni. Chungah chuan power supply khi a tam si lo a, khimi belh chhah nan khian grid power emaw, solar power emaw min ruahman sak thei nise a va lawmawm dawn em, ka ti a ni. Tichuan Champhai ah khian electric bill te pawh hi online te pawh hian pek ve hi kan chak tawh a, online te pawh hian a tih ve theih tawh lo maw tiin kan Minister zahawm tak hi ka ngen duh a ni.

Pathumna-ah chuan Aizawl-ah hian kan street light hi a eng lo lutuk a, zanah pawh hian kan him lo ta deuhin ka hria a. Eng a that hian misual te pawh hi an ngampa lo a AMC hnuai a ni nge chu ka hre lo va, Aizawl khawpui street light hi hei aia tha hian ruahmanna, a department changtu chu ka hre lo a, AMC nge, khang khan tun ai hian nasa zawkin thuan theih ni se tha in ka hria.

Tin, Kulikawn saw damdawi in pathum a awm a, Police Station leh Fire Station a awm bawk a, power saw kan tha lo khawp mai a. VIP line phei chu a la thleng lo hrim hrim a, saw lai te pawh saw VIP line te pawh hi a thleng ve thei lawm maw ni le tih ka sawi ni se. Kan Minister zahawm tak te pawh hian min lo en sak se. Tin, chuloah in kang ah te hian Electric Department kan han mawhpuh leh ringawt

thin a, electric kalsual alawm maw le kan han ti thin a. Chuvangin kan in leh lo electric fit dan te pawh hi enchian a thain ka hria.

Duh duhin, a thiam lo in, local chher mai mai hian electric wiring te pawh hi kan ti thin niin ka hria a. Hengte pawh hi department lam hian enthat ni se a thain ka hria a. Tin, electric hnathawk kanghlum te pawh an awm leh zeuh thin niin ka hria a. Hmanni lawkah pawh MLA zahawm tak Pu Laltanpuia bialah khan kan hnathawk ngei kha a hnathawhnaah khan a boral niin kan lo hria a. Khangte kha engtin nge kan ngaihtuah aw, inquiry te kan la em ? Khang compensate dan te kha engtin nge? Ram leh hnam tana nunna pe an ni a. Eng ang hian nge hma kan lak tih te pawh kha/ tanpuina te pawh kha hriat a chakawm khawpin ka hria a. Kha kha ka zawt duh bawk a.

Tin, chuloah chuan power supply hi ram pumin kan indaihlo tih kan hria a. Kan hria a Mizoram chuan 20 MW pawh kan tichhuak mang lo niin ka hria a, a sual tampui lo ang chu maw. Kan mamawh hi 120 vel a ni a. Manipur atang te, NEEPCO atang te, Tripura atang te in kan la a ni a. Chuvang chuan khulai Serlui khu nasa fe-a tan kan lak a ngaiin ka hria a. Serlui Hydel Project khu theihtawp kan chhuah a ngai. Power supply-a kan hnianghnar loh chuan kan ram hian hmasawna tak tak kan nei thei lovang. Hmasawn kan duh chuan power lamah hian theihtawp kha an chhuah a ngaiin ka hria.

RD lam hi ka han sawi leh ang a. Kan RD Minister hi fak loh theih loh a ni a, amah hi a in fit bawk a, hna pawh hi a thawk chak a. Thingtlang tan phei chuan RD hi kan innghahna ber a ni. Chhiat that awm se, eng emaw tihpui nikhua awm se, thingtlang chuan 'BDO va hmu rawh u' an ti tawp mai a ni. Kan innghahna chu BDO te hi an ni. Thingtlang V/C te chuan BDO hi an hmu reng mai a ni, sum a tlem si. Chuvang chuan, tunah pawh hian Rural Housing Scheme te kan han sem a, kan sem ti ila hming kha kan thlang tawh a ni. Pawisa pawh hi kan la nei lo ni khan ka hria a. Hengte pawh hi engtin nge ni ang? RD-ah hian sum tam zawk hi tunah khan dah chiah lo mah ila. (Pu Speaker, khawihngaih takin tlem.) hengte pawh hi kan ngaihtuah thain ka hria a ni. Chuloah chuan nichin khan kan sawi tawh a, RD-ah hian hmasawna, block level atang hian, central atang pawh hian development fund hi tam tak a lo kal thin a ni a, block level ang te, block wise ang te in. Chuvangin kan RD Block pawh hi kan tih tam ngei ngei a ngai. Arunachal te pawh kan sawi

tawh a, MLA zahawm tak khan a sawi a, kan chhehvel state ten RD Block an ngah zia te kan hria a. A norm-ah chuan kan pha lovang, official ten in hre zawk daih ang. Amaherawhchu kan ramin hma a sawnna tak tak tur chuan kan ram thingtlangte hi kalna a harsa a, kawngte a lo harsa a. Chungah chuan RD Block te pawh hi hawn belh theih ngei ni se a thain ka hria a. A bik takin Hnahlan te khi hmanah khan hawn tur khan an han ruahman tawh a, a pamtul a. Hnahlan-ah te pawh khian RD Block hi ruahmanna awm tawh sa kha min ti nung ula, min rawn pe ngei ula ka duh khawp mai.

Tichuan, (sawi tur hi a tam si a, hun hi a tlem si a.) BADP chungchang kha tlem ka sawi ang a. A lawmawm khawp mai a, BADP fund te hian thingtlang tan chuan/ a chang thei tu constituency tan chuan a chhenfakawm khawp mai a. Amaherawhchu a funding hi a muang hret thin a. Hengte hi tih chak theih deuh dan te a awm ang em tih te ka zawt duh a. Tin, chuloah chuan Champhai Revenue Office building khi New Champhai-ah khian a awm a ni. A fal khawp mai a, fencing pawh a awm si lo a, chowkidar dah a ni bawk si lo a. Tun hnaiah pawh khan tum hnih ngawt kha an rawk tawh a ni. Chuvang chuan, chowkidar pawh min pe ve thei em tih kha kan Minister zahawm tak hi ka zawt a ni. Pu Speaker, ka lawm e.

S P E A K E R : Member zahawm tak Pu H. Biakzauva i lo sawm ang.

PU H. BIAKZAUVA : Pu Speaker, ka lawm e. Demand No. 27-na District Council & Minority Affairs hi tawitea sawi hmasak ka duh a. DCA changtu Minister zahawm takin demand a rawn pharhah khan ₹ 401,06,87,000.00 a ni a. Khatah khan Autonomous District Council pathumte 7th Pay an lak ve tur hi a tel lo niin a lang a. Chu chu Chief Minister zahawm tak Finance changtu ni bawkin House-ah 7th Pay pek tur chungchang hmanna a sawi kha lawmawm ka ti a. DCA Minister leh Chief Minister chungah lawmthu ka sawi duh a. Hmanniah Deputy Chief Whip zahawm tak Pu Lalrintluanga Sailo-in CADC area-a Mizo subject zirte pawh hi a tha ang a, kan inpumkhat zelna tur atan tih a rawt pawh kha a lawmawm hlein ka hria a. Inpumkhatna tha, inlungualna tha kan neih theihna tura kan DCA Minister pawhin hma la chhonzawm a, chutianga District Council hote hi kan enkawl zui zel hi state sorkar atang pawhin kan tih tur pawimawh tak a niin ka hria a. Chu chu lawmthu ka sawi pahin ka han sawi tel duh a ni.

Hun a tawi avangin Demand No. 33-na Land Resources, Soil & Water Conservation tih kha sawi hmasa ta ila. Tun dinhmun anga thlir chuan he department hi department chak vak lo leh department rawih lam a ang ta hle mai a. Hmun hrang hrangah department-in a thawh ang deuh han thawk thei department dang hi an lo awm chho ve bawk nen duplicity a awm deuh a, chuvang chuan an hnathawh hi a lang chak tawh lo viau niin ka hria. Department pawimawh tak a ni a, kan ngaihthlak tawh angin thil chi hrang hranga kan intodelhna tur hi he department atang hian hma lak thar leh ni se. Sum leh pai pawh hi tam zawk dah a tul hlein ka hria a. Chuti a nih lai chuan sawng Lawngtlai angah te chuan district-a an office te a chhe em em a. Tin, quarter pawh luah tlak mang lohin an awm vek tawh a. Tin, mitthi leh pension te, hna atanga bang an lo awm pawhin, chungte chu fill up zui an ni lo a. Thawktu indaihlo bawk nen, office a chhe bawk nen quarter awm bawk lo nen, an hmalakna hi a tlem deuh niin ka hria. Chuvang chuan he department hi tan lak thar a tul hlein ka hria a ni. Tan kan lak chuan he department atang hian nasa takin intodelhna a awm thei dawn niin ka hria a. Kuhva te pawh kha zing lamah khan Pu Speaker, nangmah atang khan irawn ti na in, tuna Gazette rawn chhuakah hian Soil Department lamah an dah thar deuh niin a lang a. Tin, rubber ang chi te pawh ni se, thil hrang hrang Soil Department-in an take-up theih hi tam tak tunah hian kan tangkaipui tur a awm chho dawn niin ka hria a ni.

Demand no. 39-na P&E-ah khan lut leh ta ila. Electric current tel lo chuan kan khawsa thei tawh lo ni berin a lang a. Chuvangin power-a kan intodelh theihna kawng hi kan dap thuai thuai a pawimawh hlein ka hria. Thenawm state-a kan inngah leh hmun dang atanga power kan leina sum a tam em em mai a, hei hi keimahniin kan thar chhuah ve theih tur tui tha, lui tha kan neihte pawh a awm ve reng a. State kan nihna pawh hi a rei tawh a, kan intodelh theihna tur kawng hi kan dap taw lo deuh niin ka hria. Hemi chungchangah pawh hian tan kan lak thar hle a tulin ka hria.

Tehkhin nan Kaladan Hydrel Project chu kum eng emaw zat Central Water Commission-in a hmunah awmchilhin an bei a, theihtawpin an enfiah a, verification an la a, nasa taka an beih tawh hnuin tunah hian engmah sawi zui a awm leh tawh lo a. Hei hi mega watt 400 aia tam pe chhuak thei tura ngaih a ni si a. Kan hnung lama kan Session-ah khan Governor Speech-ah pawh khan Kaladan Hydrel Project hmalakna tur hi a lang ta lo reng reng a. Hemi ringawt pawh hi hma la puitling ta ila

kan intodelh theihna tur kha a awm thei bawk si a. Chuvangin lui tha kan neihte hmalakna chhonzawm leh loa a han awm thin hi a pawl ka ti a. Engvang nge ni ang aw ka ti a, hei hi kan P&E Minister zahawm tak pawhin min hriat sak se. Kaladan Hydel Project tawp san anga a awm ta mai leh sawi zui awm ta lo hi eng vang nge? Tan lak thar leh a ngai a ni lawm ni tih kha ka han sawi lang duh a ni.

Tin, transformer chungchang hi han sawi leh ta ila Pu Speaker. Transformer hi hmun tinah fur lai, tek tlak tam lai te phei chuan a chhe duh em em mai a. Tunah pawh hian hmannah Lawngtlai Council Veng-ah transformer a chhia a, Aizawl ami rawn phurh an tum a, a phurhna department-in kan nei lo an ti bawk si. Transformer pawh chu a awm thei dawn nge dawn lo a hriat loh. Transformer chungchangah hian hmun hlaa awm ten harsatna kan tawk fo mai a, awm ten. Tehkhin thu ka han sawi mai a ni a. District tinah hian transformer spare awm thei se, Aizawl-ah hmun kilkhawr ber atang pawhin transformer dila kal leh a phurhna mahni intumte pawh ngai dawnin a lang zel ta mai a, a tha lo hlein ka hria. Chuvangin kan District Headquarter-ah hian transformer spare-te hi dah ni thei se, chu chu a chhiat hun apiang khan kha lai viltute khan an pe ang a, a that ka ring khawp mai.

Tin, thingtlang lamah a bik takin power a awm tha lo em em a, line a chhia a, a siamtu an indaihlo a, hnathawktu an tlem hle a ni. A sang lam hi chu hnathawktu hi an tam turah ka ngai a, a hniam lama hnathawktu hi an tlem lutuk avangin harsatna tam tak a awm a. Kan session-te pawh hi current kan nei lo a, live-in kan thlir thei lo an rawn ti a, an rawn phone fo mai a. Hengte pawh hi current hi a daih tawk kan pe chhuak lo nge ni a line a chhia a an en thei lo nge ni? Line chhia hi an sawi fo mai a, a thawktu hi an tlem lutuk niin ka hre deuh a. Chuvang chuan hengah pawh hian enfiah a, dah belh tul ang chi te hi chu MR ang te pawhin indah belh zel hi a tha lawm ni?

Hmanniah ka sawi tawh a, bill siam sual a tam lutuk a, hmun tam takah bill siam that tir zel a ngai deuh mai. Complain loh chuan tam tak kha pek a ngai mai a, complain chuan an lo siam tha leh thei zel bawk a. Hei hi a tihthat dan a awm lawm ni aw ka ti a. Thingtlang lamah bill khawn a nih loh chuan sorkar a hlawk lo a, khawn a nih chuan bill tam tak an hmuh phahin ka hria a. Kal lo in bill lo pe rawh u an ti a, khawi hmunah emaw khan. Pu Speaker, minute hnih/khat chauh, ka laklawh deuh hlek a, ka han dil belh che. An bill an pe thei lo a, chu chu a buaithlak a. Bill

pe turin mi harsa zawk ten aikal an in tir a, an khawn khawm a ₹ 20, ₹ 30 an chawi belh a, bill pe tur an in tir thin a, hei hi a tha lo hle in ka hria a. Hmanniah kan Minister zahawm takin bill pek dan turte pawh a hmuna kal kan tum ang a ti a, a lawmawm hle a ni.

Tin, Rural Development-ah hian Pu Speaker, tawite ka han sawi leh duh lawk chu Demand no. 38-naah, rangva kan sem a, a tangkai khawp mai a. Rangva hi in chung atan tih a ni a, a dawngtu-in a chih loh pawhin in chungah lo chuan hman a rem loh avangin midang talin an chih tho tho a an zawrh pawhin. Chuvangin rangva kan sem hi tui thianglim an inna hmanrua pawh a ni a, thil tangkai tak a ni a. Rangva nei lo, di in chung chih an la tam lutuk a, chuvangin rangva sem hi chhonzawm leh zel a tha khawpin ka hria.

DRDA Office lam leh Block lamah hian staff quarter an indaih lo lutuk a. An hnathawktute hi JE an ni emaw, technical lam Assistant hnathawk MGNREGA hnuaia thawkte pawh hi an awmna hmunah quarter an neih that loh avangin hmunpui lamah insawn an duh zel mai a, an dil reng mai a. Chuvang chuan quarter tha te pawh hi pek an ngai tak zet a. Chuvangin helam hi kan ngaih pawimawh a tha hle dawnin ka hria a ni.

Tin, thingtlang tihmasawntu tur department, a department hming ang chiah hian Rural Development a nih avangin BADP-ah 0-10 chiah phal a ni a, border atanga km 10. Mizoram laili ah hian border ni pha lo ve ve, a lailiah khan mi harsa leh mangang, thingtlangmi chawikan tur tam tak an awm a.

Chuvang chuan 0-10 in a huam theih loh te hi chhawmdawlina R.D. Department atangin an nei ve thei lo em ni? Social education lamah pawh hian nasa taka kan daha hma kan lakpui hi a tul tak zet in ka hria a ni. Pu Speaker, hun min pek belh a ka lawm hle a ni. Sawi tur la tam hle mahsela, ka lawm e.

SPEAKER : Member zahawm tak Pu Vanlalhlana i lo sawm ang.

PU VANLALHLANA : Pu Speaker, ka lawm e, Vawiin hi a nuam ka ti a, a hlimawm pawh ka ti a. Kan nalh hle hlawm mai a, Art & Culture demand sawi ni a ni bawka, nang pawh Pu Speaker, Pu Vuta inthumin, Pu Vuta puan nen i rawn inthum a; nitina i tih dan pawh a ni bik lo ang a, ni chhinchhiah tlak tak a niin ka

hria. I ho hian thlalak te ka rawt hial a ni, member ho zawng hi. Pu Speaker, i thil sem tur kha a ha ve lo te hi chu pe teh suh aw, a pawilo e tiraw?

Vawiin-ah hian Minister chhuanawm tak tak pahnih Pu Zira leh Pu Lalruatkima Demand-te sawi a ni dawn a. Pu Zira Demand hi department 4 a ni a, budget estimate hi nikum atanga kumina a punna a department chan 4 ah hian 24.58% lai a ni a, a pung khawp mai a, Minister pawh hi a chhuanawmin ka hria a. 1998, 4th Assembly-ah khan member kan ni tlang a, a hnua inthlan zawng zawngah ka tla char char a, ani a tling char char a, Party a thlak pawhin a la tling leh zel a, tlukloh rim a nam khawp mai! Pu Speaker, vawiinah a demand kan sawi thei hi a lawmawm khawp mai.

A hmasa berah chuan Art & Culture Department hi ka sawi duh a. Mizo thinlungah hian Mizo culture chawi nungtu Art & Culture hi a tla na a ni. Department lian vak zawng a ni lo e, amaherawh chu a thawm hi a ring a ni. Mizo min ti Mizotu chu kan ti lo vang a, mahse Mizo Mizo anga min lan tirtu chu Art & Culture Department hi a ni. Museum zawng zawng an enkawl a, Library an enkawl te hi hei aia nasa lehzual hian hman tangkai ka chak a. Aizawl leh khawpuiah te hi chuan TV leh thil dang kan en nasa a, thingtlang-ah hi chuan lehkha hi an la chhiar nasa a ni. YMA library-ah lehkhabu te an supply thin a, chung chuan Mizo kan nihna nasa takin a kaihruai a, hei hi hnam dang ten an neih loh keinin kan neih si a ni a. Art & Culture leh YMA tangrualin library an enkawl hi thil hlu lutuk, kan Mizo hnamah hian thil hlu lutuk niin ka hria a ni.

Tin kut te an han buatsaih a, kan Mizona tilang turin lam te leh thil chi hrang hrang infiam dante an han ti lang a, a lawmawm a. Hei hi chhawm nung zelin socio-economic development policy-ah te pawh a lang tho va, a aia lian leh a aia zau deuh zawk International Convention ang deuh hi Aizawl-ah leh hmun remchang dangah neih ka rawt a, khawvela Mizo hnahtlak zawng zawngte kan intawhkhwma, hlim taka kan inunauna leh kan ziarang pho langa tilang leh zual tur hian inhmuhkhawmna te neih a thain ka hria a ni. Tin, Goodwill Ambassador te an ti a, Mizoram atangin kan Mizo hnahtlak chenna ang zawng zawngte pawh tlawh chhuaka kan inunauna leh kan inzawmna tingheta lantir turin khatiang kha hmalakna tur niin ka hria a, chutiang atan chuan Art & Culture Department hi department pawimawh tak a ni tih ka han sawi duh a ni.

A dawt lehah chuan Land Resources & Water Conservation tih hi a hming hi a ropui ka ti em em mai a. Land resources kan han sawi reng reng hian thelret leh kuhva te kan sawi a, land resources a nih chuan lei chung ami zawng zawng water conservation a tel leh nghal a, agriculture, horticulture leh mining zawng zawng te a huam vek a ni. Chuvangin a hming a ropui ang hian sorkar pawh hian heng department-te hi ti phuisui leh zual se, a department te pawh hi plantation ringawt ni lo, coffee leh rubber te ringawt ni lovin a hming ang ngei hian huam zau leh zual leh tichak leh zual turin ruahmanna nei se tih ka duh thu ka rawn tarlang bawk a ni.

A pathumnaah chuan P & E Department-ah hian Budget estimate hi nikum aiin 34.87% -in a sang a. Amaherawhchu a bei-dawnthlak-in ka hria, power chungchang-ah he sorkarah hian beisei tur awmin ka hre lo. Power generation chungchangah tawngkam khat pawh hmuh tur a awm lo va, a awm chhun chu power leina tur atan nuai 30,000 dah a ni tih a ni. Tuikhuah atangin miin popwer an siam a, keini pawh hian kan siam ve thei a ni. Hman deuhah khan Sikkim ah kan kal a, lui pakhat Tista an nei a, Tista1, Tista 2, 3, 4 leh 5 thlengin a chhawngin hydel project an siam a, power an hman sen loh an nei a, Bihar-ah te, Uttaranchal thlengin, Utter Pradesh-ah te, West Bengal-ah te an hralh a, an ram revenue-ah a tling tawh a ni. Chutiang chu kan nei thei a ni.

Sawrkar hmasa atang tawh khan tun sawrkar a lo din thar thleng hian MNF party hian power an ngaihsak loin ka hria a, thildang hi chu an ngaihsak chin pawh a awm ang, amaherawh chu power ah kher kher hi chuan beisei tur an awm lova, an interest hlawl lo in ka hria. 2000 kum khan Bairabi hydel project hun hmasa lama congress party ina Brahmaputra Board investigation an tih tir a kha project report an peih thlap a, 2000 April thla khan chuti laia MNF party-in a siam hnenah khan an hlan a ni. Pawisa a tam em em lai a ni bawk a, harsarna nei lovin Bairabi hydel project kan khuap ang a, power-ah kan hnianghniar ve tawh ang tih kha kan lo beisei a ni. Amaherawh chu pawisa tam em em chung leh power nei tlem em em chung si khan khuah kha an ngai pawimawh ta der lo a ni. Tunah pawh hian power siam chhuah lam chung chang Budget Bu-ah kan hmu lova, Budget Speech-ah kan hmu bawk hek lova, a beidawn thlak a ni. Hun hmasa lama sawrkar hmasa ding khan, Mizoram lui Bairabi, Tuivai, Kolodine, Tuirini leh Mat te agreement a siampui a, amaherawh chu tih puitlin tuma hmalakna pakhatmah a awm lo a ni. Chuvangin Power chungchanga kan mamawh phuhruk tura hmalakna pakhat mah a awmlo hi

thil pawitak, ram leh hnam tan pawha thil pawitak niin ka hria. Hei hi sawrkar hian ngai pawimawhin, tunah hian a la tlai lo ve, pawisa awm ang angte hmang tangkaia power siam chhuah nana hma la turin ka han ngen duh a ni.

Tin, nichinah khan member zahawm tak khan a sawi tawh a, Street light hi ka ngaimawh em em mai a, Aizawl khawpui hi a thim thup mai a, zanah te hi misual tan remchang tak a ni. Chuvangin, street light hi a enkawltu electric department nge AMC ka chiang chiah lo va, inthural leh tangdunin tun ai hian Aizawl khawpui hi street lighta ti eng thei turah ka ngai a. Tin power department-in hma an lakna lawmawm tak mai tih chhonzawm zela ka duh chu, electric hrui plastic coated ka ti mai a, a hming ka hre lo a, a hruipui hi an thlak ta a, mipui tan a him ta deuh a ni. Tunhma chuan thlithaw-ah a in vaw thuai thuai a, a chat a., mihring tan a hlauhawm em em a ni. Aizawl khawpui chung hi an la thlak kimlo a ni mai thei a, Chaltlang Dingdi Veng angah te khian thli a na a, electric hrui aluminium ang te kha hman a la nih avangin a tek chhuai chhuai a, mihring nunna atan a hlauhawm a, min thlak sak turin ka ngen duh bawka ni.

Tin, Pu Ruatkima demand chungchangah Rural Development-ah hian kal ta ila Pu Speaker, kan Minister zahawm tak hian rangva sem theihna chhungkaw 10 a hnena list pe turin minrawn ti ve a, a lawmawm hlein ka hria a. Vawiinah chhungkaw 15 keimahni bial theuh ah a list a hnena thlen turin min ti a, a lawmawm khawp mai a, lawmthu ka sawi a ni.

Chutihruala ka sawi duh chu DRDA-a thawk central sorkarin state sorkar-ah dah ngheh tura a tih, sorkarin a dah ngheh loh hi an la awm a. Chu chu Supreme Court meuh inrawlhin, Supreme Court pawh hian thla 3 chhung ngeia dah ngheh turin a ti ta a ni. Vawiin thleng hian dah ngheh an la ni lo a, hei hi kan Minister hian min enfiah sak se, central ina nawr ang leh Supreme Court thu ang hian dah ngheh ngei hi ka rawn ngen sak a ni.

Tin, Land Revenue & Settlement chungchangah hian Land Revenue & Settlement tih a ni a, revenue earning department a ni tih a ti lang a ni. Chuvangin, he department hian tam lehzuala sum an lakluh theihna tur chuan Mizoram-a chhungkua zawng zawng hi in hmun min pe se, leiman/chhiah pek te hi Mizo mipuite hian na kan ti lo va, pek loh tum pawh an awm

ngai lo. Enge maw zat chuan in hmun kan nei ang, pahnih/pathum pawh, a aia tam nei pawh an awm ang, leiman kan pe a ni. Chutih rual chuan thingtlangah LSC neilo tam tak an awm a, chungte chu LSC hi pek vek ka rawt a. Anmahni ram hu tawh leiman bithliah a ni ang a, tichuan leiman an pe ang a, a lo pung dawn a ni. Chuvangin, revenue hi a pun leh zual theihna turin LSC pass pek vek kha ka rawt a ni.

Tin, a hming hnuhnungah hian Settlement an ti a, sawifel ngai hi kan ngah em em a. Anmahni tihbuai hi an sawifel hleitheilo a ni. LSC pek chhuah tam tak awm-te hi midang hian LSC kan issue sak lo reng reng a, khawi department mah hian an issue sak lo, anmahni issue vek a ni. Chung chu nasa takin a inthuah a, thuah khat a awm a, thuah hnih te, thuah thum te pawh a awm a ni. Chuvangin, Settlement hian an chinfel vat vat hi a tul khawp mai.

Tin, Pu Speaker, i hrevek ang a, Bawngkawn-ah te, Govt.Complex-ah te, nichina kan ngaihthlak ang khan Assam Rifle ramah te pawh LSC nei an awm a ni. Hengte hi chinfela enfel a ngai a. Chung ang an hmachhawp zawng zawngte chu kan Minister hian zangkhai takin a thawk thei ang tih hi ka ring a ni. Chu chu ka duhtawh mai ang Pu Speaker.

S P E A K E R : Member zahawm tak Pu C. Lalsawivunga a phar hmasa zawk tlat.

Pu C. LALSAWIVUNGA : Pu Speaker, ka lawm e. Member zahawm takte atanga kan ngaihthlak ang khan department pawimawh tak tak, Department lian tak tak, ram hmel lanna department demand kan sawi a ni a. Sawi pawh a chakawm a, sawi tur pawh a tam khawp mai a. Amaherawhchu hun a chep a, a tlangpui chauh ka vei zawng, kan ram tana thil tha, kan mamawh sawichhuahna hun atan hman ka tum a ni.

A hmasaberah chuan Demand No. 6 Land Revenue & Settlement chungchangah hian, ka hmaa member zahawm takin a rawn sawi kha kan hria ang a. Hemi piahlama ka sawi duh chu - land record mumal tak kan neih a hun tawh a. Land record mumal tak ram pumah kan neih chuan, kan state tan revenue tha lutuk a ni tih kan ngaihthlak kha, a pawimawh hle a

ni. Tin, record mumal tak nei tur chuan Surveyor indaih kan neih a ngai thung a, Kum 2008 khan Hualngohmun-ah Land Revenue & Settlement hmun tur, Training Institute sakna atan hmun laih zawl a ni a, ram zau tak a awm a. Mahse vawiin thleng hian chhunzawm a ni ta lo va, laih a nih ang ang khan vawiin thleng hian a la awm a ni. (SPEAKER : Kan han inthlak leh lawk ang e aw) Deputy Speaker at the Chair (DEPUTY SPEAKER : Tan leh nghal mai ang aw) Saw saw a rang thei ang berin sorkar hian a ngaihtuah a, Surveyor Training Institute din thuai hi a pawimawh a ni.

Land record mumal tak nei tur chuan Surveyor kan mamawh bawk si a, training kan mamawh a, ITI-ah te khuan training pe thei tur Surveyor instructor atan dahin surveyor training hi ITI hmang khuan neih theih niin a rinawm a, kan Minister zahawm tak pawh khan min lo chhinchhiahsak sela, kan mamawh taw hem avangin hma la nghal se tiin ka ngen a ni.

Land record mumal tak neih thuai thuai hi kan ram tan a pawimawh a ni. Chumi nei tur chuan kan thalaite'n training tha an neih a ngai a, land survey nei turin Surveyor kan indaih a ngai a. Surveyor post ruak kan neih mek hi hnawkhah ni se, tihte kha ka sawi duh a ni.

Demand No. 38- Rural Development-ah khan han lut leh ila. DRDA chungchang kha kan ngaithla a, DRDA-a hnathawktute dah nghehna tura hma chak taka la turin kan beisei a. Hemi rual hian MNREGA hnuaiia thawk hote pawh hi an dinhmun hi ngaihtuhsak an tul hle a ni. An hlawhte hi a beitham em em a, chhungkaw chawm nan an hmang si a. Chuvangin, pay structure mumal tak an enjoy ve hi a ngai a. Tin, chumi piahlahmah, EPF Scheme-te pawh hi an la enjoy lova, hengte pawh hi sorkar order awm tawh sa kha a ni a, kan ngaihtuah hi a pawimawh a ni. Anni ho hi thingtlangah mipui zawng zawngte tana rawngbawl hna thawka, central sorkar atanga scheme lian ber leh thingtlanga cheng chhungkaw tin thleng phak scheme enkawltu an ni a. An hlawh ennawn a, tihpunsak an mamawh tak zet a ni. Pu Speaker, MGNREGA hnuaiia employees te hi Group A, B, C, D a then a ni a. Recruitment Rules leh Service Rules siam a, pay structure mumal taka siamsak leh an pay pawh tihpunsak turin sorkar tha tak hi ka ngensak a. EPF enjoy tura order awm sa hi tihpuitlin thuai ni se tiin rawtna ka siam a ni. A ngheta dah an nih theih nan kan Minister zahawm

takin hma laksak thuai se. Mizo mipui mi harsate tana a tul ang ang, ni 100 inhlawhna buaipuitute an ni a, an pawimawh em em a ni. Chuvangin, ngaihthah an ni deuh em aw tih hi sawi loh theih loh niin ka hria a. An service leh recruitment contract-a thawkte tan mumal taka siamte pawh hi a hun tawh em em a ni. Tin, DRDA hnuaia hnathawk Champhai District ami te, Serchhip District ami te zingah hlawh la lo pawh an la awm a ni. Champhai-ah khian thla li hlawh la lo an awm a, Serchhip lamahte pawh thla riat lai hlawh la lo an awm, hengte pawh hi kan sorkar hian a ngaihtuah a, thahnemngai taka ke a pen pui hi a pawimawh hle a ni.

Information Department-ah hian han lut leh ta ila. Information Department hi a pawimawh a, Mizoram sorkar chet velnate pholangtu ber pakhat an ni a. An hmanrua thlalakna camera te, video camera te hi an indaihlo hle a, a quality thuah pawh hian a tha lutuk lo a ni, chuvangin helai pawh hi ngaihsak, ngaihtuah an tul a. Kumina kan calendar ka en a, mimal thlalak intar chuai te hi a ni lo deuhin ka hria, pho chhuah chakawm tak tak, kan ram hmun mawi tak tak te, hmanlai thil hlui pho chhuah dan te, kan culture lam hawi pho chhuah dan te hi awm thei se a duhawm khawp mai.

Tin, R.D-ah khan kan let leh lawk ang a, staff quarter-te pawh hi thuam that an ngai khawp mai a, tun hmain budget-ah helai staff quarter repair-na tur kha dah a ni thin a, tunah hian a awm tawh lo niin a lang a. Chuvangin, Housing project for Staff-te pawh hi a bika ngaihtuah sak an tul khawpin ka hria a ni.

Soil chungchangte pawh kha sawi tur tam tak a awm thei ang a Soil hi a pawimawh em em a, kan leilung luangral zel tur venhim hnate hi anni hi a thawktu tur niawm tak an ni a. Chuvangin catchment area-ah te, slope area-ah terrace-te siama kan lei chunglang hang thatna luang ral turte hi venhim hna anni hian an thawh a hun tawh a, a pawimawh em em a. Heng ah te hian pawisate pawh hi dah tam thei ila a tha hle awm e.

Demand No. 39-na Power & Electricity chungchang hi Pu Deputy Speaker, han sawi leh ka duh a. A hmasa bera ka sawi duh chu kan transformer hman ho hi eng tika lei tawh nge tih hi a thawktute pawh hi

zawt ila an hre miah lo. Chutiang khawpa hlui chu tunah hian kan hmang a ni. A repair hi a hautak a, repair tur pawhin Guwahati pan zel a la ngai lehngal a. Entirnan ka bialah Bethlehem Vengthlang-ah phei chuan transformer pakhat chu a on/off-na te hi rubber-in an tawn a, a hlauhawm em em a ni. Chuvangin, transformer tharte hi kan sorkar thar hian a lei thei dawn lawm ni? Hengte hi thlak a van tul ve tih hi bultan nan ka hmang duh a. Line pakhat a chhia a, line dang zawng zawng a thim phah a, chutiang chu kan dinhmun mek hi a ni a, a mualpho thlak deuh lo maw aw tih te kha ka ngaihtuahnaah a awm a, kan bial dinhmun atangin chu chu ka rawn sawi a ni.

Tin, power hi a pawimawh em em a, a pawimawhzia hriain Brig. Thenphunga Sailo, chatuan ram min pansan ta khan nasa takin hma a la a, Bairabi hmunah Tlawng lui khuap turin hma a lain detail investigation engkim tih a ni. Khawvelin kawlpheha siam chhuak tura tui khuap tur chuan detail investigation thawk zova a senso tur zawng zawng chhut chhuah a nih hian tui khuah hi a zatve zo angin an inngai a ni. Chutiang chu Brig. T.Sailo khan a ti zo hman vek, rail head a lakluh nachhan pawh vai ngam nan a ti a, Bairabi hmunah Tlawng lui tui khuahna hmanrua phurh nan a ni bawka ni. Hei hi state kan nih hnu kum 33 chhung hian bawhzui a awm tawh lo, kum 33 chhung state puitling nia kan kal tawh hnu hian 8 mega watt chiah kan la thar, chu pawh chu Brig. T. Sailo-in Serlui 'A' a lo puitlin hman a, wawinah kan ram thar chhuah zinga kan chhiar tel zel hi a ni. Serlui B bul an tan hman a, chhonzawm lohin a awm reng a. Mahse, Serlui B tunah hian kan hmang mek a, heng kan neihsa te hi hmantlaka kan siam zui zel te hi a pawimawh. Sorkar tan buaipui tlak a tling. Sum dah tam a tul. Tunah Tlawva leh hmun dang dangah mini hydro power siam mek a ni a, Tlawva bik phei chu June thla hian hawn hman tura beisei a ni a, mahse, commission theih a la ni lo nge? Power & Electricity enkawltu Minister zahawm tak hian khawngaih takin kawlpheha a kan intodelhna tur hian nasa takin hma min lakpui sela. Tunah hian thla thum chhungin kawlpheha lei nan nuai 500 chuang kan seng a ni. Kawlpheha siam chhuahna tur lui remchang Pathianin min pe, heng hmang hian kan intodelhna tur kawlpheha siam chhuak tur hian hma la ila. Vety-ah a pawimawh, industry, factory pakhat pawh kan nei thei lo, industry

lian pawh kan nei thei lo, Vety-ah pawh kan intodelh thei lo, Agriculture-ah pawh tui pump chhuahna tur power kan nei thei lo. Chuvangin, he sorkar hian a tharin ngaihtuahna rawn hmang teh se tih hi ka ngenna a ni. Kum 10 chhung anni pawh an sorkar tawh, kum 10 an sorkar chhung khan kawlpheetha kan intodelhna tura hmalakna hi hmuh tur a awm lo. Chief Minister Budget Speech-ah pawh khan pakhatmah a lang lo. Chuvangin kan ram hmasawna tur leh kan intodelhna atana a hnukpui kawlpheetha siam chhuak turin i tang ang u, khua a la tlai lo, tan i la ang u, kan zavai hian i bei ang u tih hi hun chep tak karah thahnemngai takin ka sawi duh a ni. Ka lawm e.

DEPUTY SPEAKER : Kan tang tlang a, member zahawm tak takten, kan ngaihtuahna leh kan hma thlirte kan han sawi chhuak a, a hlu em em mai a. Amaherawhchu, theih ang tawka ranga sawi tum ta ila, zan lamah kan hre lawk vekin ka ring a. Pu Lawmawma Tochwawng, Lunglei East bialtu zahawm tak I lo sawm ang u.

PU LAWMAWMA TOCHHAWNG : Pu Deputy Speaker, ka lawm e. Hraw tak takin kan ngaithla a, kan sawi ve tur erawh hi chu a te nawi deuh ni turah ka ngai a. Demand No. 39-na Power & Electricity, Minister zahawm tak Pu Zira chan hi Mizotawng khan kawlpheetha kan ti a, a hrihfhiah leh zelnaah chuan tek lam department a ni awm e. Tuna kan mamawh kan neih tawk loh, hmun dang atangin kan lei, sum tam tak kan seng tih a chiang a. Tunhma atangin kan bei tawh thin a, a ramin neih kan tum a, eng emaw chen chu kan han nei tawh thin a. Kan ramin kan neih ngau ngau pheih chu tuna sorkar mekin a siam chhuah Serlui B Hydel project khu a ni mai a. Duhthu a la sam lo a, duh tawk a la ni lo bawk tih chu a chiang a. Chuvangin, hmalakna tur pawh tam tak a awmin ka ring. He department hi tek lam department a nih avangin a changtu pawh pa huaisen, pa rorum tak a nih a ngaih ka ring a. Tuna a changtu kan Minister ngei pawh hi a chang tur awm tak a nih ringa kan hotuten an pek a nih ka ring. Ram pum mamawh khaw te leh a kilkhawr ber pawhin eng kan duh vek mai a ni a, in 20 lekah pawh. A changtu tan pawh hian a luhaithlak awm mang e aw ka ti a. Industry te leh thil dang hmasawna dang kan duh pawhin power supply a awm leh awm loh kawngro a su thui em em mai bawk si a. A changtu pawh hi kan sorkar pawh hian a duat theihtawpin lo duat se a tha hle awmin ka ring. Ram pum kan sawi rualin district pum pui ang pawhin Lunglei-in power-a a va thunun chin Siaha leh

Lawngtlai lamte pawh kan hawl lo thei lo ang a. Zawnha leh chhanna hunah pawh khan kan inchnangin kan inhrilh tawh na chungin, chhim lam zawng zawngin kan mamawh 132 KV alternate line hi ka han sawi leh lo thei lo a. Hemi hi a awm loh chuan chhim lam hi a chang chuan kan thim rup a, hna zawng zawng a chawl thin. Chuvangin 132 KV line hi kan sorkar hian min lo hriat thar sak leh se. Zawh tep a ni tawh a, zawh theihna turin hma min lakpui se kan duh khawp mai.

Tin, Lunglei District leh a piahlamah pawh, ram pumah pawh ni se kan hmanraw neihte hi a chhe tawh hlawm khawp mai a, a tawngtawl tawh hlawm khawp mai a, a thawktute pawh chetsualna a thleng ta zeuh zeuh a ni. Kan sorkar hian he lamah hian beng lo tivar se ka duh khawp mai . A lungchhiatthlak hle na a, hmanni lawka Lunglei Ramthar-a a chen ve na ngeia thil thleng kha ka han sawi lawk duh a. A line a chhiat avangin thawktu a lawn a, thirban lera a awm laiin hmunpui lam atangin an rawn on thut mai a. A thawktu chu a man ta a, a thi a, an rawn off mai si lova, lak thlak mai theih loh in darkar deuh thaw electric ban lera a awm reng mai a ni. Hawlhthlak theih pawh a ni lo, a rapthlak a ni. Khangahte khan inbiakpawhna tha zawk wireless handset te nei ila chuan an off vat ang a, khami kha kan chhan hman em loh pawhin thirban lera khan thi tawh khan a inkhai reng lo tur a ni a. Chutiangte chu kan nih avangin helamahte hian kan hmanrua te thuam that kan va mamawh em ve aw ka ti a ni. Inbiakpawhna tha te, leilawn tha zawk leh changkang zawk te kan mamawh khawp mai.

Khawiva 132 KV sub station hi Mizoram chhimlam zawng zawng chawmtu a ni. Hmani lawkah khawl thar kan nei a, amaherawhchu khawl thar chu a thlenna tur hmuna a thleng thei lo, thla tam kawngpui bulah a awm a ni. A chhan chu Khawiva zu thlenna tura kawngpui kha a chhe em em mai a, a phurtu motor a lian si a, a tluk a hlauhawm a, reitak chhung hman theih lohin kan thil thar neih pawh kha a awm a ni. Khawngaih takin heti lam kawngah pawh hian kan sorkar leh a department lam changtu te pawh hian min lo hriat sak se, kawng chhia saw siam thuai thuai a tul hle, hma in la mek a ni tih kan hria, mahse tihchak kan ngai a ni.

Tin, mihring indaihlohna a nasa a, tuna thawktute saw an upa tawh hle a ni. A bik takin Lunglei leh hmuna dangate pawh a ni ang, kum 60 chuante an lo ni tawh a. Thirhruai bana lawn a ngaih thut pawh a lawn thei tawh lo te an ni nawk mai.

Chuvangin, thawktu lam indaihlohna hi nasa hle mah se khawngaih takin min lo hriat sak se kan duh khawp mai.

Tunah hian chhim bial ah hian 33 KV sub station Bualpui NG-ah te, Tawipui N-ah te, Kawmzawl leh Phura-ah te dah tawh a ni a. Thawktu indaihloh avangin chung sub station-te pawh chu hnathawk thei lovin an awm a, Mualthuam leh Borapansuri-ah te pawh kan nei mek a ni. Heng kawngah hian kan hotuten min lo hriat sak se kan duh khawp mai. Official quarter-te saw 1980 vela an sak tawh a ni a, a hlui tawh a ni tih a hriat a ni.

Demand 23-na Minister Pu Zira chan bawk Art & Culture-ah pahnih lek han sawi belh ka duh a. Mizopuan office-ah leh mimal inah te, a bikin sorkar official ten hmang tam leh ila tih rawtna kha a thlawp awm khawpin ka hria. Kan parda kan puanzar atan te hian intihhmuh thar leh ila, kan zia tarlanna tha tak a niin ka ring a ni.

Tin, Chapchar Kut chungchangah hian tawite han tarlan ka duh chu, kan hman thin dan hi a tha viau mai a. Art & Culture vang hian khawvelah pawh a ber nihna kha kan lo hauh tawh a, Cheraw-ah khan. Chapchar Kut kan hman dan hi tunah hian a that viau laiin kan Mizo zia tilang tam leh zual thei turin hmanlai indo te, Sairam chhuah te, kan pasalthate chezia nunchang lem te kha han ti tel thei ila chaun a hmuh nawm leh zual awm mang e aw ka ti a.

Pawisa lamah kan harsa kan ti thin a. Naga-ho khian an Hornbill Festival khi kar khat, ni 7 te an hmang thei niin ka hria a. Pawisa hi hmun dang atangin a hmuh theih a ni, a hmuh theih tih hi ka chiang. Chuvangin, kan hotuten helam kawngah hian an beng an tih var phawt chuan state pawisa ni lo pawnlam atang hian kawng a awm a ni, an lo dap zel pawh ka ring khawp mai.

Tin, Land Revenue, Soil & Water Conservation-ah hian point pakhat chauh ka sawi duh chu, Mizopain kan lo tih thin Changkhap kan ti mai a, lei chung leitha luang liam zel tur danna tur atana mau emaw, thing emaw an mangkhawh laia an dah thin kha uar thar tur hian inhriattir thar leh ila, a ti tha te phe chu lawman te pawh insiam ila. Ho te anga lang mahse, kan leitha luang ral tur dangtu tha tak hi a ni tlat mai a. Hote anga lang mah ni se kan lo tih than tawh a ni a, uar thar leh ila chu thui tak min chhawk ka ring khawp mai. Ho deuh anga lang. Mahse, kan lei

chunglang luang ral hawk hawk thin hi luite km 2, km 3 chin hi chu chhe leh mai thei tur pawh ni sela khuap vek mai ila. Chu chuan lui chak deuhva a luang tur hi a lo dang ang a. A leitha hi a ram chheh velah hian a theh darh theih a rinawm a. A hautak deuh mai thei a, a hautak loh pawhin, eng emaw chen han tih phawt a tih darh leh zel hian a hman theih awm mang e aw ka ti a ni. Tin, Lunglei lamah sawn heng hming put chhan Lung lei an tih te, sap hovin an lo phuah tawh te; tin, Chawngtinleri puan thlun tlang tih te, Vanzemali tih te saw kan nei a. Sawng te saw han cheibawla, en tlaka han humhalh ve ni thei se chuan a lawmawm ngawtin ka ring.

Demand No. 33-na, Minister zahawm tak Pu Lalruatkima chanah hian Aizawl khawpui tih lohvah chuan he department hian Mizoram pum pui a dap a ni a, khaw tin a thleng a. A mamawhtu leh a chhawrtu pawh an thahnem ngiang a ni. A huam zau em em mai a, a enkawltu tan taihmak a ngaiin fit a ngai riauin ka ring a. Kan Minister te zingah pawh taksa leh kum lamah pawh fit ber tur te zing ami kan han nei hi vanneihthlak tak niin ka hria. Kan mamawh zawng zawng a nih loh pawhin he hun chhungah hian kan mamawh eng emaw zat hi chu puhruk sakin kan awm ka ring a ni. Nichinah an sawi tawh a, social education-in a ken tel hall te, sikul te leh mual tha, chungte chu mamawhtu te hnena thleng pha a, pe thei turin thingtlangah chauh ni lovin. Chutiang chuan, rangva te pawh hi kan la mamawh nasa mai, thingtlang zawkah te leh urban area-ah te pawh, chung chu chhunzawm zel ni sela, rangva mamawhna hi chu tawpin tai a awm rihlo a nih hi maw. Sorkar pawh hian hei hi ngaithah lul lo se ka ti khawp mai.

Staff quarter hmun tinah a chhia a, Lunglei district hmun hrang hrangah pawh a la ni reng tho a. Tin, Chhipphir-ah sawn RD Rest House kan nei ve a, Lunglei North, Dr. Tanpuia bialah sawn. Sawngte pawh saw Assam-type-a sak a ni a, a rei tawh hle a, thlipui tak tak hi han tleh se a tuar lovang tih a awl a ni. Kha kha min lo hriatpui se.

Information & Public Relation bik hi tawite in Pu Speaker, Department pawimawh a ni a. Department, pawl lam leh chanchinbu mite nen pawha inpawh hnai reng a ni a, a hna hi a pawimawh reng a, 'silai mu ai pawha hlauhawm zawk' an tih kha a ni a. Chanchinbu mite nena inzawm tlat a nih avang hian ngaihthah chi a ni hauh lo a ni. Thuthar thehdarhtute thu thehdarh hian mipui rilru sukthlek a siam

a, a ti tha em em thei a, a ti chhe vek thei bawk a, kan ngaihtuahna a ni lo lamah a kai kawi thei tlat a ni. Hei hi ram tana tangkai leh zual tura chherchhuah leh hman a thain ka hria a. Kan chanchinbu mite tana tangkai tur, India ram chhung leh pawna ram changkang zawk ten engtin nge an lo kal pui dan, engtin nge an tangkai pui tihte pawh hi han zawn puia han feh chhuah pui nawk nawk a chakawm khawp mai. An dikna leh chanvo humhalh sak leh an hmakhua tur thliar pui hi kan Minister zahawm tak te pawh hian an thiamin ka ring a, kal pui se la, ram tana tangkai takah, an nih ang tak hian hman ni se. Tin, thuchhuah tih darh kawngah pawh hian inlaichinna leh inpumkhtana tha kan neih theih nan an tangkai em avang hian duat an phu hlein ka hria a ni. Pu Speaker, ka lawm e.

DEPUTY SPEAKER : Pu Lalrindika Ralte, Hachhek Bialtu MLA zahawm tak I lo sawm ang.

PU LALRINDIKA RALTE : Pu Deputy Speaker, ka lawm e. Thil pakhat a hmasaa ka sawi duh, a tir atanga ka ngaih pawimawh chu Pu Deputy Speaker, kan bell hi ka ngaimawh riau mai a, sawi atana thil tak te a ni a, amaherawhchu ka ngaimawh tlat mai a; ka sawi duh chu, tun ang khawvelah chuan hetiang hi a hman loh thei lawm maw ni le, ka ti deuh a ni. (DEPUTY SPEAKER: *Ngaihtuahna kan lo seng dawn nia*). A khawl khawm tam theih bawk si lo va, kan han herh let vel a. Belll changkang tak takte pawh a awm tawh hi maw le. A thlak dan awm chuan a tha hle ang.

Thil hi han hre thuk viau mah ila kan tlin tawk leh phak tawk te a awm ve a. Japan te kan ti a, Israel te kan ti a, China te kan ti a. Amaherawhchu kan awmna hi India ram a ni a, India ramah pawh state pachhe takah kan awm a ni tih hi kan hriat a thain ka hria a. Hemi ka sawi avang hian ka zam tihna a ni lo va, tan kan ngai a ni. Thil hi serious taka kan tih ngaiin ka hria a, chu chu kan rilruah awm se.

Pu Deputy Speaker, Demand No.33-na hi ka han sawi hmasa duh a. Soil Department kan ti mai a, kan bialah khuan coffee kan thar tam ve ang reng a, Hriphaw khua khu Mizoramah pawh kum 10 kal ta chhung khan coffee thar tamah pakhatna a ni deuh char char a. Kan hralh nasa ve ang reng a. Chutih lai chuan nikum vel atang khan kan coffee chin khu 'Arabica' a ni a. Nikum atang khan hrisellohna, a hnah hi natna in a man tlat mai a, kuthnathawktute an mangang deuh a. Khumi an chin khu thlak duhna rilru ah an nei deuh a. 'Robusta' hi an sawi dan

chuan a thlakna atan tha turah an ngai a, chu chu Minister khan min ngaihtuah sak se, a chi te leh chutiang ang tipung tur chuan ngaihtuhna min neih sak se tih ka han ngen duh a. Chutih ruala ka sawi duh chu, Coffee Board a awm a; coffee man hi an ba nasa thei khawp mai a, Coffee Board-te pheih chu lian ve ang reng tak khan kan lo hria a.

Mahse, lo neitu zawk sum hi an ba tlat mai a. Kumin kum tir lam khan Guwahati-ah Coffee Board lamahte kan buaipui sak ve a. Crore bi lai mai kha an ba a ni. Kan kuthnathawktute khatiang kha an bat sak a. Chuvang chuan payment chungchangah pawh hian enpui deuh chu a tha awm mang e aw ka ti a, chungte pawh chu min lo hriat sak se ka duh a ni .

Art & Culture-ah hian kan naupan lai khan Pu Buanga dictionary kan ti mai a, kan hlut ve khawp mai a, naupangte kan nih lai khan kan en ve a. Tunhnu hian ka'n zawng deuh thin a, market-ah hian a awm lo tlat mai a. Ka zawn ka zawn hnu khan Art & Culture lamah hian an lo chhut nawn tir thin kha a lo ni a. Chhut tharte kha ka nghak a, keipawhin bu khat chu ka lei a. Ka sawi duh tak chu he dictionary hi Mizotawng zir nan hian a thain ka hria. 'Dictionary of The Lushai Language' tih a ni a. Mizotawng hi kan thiam mumal tawh lo va, Mizotawng zir nan a tha em emin ka hria a. Hei hi chhut sa te an la nei em ka hre lo va, chhut vak mai hi a thain ka hria. Dictionary tha tak niin ka hria a, chu chu Minister khan min lo enchian sak se tih ka sawi duh bawk a ni.

Demand No.39-na Power & Electricity-ah hian, Chief Minister Bungalow kawng chho museum kawtah khian electric ban khi a awn nasa khawp mai a. Hmanni deuhah khan ka sawi tawh a, Chief Minister Secretariat lam pawh kha ka han hrih a. Amaherawhchu, hma lakna a la awm chiah lo va, saw saw current awm laiin a tlu palh ang tih a hlauhawm riau-in ka hria a. Min ensak theih chuan tih kha ka sawi tel duh a ni.

Demand No.38 Rural Development hi ka han sawi leh ang a, nichinah khan an sawi nual tawh a, ni za inhlawhna kan tih mai hi an hlawh hi account through-a lak a ni thin a. Thingtlangah chuan Bank neite an ni lo va, a hnai ber kal tur pawhin km 20,30-te kal a ngai thin a. An hlawh tlemte la tura an va kal ve khan current awm lohte a lo awm a, technical problem avangtein an sum te an la thei lo va. Heng harsatna hi a awm ve reng a ni tih kha department pawhin in hre thoin ka ring a.

Chumi ruala ka sawi tel duh chu district thar hawnte kan ti a, kan han sawi kan han sawi hian kan ram tan pawha tha zawk tur hi chu RD Block hawn tam hi kan ram tan hian a that hmel riau hian a hriat a. Chuvang chuan RD Block-te hi tam zawk hawn kha a rawt theitu lam ni lo mah ila ka'n rawn ve ngawt teh ang. Chuti zawng chuan Minister khan hma min lo laksak se a thain ka hria.

Pu Deputy Speaker, BADP hi international border atanga km 10 a cover kha a ni a. A cover area hi tih zauh dante hi a awm em aw ? Tunhma kha chuan 15 km nge? 20 km tihte kha a ni a. Hengte pawh hi a cover hi kan tizau thei ang em? Chuti zawng chuan hma lak theih a ni ang em tihte ka sawi tel duh a. BADP kan tih sum hi kan hman dan hi duhthu a sam lovin ka hria a. Thil tha tak ni si kan state sum ngai lo va central sum kan hman theihna ni bawk si hi kan enkawl dan hi a fuh tawk lovin ka hria a. Ningnel taka thil tih hi a tam em em a ni Pu Deputy Speaker. Chuvang chuan hei hi kan ennawn that a pawimawhin ka hria a. BDO kan nei a, anni pawh hi strict zawka an kal a thain ka hria a. BDO-te pawh hi BADP area amite pawh hian chang vannei an inti deuh thin em aw ka ti a. BDO rau rau ah hian an hnawng deuh riau in a hriat a. Hengte pawh hi kan enchian deuh a thain ka hria a ni.

Ka sawi leh duh chu Demand No.6-ah hian, nichinah kan sawi tawh a, mi pakhatin ram tam tak, ram zau tak tak an neih hi kan sawi tawh a. Hming tam takin an lo nei leh tho thin si a, hengah hian member puiten an sawi ang khan ram ruak pawh ni se tax hi tam zawk lak ni se a thain ka hria a, chu chu kan ram tan pawh a that ka beisei a ni. Ka lawm e.

DEPUTY SPEAKER : Hun i hmang tawk hle mai Pu Lalrintluanga Sailo, Dampa bialtu i lo sawm ang u.

PU LALRINTLUANGA SAILO : Pu Deputy Speaker, ka lawm e. Vawiinah kan Minister zahawm tak pahnih te demand kan sawi dawn a ni a, sawi nghal deuh mai ila a thain ka hria a, hun hi a tlem si a. Pu Deputy Speaker, ka han sawi hmasak duh chu, i speed ang khan thu kan sawi thiam lo va, min hriatthiam deuh hlek thain ka hre hmasa a ni tih kha ka sawi hmasa duh a.

Demand No.27-na hi a ni a, helaiyah hian MNF leh India inremna thuthlung No.9-naah khan chiang deuha inziak a awm a. Minority-te hi an chanvo dik tak pek

an ni ang tih kha a awm a, kha kha kan ngaihtuahnaah awm se thain ka hria a. A bikin District Council Affairs enkawltu hian min hriat sak se a thain ka hria a. A chhan chu kawng enkimah ka sawi tawh thin angin min pawt hnufualtute an ni fo mai a. A bikin CADC area-ahte hian, zirna lamah hian Mizo subject bawk hi ka ngaipawimawh lo thei lova. A chhan chu hetiang zawnga kan kal loh va keimahnia a bil te tea kan kal a nih hi chuan kan unity a tha ngai dawn lovin ka hria a. Hei hi ka ngaipawimawh hle a ni.

Tin, kan politician ten saw lamah sawn, helai hi politics eng emaw lianpui inphum awmin ka hre deuh a. Direct funding an han tih ang chite pawh hi ngaihtuah nawn fo a thain ka hre deuh hlek a tih kha tawitein ka sawi duh a.

A dawt lehah chuan Demand No. 39-na, Hei hi Pu Deputy Speaker, i veilama independent member zahawm takte pahnih Aizawl North-I bialtu leh South-I bialtu khan power chungchangah he ministry hian a fail a, budget-ah pawh an reflect lo a, power generate an tum lo a ni an han tichiam mai kha ka rilruah thil dang a lo lang deuh hlek a. Member zahawm tak takten Serlui 'B' nasa takin an sawi a, keipawhin sawi ka tum a ni, amaherawhchu sorkarna vawi hnih an siam chung khan power engzat nge an generate aw ka ti a. Ka bial kalkawngah khuan ka kal fo mai a, Serlui 'A' a awm a, khulaiah khuan ziaq chiang deuhin ka en a, Mega Watt 1 kha maximum an lo siam chhuak kha a lo ni a. Khang khan Mizoram khawvelah hian power ngaipawimawh bera an sawi fo mai lai hi zirchian deuh a tha em aw ka ti a, kan Power Minister hian min hriat sak se ka ti a. A chhan chu, tun hunah hian investigation vel kha an buaipui a nih pawhin a tha tho a, investigation ringawt kha power generate na a ni lo tih hi a hre rual ni te pawhin ka hre deuh hlek a. Chuvang chuan, he House chhunga party hrang hrang sorkarna lo siam tawhte ah chuan a sawilo ber tur a ni em aw tihte min ngaihtuah tir deuh a ni Pu Deputy Speaker. Chuvang chuan, tunhunah hian ka ngaihtuahna chutiang zawng chuan a kal a. Kawlphetha pawimawhzia kan hria a, a pawimawhzia hi min zirtir se, hmalakna lam hi chu lo sawi ve tawh lo se tihte min ngaihtuah tir deuh a ni tih kha ka sawi hmasa duh a ni.

A dawt lehah chuan ka bial khaw 32-ah hian ruah a sur a thli a thawt hian power kan nei ngai lo a. Amaherawhchu, Marpara-ah khuan 5 sub-station tunah khuan dina hma lak chhoh a ni a, ka bial chhungah khuan Hruidak-ah khuan a awm

a, hei hi engtikah nge kan commission theih ang tih hi kan ngaihtuahna lian ber a ni a, kan Minister hian min lo chhinchhiah sak se, khawngaihin a hmunahthe khuan min tlawh sak nghe nghe se ka duh a. Helai hi kan commission a nih chuan power-ah pawh kan indaih chho dawn turah ka ngai deuh hlek a ni tih kha ka tarlang duh a.

A dawt lehah chuan kan bial chhungah khuan khaw hrang hrang kan awm a, chhungah chuan a hmingin hrui han thlun luh a ni vek tawh a, amaherawhchu, tuilet hnua electric bulb la lei ve miah lo khua pakhat kan nei a, chu chu Sailo Lal thuthmun, Zopui khua a ni a, helai hi min lo chhinchhiah sak se ka duh khawp mai a. Vawiinah hian power lam hi an la ngaihtuah pha lo a, tun hunah hian kan ti mai theilo a nih pawhin solar light lamte pawh hi min ngaihtuah sak se tih kha ka ngaihtuahnaah a awm a, kan Minister hnenah hian ka ngen duh a. Chutiang zawnga hma kan la a nih loh chuan hun rei tak la duh tur thilte a ni a, khaw hrang hrangah khuan power kan inpek dante a la mumal lo hle mai a. A bikin ka bial hmun thumah khuan Synod hmun pui tak takte a awm a, Silsuri ami khu la thlun luh loh tawpte a ni a, khatiang chi kha kan nei nual mai a, khawngaihin kan Minister hian min lo chhinchhiah sak se tiin ka ngen duh a. Kan mamawh dan khu a nasa em em mai a, khua a lum a, a lehlamah Bangladesh-ah km 15 lekah khuan Mauhmuam khua a awm a, power an nei tha em em mai a, foreigners te nen khulaiah khuan tourist te an ri luh luh mai a, thawm a hriat phak vek mai si a, keini lam kan thim thap lai kha, Bangladesh pawh tluk loh lutuk lai ang chi kha ka rilru a tina deuh hlek thin a, chulai chu ka sawi lang tel duh a ni.

Demand No. 33-na Land Resources, Soil & Water Conservation chungchang hi ka sawi duh a, hei hi kan SEDP atang pawha hma kan lakna tur a ni a. Hemi chungchang hi SEDP buatsaih a nih lai khan a bik takin rubber chungchang hi a zir chiantu ah te kan lo tel ve a, hei hi a scientific viau a ni. Chuvangin, mithiamten min guide loh chuan chuti taka hlawhtlin hleihtheih a ni lo va, climate-ah te, humidity-ah te eng emaw bik deuh hleka climate leh humidity neihna hmunah lo chuan han chin vak chi a ni lo a. Tin, a lo ching tawhte atang pawha kan hmuh chu compact area-a chin chi a ni a, zau hrang hranga a malte tea a bing deuha chin chi a ni lo a, a enkawl tawhna-ah hian kan chian em em chu Pathologist Department te pawh ka rawn ve a, a ei chhetu lam emaw kha chu a buaithlak loh, leimin leh tuilian leh kang a haw hle a, chu chu a ni deuh mai a. Chuvang chuan, hmun rem tha-ah kan ching a nih chuan kang kha a hlauhawm ber a, a hnah lo tlate khu an phiat khawm a,

khurte an lai a JCB ten, tuktinin an phiat khawm a, an bei thin a ni, khang khan fertilizers a lo siam chho a, tiang khan tangkai taka hman a lo ni a. Tripura-ah khuan kan House Leader zahawm tak hi a zu zin a, kan thianten video an rawn lakah pawh chiang taka kan hmuh chu anni khu chu a hnah tla khu tumah pawh an inhal sak ngai lova, keini Mizo ang lo hian mei kang lakah hian an fimkhur em em a, keini chu kan inthlahdah deuh a. Chuvangin, hetah hian kan fimkhur a thain ka ring a, hma kan lak chhohna turah pawh hian a compact area deuh hleka chin chi a ni awm mang e tih kha ka ngaihtuahnaah a lian deuh a ka han sawi duh a.

Tin, a enkawltu department hi an indaihlo hle mai a, tuna district pathum kan hawnah pawh hian DO dah tur pawh hi kan nei mumal tawh lo va. Tin, kan DO tam zawkte pawh hi tunah hian promote kan tih ang chi, a chho a ni tawh a, a thawktu lam hi kan inlak a tul awm mang e aw tih ngaihtuahna a awm a ni tih ka sawi duh a.

A dawt lehah chuan Demand No. 23-na Art & Culture chungchang hi in sawi loh dan daiha sawi ka duh a. Art & Culture hian min thuam mawi hle a, hmaihthelh kan nei em aw ka ti a. Art & Culture kan sawi hian Mizo thawmhnaw lai chauh hi kan ngaihtuah chuan kan ngaihtuah kimlo awm mang e aw ka ti a. Art & Culture Directorate-ah khian kan zinga minority hnam chi hrang hrang awmte tan pawh hian minority cell ang deuh hleka hawn ve tha in ka hre deuh hlek a, kan inchei anga inchei ve lo kha kan zingah hian minority kan nei tel a ni, kan kuangkuah tlat a ni tih hria ila, hei hi enkawltu Minister pawhin min hriat sak se ka duh khawp mai. A chhan chu, keini bial khu chitin hnam tin awmna kan ni a, Art & Culture min enkawlna hnuaiah wawiin chu Mizo thuam i inbel ang u ti ta ila, ha ve theilo kha chi hnih chi thum kan nei a, khang ho ina zalenna an neih ve theihna tur lai kha, sorkarna kan chelh a, kumkhuain Mizo in kan chelh dawn a, khalaiah khan a cell engemaw kha chu hawn ve a thain ka hria a, khawngaihin min lo chhinchhiah sak se, chu chu ka ngaihtuahnaah a lian hle a ni tih a ka sawi duh a ni.

Demand No. 38-na Rural Development hi ka sawi duh a, keini thingtlang lam bialtu tan chuan anni hi kan pa, kan inngahna tak tak te an ni a, chuvang chuan a pawimawh hle mai a. A bikin ka bial khu khaw 18 BADP cover area kan ni a. Amaherawhchu, tunah hian khaw 7 chauh min cover ta a. A chhan chu a dan leh dun te an rawn siam tak avang khan, 0-10 kms ah khan a dangah khan an chhuah tak vang kha a ni a. Khata BADP cover area kan nih laia BADP hmalaknaa hall sak

laklawh lai thing ta thep thuap te. Tin, playground an lo tih ve tawh rairuang hmuna chang ta te, step leh kawng te, hmalakna tam tak te a awm a. Khung khu engtiangin nge kan chhunzawm ang tih kha keini ang tan chuan ngaihtuahna a bo hle mai a. Kan Minister hian min hriat sak ka ring a, hei hi kan harsatna a ni tih min hriat sak se ka duh a.

Tin, state dangte aiin Rural Development Block hi kan nei tlem a ni tih kan hria a, kan sawi fo tawh a. Kan House Leader zahawm tak a awm bawk a. Helai hi chu hma kan lakna tur pawimawh tak niin ka hria a. Keini bial khu then hran leh chi kan ni a. West Phaileng RD Block khu a zau em em mai a, khaw 50 deuh thaw a awm a. Hei lai hi kan then hran chuan BADP cover area nen a hrangin then mai theih, ramri felfai taka a awm sa a. Phuldungseia kan dah mai khan development-ah leh hmasawna kawngah chak takin kan kal thei ang tih ka han tarlang duh a.

A dawt lehah Demand No.6-na hi nichina member zahawm tak Pu Vanlalhlana sawi kha ka thlawp zawng tak leh ka lo ziaak sa ang deuh kha a ni a. Land Revenue and Settlement chungchangah hian Village Council President hi ka ni rei ve khawp mai a, ka hriain ka hria a, thenkhatin land record siam a ngai te an ti a. A thawktute hian an record felin ka hre tlat. Khawi lai khua pawh hi han teh ila, a thawktute hian an lo nei deuh zel a ni, Pu Deputy Speaker. Chuvang chuan an hre em em mai hian ka hria a. Nichina member zahawm tak Pu Hlana sawi ang khan anmahni pass issue, LSC issue sa vek kha a ni a. Department dang hian an issue ve si lo va, an chiang em em tur kha a ni a. Chuti chung chuan land dispute a tam em em mai hi anmahni lam khu en fel deuh hlek a thain ka hria . Anmahni siam kha a ni buai chu. Chuti lai chu a pawimawhin ka hria a. Chuvang chuan khulai khu enfel deuh a tha tih ka rawn sawi duh a ni.

Pu Deputy Speaker, a tawp nan khang zawng zawngah khan hmalakna tur tam tak kan nei a. Keini bial hnufum te hi min hriatthiam ka duh a. A tawpna tak tak atan Demand No. 26-na Information & Public Relations chungchangah hian sentence hnih khat lek ka han sawi duh chu, hei hi kan thu thehdarhna, mipuite rilru sukthlekna siam thintu a ni a. Sorkar hmasa lam ka han en a, hnam thatchhia kan ni, kutdawh hnam kan ni, compensation duh hnam kan ni tihte an puangchhuak thin a. Kan Minister khan hetiang record hi a awm chuan min nuai bo sak se ka duh a. A chhan chu hetiang kan mi te information kan pek a, public relate-na atana thil kan ti

a nih chuan kan hnam hi a boral ang tih ka hlau deuh a, ka ngai pawimawh khawp mai. Khatiang kha politician dangin kan lo sawi a nih pawhin publicize loh chi ah ka ngai deuh a ni tiin ka thusawi ka han titawp ang e. Pu Deputy Speaker, ka lawm e.

DEPUTY SPEAKER : Pu Lalchhuanthanga MLA zahawm tak, Aizawl South-II bialtu i lo sawm ang u.

PU LALCHHUANTHANGA : Pu Deputy Speaker, ka lawm e. Demand No.38-na RD atang hian sawi tan tum ila. RD hi a pawimawh khawp mai a. Thingtlang hmasawna lam khawihtu an ni a. Amaherawhchu`kan sokar hian a ngaipawimawh lutuk lo nge ni, tun Budget-ah hian a punna hi 9.98% chauh a ni a. Thingtlang develop tur hi a tam khawpin a lang a. Village Profile and Indicator 2017-18 tih hi kan en chuan Mizoram thingtlang khua 725-ah khaw 673-ah chauh motor a lut thei a, khaw 52 hi motor luh theih lohna a ni a. Motor luh theihna chu 92.83% a ni a. Motor luh theihna khaw 673 zinga khaw 402 chu fur leh thala motor luh theihna a ni a, khaw 272 chu thal lai chauha luh theihna a ni.

Agriculture link road hi 6115 kms a ni a. Mahse motor-in a zawh theih hi 3516 kms chauh a ni a, 2599 kms hi motor-in a zawh that theih loh, laih zawh fel loh leh tha tawk lo a ni. Khaw 725-ah hian khaw 659 hi electric current-in a thlun zawm a, chu chu 90.9% a ni a. Electric current luh lohna hi khaw 66 lai a la awm tihna a ni. Khaw 725-ah hian khaw 515 hi water supply nei an ni a, chu chu 71.03% a ni a. A bak khaw 210 chu ruah tui van tla dawng leh tuikhur tlan te an ni a. Tin, khaw 725-a khaw 277 te hi bawlhhlawh paihna, dumping ground nei an ni a. A remchang ang anga bawlhhlawh paih mai thin hi khaw 448 lai a awm a ni. Chuvang chuan kan thingtlang khuate hian ngaih sak an mamawh hle mai. Kan Minister viak tha tak hian hma han lak sak se a lawmawm khawpin ka ring. A dawt lehah chuan P&E Department hi ka sawi leh duh a, P&E Department –ah hian hma lak tur hi a tam hle mai a, a hmaa kan ngaihthlak tak ang khan potential nei tha tak ni si mahse power-ah hian kan la intodelhlo em em mai a. Kan power siam chhuah tum dan pawh hi a lungawi thlak loh ka ti a, project lian deuh hlek han siam pawh hi a awm lo a, project te reuh te te kan siam a, chu pawh chu a hun takah kan zo thei lo fo mai a. Tuna kan project buaipui lai mek Tlawva pawh hi kilo watt 5 lek pe chhuak thei a ni a, 2012-a bul tan tawh 2017-a zawh tura tih tun thleng a la zawh loh a ni a, chutiang chuan Kawlbem mega watt 3.5 pe chhuak thei 2017-a zawh tura tih tuna la

zawh loh a ni bawka a. Tin, Tuichang kilo watt 100 pe chhuak thei 2017- bawka zawh tura tih tuna la zawh loh a ni bawka a, Tuiriza kilo watt 100 2017- bawka zawh tura tih zawh loh a la awm bawka a ni.

Heng kan power project te hi a zawh tura tih hun 2019-ah pawh hian an la zawh loh hmel viau leh nghal a, churang chuan kan Minister hian chak deuh hian min han enpui se a that ka ring a. Tin, a thu hrimin power project te reuh te te kan han buaipui thin hi a ho ka ti a, project lian deuh te pawh hi kan sual ve thei tawh lawm ni! Hei leh chen power project-a kan indaihlo lutuk hi a thanat thlak a, zah pawh hi a zahthlak deuh rum rumin ka hria .

A dawt lehah chuan Demand No 6-na Land Revenue & Settlement Department hi, a buaithlak ang reng khawp mai a. Pass indelhthuah leh inpek thuah te a tam a; tin, mi thenkhatin loan lak nan LSC han lak mai theihna te a ni awm a, LSC lem te pawh a tam viau niawmin an sawi a. Tin, file process te pawh hi a muang khawp mai a, churangin kan Minister viak tha tak hian han ching fel deuh se a tha khawpin ka ring a. An budget-ah pawh hian 30.25%-in an demand pawh hi a pung a ni.

Tin, LSC kan issue hi tam tawh viauin a lang na a, mahse lei man, chhiah pe hi an tam vak lo em maw ni chu aw tih tur a ni a. A thenin kan pe a, a thenin kan pelo mai mai ni te pawh hian a lang a. Hengte pawh hi chhui chian deuh hlek chi a ni. He department hi budget ah pawh a pung a, Minister viak tha takin a enkawl dawn a, beiseina sang tak ka han nei deuh a ni.

A dawt lehah chuan Demand 33-na, Land Resources, Soil & Water Conservation Department hi department pawimawh tak, mahse department lian lo a ni a. An hna thawh tur ang hi kan thawh tir meuh lo em ni aw tih tur a ni a, an hna hi a pawimawh khawp mai a. Hmunphiah hi an buaipui hle thin a, anmahni chante pawh niin a lang a. Hmunphiah hi Mizoramah a tam khawp mai a, a quality te pawh hi a tha a. Hei hi a hralhna lam leh a processing na lam te pawh hi department hian buaipui chho deuh ta se, mirethei tan inhlawhfakna/sum hailuhna tha tak niin ka hria a. He department hi ngaih pawimawh deuh ni se.

Tin, nichina an sawi tak ang khan rubber hi kan ching nasa tawh khawp mai a, thenawm state te kan han entawn bawka a. Churang chuan department hian han en

zui deuh sela. Thenkhat chuan an hnai tan tawh niin a lang a, zir chian deuh atan a tha khawp mai.

Power chungchangah khan ka bial chhungah hian R.G. Stadium leh R.Dengthuama Hall te a awm a. Hengah hian mipui an pungkawm nasa thin viau a. Chuvang chuan Mualpui kawnah khuan high mast min siam sak thei se a lawmawm viauin ka ring. Khulai khu suahsual rawngbawl na hmun te a lo ni deuh bawk nen, han eng deuh kulh se ruihhlo ti thinte pawh an tit phah deuhin ka ring a. Chuvang chuan khulaiah khuan kan Minister hian high mast hi min siam sak thei se a lawmawm khawp ang. Chu chu tawk mai sela, ka lawm e.

DEPUTY SPEAKER : A tawk hle mai a. Er. H.Lalzirliana i lo sawm ang.

Er. H.LALZIRLIANA : Pu Deputy Speaker, ka lawm e. Vawiinah hian Minister 2 demand kan sawi a, department 7 a ni.

Ka ngaih pawimawh em em Power & Electricity Department tuna ka sawi lai mek hian kan bial, kan District khawpui Mamit chu an thim mek a ni tih kha House member ten han hriat sak ve hrim hrim ula ka duh a. He, Ni 22 Inrinni dar 3:34 khan 132 KV Aizawl to W.Phaileng line, 32 KV a charge chu mi thing kihin Sairang bulah a vaw chhe hlauh mai a.

Thing kittute hi vawiin khan Sairang Police te chuan an man tawh a ni tiin Directorate of Information hian Mamit khawpui leh a chheh vel chungchanga mipui hriat tur an chhuah a ni. Keini hi beisei sang tak nei kan ni a, tuna hmalak mekna leh han tih mai tur hi a tlar ve dul mai a. Mamit tank 33 kv New Sub Station tih te, Zawlnuam tank chutiang baw, construction of 132 kv single circuit line from Bairabi to West Phaileng via Mamit, hei hi vanneihthlak takin hmanni YMA day 15th June khan a ban hmasa ber tur foundation kan zuk lay a. Hei hi kan nghahhlel a ni a, vawiinah hian department te leh a changtu Minister pawh ka request duh chu hna thawh tan a ni a, engtianga chakin nge kan kalpui ang tih hi big question a ni tih hi min hriat sak ka duh a ni. Tun atanga kum nga, kum sawm ah kan ti leh thei chauh a nih chuan a thu a lianpui leh kan nghahhlel hi a tak ram thlen hun hi a hla leh dawnin kan hria a. Tuna kan hman mek 33 kv hi West Phaileng - Mamit a ni a, a line hi a hlui tawh a, ngaw karah a kal a, ruah a rawn sur rual hian a nan hlum ve nghal thin. Chutiang chu kan dinhmun a ni a, a lungchhiat thlak hle mai a, vawiin

thleng pawha chu chu kan dinhmun a ni, rualawh a na hle tih kha min lo hriat sak ka duh a ni. State hranah chuan Tamil Nadu ah, Madras High Court-in a sawi chu electricity supply hi legal rights a ni a, hemi pawh supply nei lo hi chu Human Rights violation a ni tiin Madras High Court-in thu a lo ti tlu a, chutiang chiah chuan, Himachal High Court pawhin an case-ah chuan Right to water & electricity supply a ti a. Hei hi Article 21 Constitution of India ah Right to Live a ni a ti a ni. Chutiang khawpa pawimawh chu a ni a, vawiinah hian bialtu zahawm tak Dampa bialtuin a sawi a, a bial chhungah electric la thlen reng reng lohna te a sawi a, ka bial chhungah pawh chutiang chu kan nei ve mek a ni.

Tunah hian Mizoram power consumption kan mamawh zat chu 100 mega watt vel hi a ni a , tun ang state-a kan thar chhuah te leh Power Grid Consumption atanga kan lakluh , zawng zawng hi kan mamawh aia tam a ni. A pawimawh ber ah hi chuan power generation ai mah hian Mizoram in kan mamawh chu a grid neih that hi a ni. Kan thenawm state te an intodelh a, chuta tang chuan duh zat zat lei tur a awm tawh a, amaherawhchu a state chhungah hian a grid kan neih that a pawimawh a, kan tower te, kan line te a hlui tawh a, hengte hi chei that a, mumal zawka kan kalpui chuan power supply hi kan tlachham lovang. Industry te pawh kan din ve thei ang tih te pawh a rin theih a ni.

Land Revenue & Settlement hi ka sawi ve lawk duh a. A thiam te leh record a a lan dan chuan (kan va prove ve chiah lova). Mizoram hi 21,000 sq km approximate a ni an ti a. Tunah hian Land Revenue & Settlement record-ah hian kan ram pum pui record aia lian zawk LSC a awm tawh a ni an ti a ni. Chu chu a dik nge dik lo chu ka hre chiah lo va, chu chuan thu tam tak a sawiin ka hria. Kan hma ami ten an sawi tawh ang khan kan ram neih dan te, vairam-ah chuan kan hria a, Zamindari system an ti a, ram neitu an awm a, mirethei chuan neih ve ngaihna pawh a awm tawh lo, an neih thin ah khan an inhlawhfa pha tawh a ni. Mizoram-ah hian khatieng kha kan thleng tep em tih te pawh hi ngaihtuah tham a ni. Mi hausa ten an theih zat zat ram an invalh a, a loh theih loh bawh a, mi rethei ten sum an mamawh si a, an duh vang pawh ni lovin an mamawhnain a nawr avangin an hralh a ngai a, hengte pawh hi ennawn a ngai khawp mai. Hmanniah Mamit-ah ka kal a, an Revenue office te pawh ka tlawh ve a, an office khu a hlui a, a sak a thalo hrim hrim a, ruah a sur chuan hmun khatah an tawm khawm thin a ni. Chutiang chuan an machine neihte pawh kha ruah a han sur tak tak chuan khuh te a lo ngai a, chutiang

dinhmun chu a ni a. Hengte pawh hi district khata department pawimawh tak office awmte hi kan Minister te leh department lamte pawhin min thum that sak ve thei ang em tih te ka han zawt nghal a ni.

Tin, kan sawi ang khan Rural Development hi pawimawh tak, kan subject a ni a, keini bial tan pheih chuan a pawimawh hle a. Sawi ang khan R.D. Block 26 Mizoramah kan nei a, nei tlem ber pawl state kan ni a. Chutah chuan vanneih siamin nge kan tih dawn, ka bial Mamit constituency hian R.D. Block 4 enkawl kan nei a. Lengpui atangin khutah Zawlnuam R.D. Block BDO 4 kawl awm chhun constituency Mizoramah ka bial hi a ni a, a nei tam pawlin 3 an nei ve a. Chutih mek lai chuan district headquarter ber Mamit-ah khuan R.D. Block kan nei lo hlauh thung a, a sirah kan tlan kual vel a. Mizoramah R.D. Block a tlem hrim hrim a, khung district headquarter-ah te khuan han dah ve chu ni se, khuta tang khuan R.D. Block tlawh tur a tlem zawk dawn bakah coordination te pawh a tha ve deuh ang a tih te kha kan han ngaihtuah a ni. Chu chu min lo hriat sak se la.

Tin, ram chungchangah chuan, central public sector enterprise ho chu Govt. of India hian Global Land Information System (GLIS) hmangin an ram hi mapping turin an ti vek a ni. Chu chu satellite system-ah a awm vek a, ram inchuh buai leh ram hriat loh kha a awm thei tawh lo. Chutiang chuan Mizoramah te pawh hian kan department theuhte hian hemi system hmang hian anmahni set-up neihna leh an ram chinte hi han ti ve ta se, chumi zawhah mimal ramte kha han map leh thei ta ila chuan ram inpekthuah tih ang chi te leh ram awm mumal lova project central-a zuk thehluh ve ngawt ang chite kha a awm dawn lo a ni.

Chutiang chuan ram inpekthuah, LSC inpek thuah avoid-na chikhat a nih ka ring a. Tin, BADP-in area a cover hi 0 – 10 kms a ni a, border area atangin. Hei hi a guideline 2015-ah hian district 106, state 17, Arunachal, Jammu & Kashmir te ho pawh an lo tel ve vek mai a ni a. A sawinaah chuan 0-10 hi tuna hman lai a ni a, hemi saturate hunah chuan 0-20, chumi pawh a saturate leh hunah chuan 0-30 a theih dawn a ni. Chuvangin fund kan hmuh ang ang te hmang tangkai ila, develop ngei theihna turin ti ila. Kan kalpui danah hian hnam chekhawh ho awmna a nia, sum siam nan an tha e tih ang deuh hian kan kalpui em aw ni chu aw tih te pawhin a ngaihtuah theih a. Develop ngei tumin fund kan hmuh nachhan ngei hian han

ti chho ila. Tihcuan kan ti saturate ang a, 0-50 thlengin a theih a, khaw tam tak kha kan cover thei dawn tihna a ni .

Tichuan Mamit hi district headquarter a ni a, hnamzia pho lan theihna te kha min han siam sak vel sela tih te pawh hi a changtu Minister te leh Department ten min lo hriat pui turin ka ngen bawka a ni e. Ka lawm e.

DEPUTY SPEAKER : Nihar Kanti Chakma, West Tuipui bialtu i lo sawm ang.

PU NIHAR KANTI CHAKMA : Pu Deputy Speaker, ka lawm e. Vawiinah Pu R.Lalzirliana leh Pu Lalruatkima te demand kan sawiho mek a ni a. Ka hmaa MLA zahawm tak tak ten an sawi ang khan,

Pu Zira nen 1998 atangin kan tling chho dun a. Pu Zira term 3 a zawnin Minister a ni a, a lawmawm ka ti khawp mai a. A department chan te pawh a tha em em a, a bikin Art & Culture Demand No.23 hi tawi te in ka sawi ang a. Minister kal chhuak ta Pu P.C.Zoramsangliana hun lai khan ka bialah national integration atan te, national harmony atan te Art & Culture Department-in Kornaphully Festival hi an buatsaih a. Ka bial hi in hre vek a, hnam hrang hrang awmna hmun a ni a, hetiang festival an buatsaih thei hi lawmawm ka ti a. A chhan chu inpumkhat nan a tha ka ti khawp mai a. Dampa bialtu zahawm takin a sawi ang khan hmun dang Silsuri-ah te, Tlabung-ah te, Chawngte-ah te pawh hetiang festival hi buatsaih thei se ka duh khawp mai.

Demand No.30 ah hian Pu Deputy Speaker, kan hre vek a, luikama awm kan ni a, kum 50 hnuah soil erosion avangin kan veng te pawh a bo mai ang tih ngaihdan hi ka nei ve a. Kum tin in soil erosion a nasa a, sorkar hian hma min lak sak thei se kan duh khawp mai, kan Minister pawh ka ngen duh nghal a ni.

Demand No.39 power-ah hian, chaw kan ei lai hian power hi kan nei lo ziah mai a, hei hi eng nge a awmzia ka ti thin a, chaw ei laia power awm lo thin hi min en sak thei se ka ti a ni. Tlabung-ah hian current hi duh ang hi min pe ngai lo a ni. Kan hre vek a khua a lum em em mai a, hmun dangah pheichuan khaw lum avangin an thi nual tawh a ni. Tlabung leh a

chheh velah pawh hian an thi lovang tih hi a sawi theih loh a ni. Chuvangin Power & Electricity hian mawhphurhna an nei sang em em a ni. Transformer lah hi a chhia an ti reng mai a, eng nge a chhiat nachhan hi kan hre duh a ni. Chuvangin Minister zahawm tak hian min chhinchhiah sak se ka duh khawp mai. Chumi ruala rawtna ka neih duh chu ka bial Balvachhuah-ah hian Hydel Project hi a ding thei a, ka hriat sual loh chuan senso pawh a tam dawn lo va, mite sawi danin. Chuvangin mithiam te hian thil ti se chu ka duh khawp mai.

Demand No. 38 Rural Development-ah hian sawi tur chu ka nei vak lo va, mahse lawmthu han sawi ka duh a ni. Rural housing te pawh an kutah an pe a, GCI sem tur te pawh an pe bawk a, a lawmawm ka ti khawp mai. Pu Deputy Speake, nangmah kaltlangin lawmthu ka sawi duh a ni. Pu Deputy Speaker, nangmah kaltlangin Tlabung bial mipui aiawha ka sawi duh chu, ka hriat sual loh chuan kumin chungin Tlabung-ah hian RD Block min pe dawn a, lawmawm ka ti khawp mai a, chuvangin ka bial mipui aiawhin lawmthu ka sawi duh a ni. Tlabung hi Civil Sub-Division Headquarter a ni a, RD Block kan neih loh avangin harsatna hrang hrang kan tawk nasa a ni. RD Block min pe dawn tih hi confidential-in kan hre chho a, lawmthu pawh nangmah kaltlangin ka sawi nghal a ni.

Demand No. 6-na, Land Revenue & Settlement hi ka sawi duh a. Lunglei Land Revenue & Settlement-ah hian Surveyor kan indaihlo nasa khawp mai a. Lunglei District hi a zau si a, eng emaw zat Surveyor min pe thei se a lawmawm khawp ang. A chhan chu keini hi Tlabung atangin Lunglei-ah lo chhoh a ngai a, Surveyor indaihloh avangin mi eng emaw zat Lunglei-ah an awm ve a ngai a ni Surveyor lo kal apiang hian ram teh a ngai a, Surveyor hi kan nei lo, kan indaihlo. Chuvangin Minister zahawm tak hian min ngai pawimawh se ka duh khawp mai. Pu Deputy Speaker, chu zawng chu ka sawi theih ni se. Ka lawm e.

DEPUTY SPEAKER : Minute 7 vel a la awm a, dar 4 hi a tlangpuia kan ban hun a ni a, nimin khan dar 5-ah kan chawl a. Dar 4-ah hian kan zo hman dawn lova. Eng nge House ngaihlan le? Dar 5-ah chhuah kan ti leh mai dawm em ni? I ti leh mai ang aw! Dar 5-ah kan chawl dawn nia. Thingpui in chawlh kan nei ang a.

Tichuan Dr. K. Pachhunga, Lunglei South bialtu MLA zahawm tak i lo sawm ang u.

Dr. K. PACHHUNGA : Pu Deputy Speaker, ka lawm e. Demand No. 38-na sawi tlang mai ila. Ka hmaah member zahawm tak takin an rawn sawi tawh a. Minister zahawm tak pahnih demand kan sawiho a ni a. A hmasain lawmthu ka sawi duh a. Thingtlang kan tam a, keini thlingtlang bialtu tan pheih chuan RD Department hi kan inhnangfakna a ni a. Kan VC-te leh worker-te tan an hlu em em a. Chutihlai chuan mipui tan pawh an hlu a. Tin, tun kan sorkar tharah hian kan Minister zahawm takin ka bial, Lunglei South atangin Lawngtlai kal pelin Khawmawi-ah vote 700 dawn an awm a, chu chu Lungsen RD Block hnuaiiah an awm a. Khawtlang mipuite an khawngaihthlak em em a, phone signal a tha mang si lo va, DDO-te dawr turin harsatna tam tak an nei thin a. Chu chu hriain kan sorkar-in Lunglei RD Block hnuaiiah min dah sak a. He House kaltlang hian bial mipuite aiawh pawhin lawmthu ka sawi nghal ni se.

Rural Housing Scheme, in sak tanpuina hi kan sorkar pawhin nidanga an pek thin ang bawkin kan pe leh dawn a. Hetah hian sawi nawi tam tak a awm a. Kan sorkar hian fair takin baseline survey an lo neih tawh te hmang bawkin an pe dawn a. Kan mite, a then chuan ruling kan ni tiin an dawng lo va, “Engatinge kan ruling ve baw a” tiin mi tam takin an complain a. Kan sorkar-in felfai takin baseline survey angin a kalpui a ni tih kha ka sawifiah duh baw a.

Tin, miretheiten in an lo neih ve theih nan RD hian rangva a sem a, nichinah member zahawm tak ten an sawi tawh a. Opposition-te an pe ve lo turah miin an lo ngai a, mahse kan sorkar-ah chuan Opposition MLA-te pawhin rangva kan dawng vek dawn a. Rangva dawn te hi tihtawp loh a thain ka hria a. Mahse tun tumah hian kan Finance Minister leh CM pawhin (interruption) rangva dawna Head a dah a, mahse sum duh angin dah a ni lo mai thei a. Hengte pawh hi sum dah leh ni se tih ka sawi tel duh a.

Tin, Social Education Head-ah te pawh sum duh angin a awm tha lo mai thei a. Hengte pawh hi ngaih pawimawh a tha a. Thingtlang chhawmdawl ngai bikte hall, school leh thil dang dang repair leh renovation atan te a tangkai takzet a ni tih ka sawi tel duh a.

Pu Chairman, ni 100 inhlawhna hi kan mipuite inhnangfakna a ni tawh a. He NREGS guideline hi vairam mil lutuk lo deuh leh Mizoram mila her rem dante awm se chu hnathawh chungchangah pawh awmzia a nei deuhin ka ring a. Tin, an hlawh hi hmu har an inti thin a, vuivaina a tam em em a, hetah hian thawktu indaihlohna te pawh chu a awm ngei ang a. Chung zawng zawngah chuan tan han la leh se tih ka sawi duh a.

Demand No. 33-na, Soil & Water Conservation Department chungchangah hian kan hriat angin department hi a thi lek lek tawha ngaih a ni a, post ruak pawh hnawhkhah loh a ni a, hengte hi hnawhkhah leh ni sela. A pawimawh nachhan chu kan ram mipui 70% hi agriculture-ah kan inngat a; tin, kan ram pawh thlai thar chhuahna hmun tha a ni a. Chutihlai chuan soil testing-te a pawimawh takzet a. Chuvang chuan he department hi uluk zawkin kan sorkar hian ngaihven leh se ka duh takzet a. Tin, min leh soil erosion a tam em em a, heng check tur hian kan luikawrte hi check-dam he department kaltlang hian siam ni se. Tin, ka bial chhung Thaizawl-ah Soil Department-in hmun an nei a, chu chu coffee tih tiah nan an hmang a. Hmanniah kan tlawh a, a building leh a himna hrim hrim te pawh enkawl loh a ni tih kha a hriat a, chhanchhuah a ngai takzet a ni tih kha Minister pawhin min lo hriat sak se ka duh a

Demand No. 23-na Art & Culture-ah member zahawm tak tak ten in rawn sawi chhuah meuh loh chu Mizo culture leh kan nihna te khawvela min pho chhuah saktu chu kan film industry-te an ni. Mizo film tha tak tak te hi thalaiten an tuipei a, a lawmawm ka ti a. Hei hi promote a, zau zawka khawvela kan inphochhuahna a ni tih ka sawi tel duh a. Tin, Mizoten talent tha tak kan nei a. Kan painter te, kan lem ziaktute an chhuanawm ka ti a. Hei hi Art & Culture Department te pawh hian ngaihtuah se tih kha kan sawi duh a.

Tin, Demand No. 26-na Information & Public Relation hi a pawimawh takzet a. Anni hi sorkar hmalakna te, kan Minister te leh kan hotute che vel phochhuaktu an ni a. Zoram hrisel leh hmasawna nei turin mipui ngaihtuahna thudik chanve hnawl ngama tuten emaw rurling an bei vak vak te a bo nan hei hi a tha takzet a ni. Pu Chairman, kan sorkar hian I&PR hi han duhsak leh deuh se, SEDP kan kalpui dawn a, chungah te pawh chuan an pawimawh dawn takzet a ni tih ka sawi duh a.

Demand No. 39-na Power & Electricity Department-ah khan MNF party hrim hrim hian ram intodelh nan Hydel Project hi a ngai pawimawh takzet a. Serlui 'B' Mizoram kutchhuak kan hre vek a, member ten an sawi tawh a, wawiin thlengin commission a ni lo va, sorkar hmasain MNF thiltih te chhunzawm lovin tikhan a rukin kan hmang leh lawi si a. Tin, Tuirial Hydel Project pawh a bul tantu chu 1998-ah MNF sorkar a ni a. MNF sorkarin survey te, DPR te engkim a tifel a, in sakna tur hmanrua lakhawmtu kha MNF a ni a, Zoram puma social media leh thusawina reng renga an sawi thinin MNF-in Hydel Project an tichhe vek tiin an sawi thin a Hei hi mipui thu diklo zirtirna a ni a. Dik taka sawi chuan a chhiatna chhan chu MIFCO Chairman, North East hmusit em emtu Chairman a ni a. NESO-in duh lovin Shillong-ah hnawhchhuah tumin protest an nei a, kei ngei pawh Pi Chila-i ka han protest a. Kha thil avang khan North East project hi a flop a ni tih pawh ka sawi tel duh a. Tin, inchirthehna compensation avangin an tichhia tih te a ni a, nakinah an rawn sawi leh ka ring a. Pu Chairman, dik taka sawi chuan 5% compensation pek theih a ni a, mahse, Tuirial-ah hian cheng hnih leh pawisa 80 chiah an la a ni. Chuvang chuan thu dik chanve hmanga inchirtheha party beih vak vak te hi tibo a tha khawpin ka hria tih ka han sawi tel hram duh a ni.

Tin, power, electric bill chungchang sawi tur tam tak a awm a. Quarter te ka luah ve chiah a, thla hnih pawh ka la luah lo va, ₹ 60,000 bill a rawn lut a. Hei hi chu a dik lovin ka hria Pu Chairman, a thawktute hi tlemin in enfiah deuh hlek se, ka duh khawp mai. Tin, thingtlangah a thawktute an hah em em a, P&E-ah MR tam tak kan nei a, MR loa an chhawr te pawh tam tak an awm a, duhsak an phuin ka hria. Electric hrui zawm hi a lian deuh thin a, hnim te a lo tam a, sam fai te a ngai a. Mi zawng zawng mamawh P&E-a thawktute an chungah he House kaltlang hian lawmthu ka sawi duh hrim hrim a ni. Darkar a tam a, eng lo pawh a tam a, en tum a tam zawk a ni. Chutiang chuan Pu Chairman, power energy chungchangah hian awareness renchem hi a pawimawh tak zetin ka hria a. Thingtlang pakhat ka kalnaah chuan chhunah current a awm lo va, engati nge chhunah current a awm loh, ka ti a, 'zanah kan awm bawk si lo va, chhunah tal kan chhit loh chuan' a ti a. Power renchem chungchangah hian department-in tan la leh sela, cheng tam tak kan save theih ka ring a ni.

Demand No. 6-na National Highway Zemabawk atangin Tuipang road widening hi Mizoram sorkarin India sorkarah crore 7000 vel a pe tawh a, laih

hmabak a ni a. Compensation chungchang leh Revenue chungchangah buaina a awmin ka hria a. Hei hi Zoram hmasawna tur, chhim tawp thlenga double lane kan neihna tur a nih avangin kan sorkar hian compensation te pein tihfel vat sela tih ka han sawi duh a.

Tin, Pu Chairman, kan ram kan hria a, in hmun an ngah em em a, mirethei ten in hmun an nei lo va, in leh lo pawh an nei hleithe i dawn lo va. Ka thianpain in hmun a lei a, Aizawl-ah hian a pathumna a lo nei a, Original pathumna a awm thei, Bill pek leh in hmunah hian tunlai technology thiam te tang sela. Chip dah theih dan a awmin ka ring a, computerised chip dah a, a fake a awm thei loh nan department hi tang se tih kha ka han chah leh duh baw k a. Chutihlai chuan kan ramah land ceiling kan nei thei lova. Tih dan tha bera ka lo ngaihtuah dan thin chu huan nei, thlai siam ngei te chuan tax hi pe tlem sela, ram ruak nei, engmah ti lo te hi a let sawmin chhiah chawitir ila an surrender zung zungin ka ring a. Chutiang chuan in sakna ngei pawh chhiah titem ila, in hmun ruak sak lohna hi chhiah a let 10-in tipung ila, land ceiling hi kan tih theih ka ring a, mahse chu chu Konami property, India ram pawhin a mamawh, Pu Modi pawhin a tih ngam chiah loh deuh kha a ni a. A duh lo tute chu official ami kan nih ka ring a, nuamsa taka an awm duh ka ring vak lova. Mahse, land ceiling neih nan chuan chu chu attach formula niin ka hria tih kha ka sawi thei taw k ni se. Pu Chairman, ka lawm e.

PU RAMTHANMAWIA, CHAIRMAN : Aizawl North-II bialtu zahawm tak Dr. Vanlalhlana i lo sawm ang.

Dr. VANLALTHLANA : Pu Chairman, ka lawm e. Pu R. Lalzirliana, Minister zahawm tak chan Demand No. 23-na atangin tan ila. Art & Culture kha kan hriat tawh angin 34.49%-in a sang chho a. Budget sanna hi ka han enchiang a, 34.49% zingah hian 25% hi hlawh punna a ni. Chuvang chuan hna lakna tur te ka han en a. Grant-in-Aid Non Salary te, a dang charges-ah te pawh a bet tawh ah ngai ila, minor works te, stipend te pawh dah a ni a. Hei hi 13.46% a ni a. Hlawh leh a dang te ah hian 86.54% a ni . Tin, thil vawn that lamah (Archives lamah) hian hma kan lak a ngai khawp mai a, tunah hian digitization lamah hma lak mek a niin ka hria a, lawmawm ka ti khawp mai. Kan Mizo history a ni a, Mizo bakah Mizoram chhunga chengte pawh a ni ang chu, kan history hi duh angin kan nei tam lo ni ten kan sawi thin a. Mizoram University leh College lama zirtirtu te hian hmun dang atangin fund

an dil a, UGC te leh thil dang atangin. Tah chuan zirchianna, research an nei thin a. Heng ah hian Art & Culture lam atang hian tih dan te awm thei se a lawmawm khawpin ka ring a, heng atang hian kan history te pawh chiang leh zual zawkin kan hriat theih a rinawm bawk a ni. Tin, Publication Board lamah hian 2017- 2018 actual ah, a tak taka hman ah khan nuai 15/- dah a ni a. Nikuma revised estimates-ah khan nuai 28.86 /-dah a ni a, kuminah hian nuai 10/- chauh dah a ni mai hi tan lak deuh ngai niin ka hria a, hei hi tihsan chhoh ni se a lawmawm khawpin ka ring. Lehkhabu chhuah lamah kan tan a ngai a ni. Tin, hnam changkang apiang hi arts-ah an sang a. Kan tluk loh thin kan tih Manipur te anni a, an ni arts-ah an sang em em a, a lem ziah lampang mai ni lo deuh, hnam inchei a inchei mai nilo deuh ang chi, dance art lam te, drama lam te, fine arts ah lam te pawh tan kan lak zual deuh deuh a ngai khawpin ka hria.

Demand No.27- na District Council & Minority Affairs hi 9.74 % in a pung dawn a, Autonomous District Council te an awmna chhim lam a ni a, harsatna tam tak an tawk thin a. Hriselna te, zirna leh infrastructure, hmasawna ruhrel lamah hian puih an ngai khawp mai a, an sum hman dan erawh ngun taka enzui an ngai khawp mai. Keini Mizo te hi kan zin chhuahin India ramah minority kan inti a, harsatna tawh chang te kan nei thin. Kan state- ah hian minority te kan nei ve a, engtin nge kan enkawl tih te kan inngaihtuah ve pawh a ngaiin ka hria a, anni pawh hi kan ngaihven a tul khawpin ka hria .

Tin, Land Resources, Soil & Water Conservation hi 19.21 % -in budget pun a ni a, rural development lam PMSKY water shed component te hian a la hek deuh nge ni ka hrethiam lo a, an hmalakna tur hi. Budget pum pui nuai 1958.14/- atang hian a percentage- a chhut chuan hlawh leh thil dang inenkawl na tur kha paih ila, a bang zawng chu 1 % pawh a pha lo, 0.4 % a ni. Chungah chuan department te hian budget kan siamah hian awmze neia, hmalakna tur lang thei tura hma kan lak a ngai khawpin ka hria. Keimahni mai bakah hmun dangah hnam dang ten kan budget te hi anrawn zir thin ang, churang chuan heng-ah te hian tan kan lak deuh a ngai a. 99.5 % ang vel kha hlawh vela a kal bo chuan a manganthlak dawn viau a ni. Engin nge hma an lak tak ang tih kha ngaihtuah tham a ni.

Demand No.39 na, Power & Electricity kha an pung chho ve leh bawk a, tichuan power leina, kawlpheha leina tur atan nuai 30,000/- lai dah a ni a. Tin, kan

hmuh tur receipt budget- ah pawh khan nuai 30,000/- dah a ni bawk a, hei hi subsidy kha a awm dawn lo nge ni ka hrethiam lo a. Mizoram hi kan potential kan hre theuh a, 4500 mega watt nei kan ni a, chutivel siam chhuak thei tur chu a ni tih a nih laiin kan receipt budget ah hydel generation tih ah khan Nil tih a la ni reng mai a. Hei hi kan pawisa lak chungchangah khan tan lak a ngaiin ka hria a, kan generate tam a ngai khawp mai. Tin, Saubhagya Scheme -ah khan North East-ah a che rang ber kan ni a, a che chak ber kan ni te kha a lawmawm ka ti khawp mai. Tlungvel lamah sawn power plant 2 mega watt solar energy siam mek a ni tih ten kan lo hria a, hengte hi tangkai zawka hman theih ni se a lawmawm khawpin ka ring. Solar energy, nizung chakna lamah hian tan kan lak a ngai khawp mai a, power leina turin sorkar department lam hian demand schedule darkar 24 chhung tan a siam thin a. Power te kan lei thin ta a, power lei khulama kan zuk dil hi kan mamawh ni lemlo in central- in kan entitlement, kan dawn theih zat tur minrawn pek khan zuk lei thin a ni a. A chang hian power hi kan mamawh aia tam te hi kan han dawng ta thin a, chungte chu hralh chhuah leh te a ni a, a chang phei chuan leitu tur hmuh loh chang, han lei chuan chang te kha a awm ni ten engineer ten an sawi a. Hei hi kan pawisa a hek loh zawk nan Minister zahawm tak hian lo ngaihven se a tha khawpin ka hria.

Pu Lalruatkima, Minister zahawm tak chan kha han lut ve leh ila. Demand No.6 -na, Land Revenue & Settlement kha budget 30.25 %-in a pung dawn a, nichinah MLA pakhat khan compensation chungchang te arawn sawi a. NEEPCO in RTI zawhna an chhanna ni 30.10.2018-ah khan compensation vanga Tuirial Hydel Project chhunzawm theih loh a nih thu kha chiang takin arawn sawi a ni. Chu chu a copy in duh a nih chuan kan inpe ang a, Environment & Forest Department-ah vaibelchhe 24/- (Pu Speaker, kha chu political debate a ni) . 46-ah an pe tawh a, a company ngeiin arawn sawi a ni. A sawi zel theih a, kha chu sawi zui tawh lo mai ila, Forest Department in reserved forest a nih thu te pawh an tarlang tawh a, kha kha chu debate tawp theilo a ni a. Tin, NIT ram tur Lengpui ah pek a ni a, hei hi Forest Department-in Tlawng riverine reserve forest huam chhunga awm a ni a, clearance rawn dil teh u an ti a. Chu chu ram inpek a nih dan hi ngaihtuah that deuh emaw, hmun dang tha deuh hlek te kha zawn sak zawk chi a ni ang em tih te kha rilru-ah lo awm ta se. Land reforms kan mamawh khawp mai a, Land Ceiling Act te nichin khan sawi rik a ni a, kan mamawh zia chu a lang a. Tin, tax pawh hi a slab-in, a ram neih tam dan a zirin a nei tam apiangin an chawi tam mai dawn a, a

rate kha a sang tual tual mai ang a. Khatiang te kha kan mamawh tawh viauin ka hria a ni.

Tin, Mizoram Land Revenue Act 2013, section 76- naah khan Revenue Officer office hi Revenue Court ni nghal tura sawi a ni. Amaherawhchu kan inkhing nuaih nuaih mai a ni si a, Mizoram State Revenue Tribunal te hi din theih tura notification chhuah a ni tawh a, kan la nei lemlo a, Court lama chinfel ngai tam tak hi awlsam zawka chinfel a nih te pawh a beiseiawm a. Hengahte hian hma lak ni se a lawmawm khawpin ka ring.

Demand No. 26-na I&PR hi en leh ila. Budget 9.60% in a pung dawn a. Journalists Journalism phei chu 4th Estate tiin sapho in an sawi a, an ngai pawimawh viau thin a. Journalist te ngaih pawimawh an ni chho dawn ni te-in ka hria a, ka lawmpui khawp mai a. Amaherawhchu an nghahhlelh em em thin Advertisement & Publicity lamah hian budget nikum let 20 dah kha a ngai tho, nuai 20 dah leh a ni a. Rate tihpun te kha sawi a ni a, khalam kha an la ngaihtuah chiah lo nge ni ? Tin, Press Study Tour te neih thin a ni a. A then chuan article te ziakin kan lo en thin a. Hetianga kalte hian mumal takin report te han ziaak thin se website-ah an kalna chanchinte hmuh theih ni se a lawmawm khawpin ka ring a. I&PR budget punna hi nuai 133.67 a ni a. Amaherawhchu hlawh punna ve thung hi nuai 164.66 a ni a. A budget pum pui a punna ai khan a rawn sang a. Hei hi a chhan chu thil dangah hmalakna tur dang te, Other Charges-ah kum hmasaa 160 awmte kha 110-a a tlakhniam vangte a ni a hmasawmna lampangin. Hmalakna lamin a tuar dawn a nih hmel e.

Demand No. 38-na Rural Development kha en leh ila, 9.98%-in a pung dawn a. RD hi khawpui pawna chengte nghahfak a ni a, an ngaihven khawp thin a. State Level Monitoring Cell & Internal Audit Cell (IAC) te an awm a. Hei hi monitoring leh audit ti tur an ni a, hna hi an nei tam lo khawp mai a, Secretariat lamin an laksak nasa a, hengte hi enchian a ngai a. BADP te, NREGS tih te mi tam takin an sawi tawh a. Hei hi chu ni tam zawk thawh theih dan tur ngaihtuah ni se tih kha a ni deuh mai a. SIRD kan nei a, Rural Development lama kan zirna in neih a ni a. Research & Training lamah hian hma lak tam theih ni ta se tiin PMAY Gramin te, HFA tih te a awm a, mi tam takin chenna tur inte an neih phah a. A mamawh tak takin an dawn theih zel nan hengte hi hma lak ni zel se. Nichina an sawi NEDP

hnuai Social Education-a an dah te kha, khatiangte kha chhunzawm tlak a nih chuan chhunzawm zel ni mai se a tha khawpin ka hria.

Tin, IWMP tuna PMSKY, tuna Watershed Component an tih tak hi kan leilung riral tur vengtu leh ruahtui khawlna tuihna siam tura pawimawh tak a ni a. Hei hi thingtlang tinah hian tha taka bawhzui ni se a thain ka hria a. DRDA nichinah khan anrawn sawi a .Employees chungchangah khan kum 2004 leh 2009-ah dah ngheh an ni tawh a, grade ngaiah dah ngheh an ni a. Tunah hian PSU anga tiha dahhniama, an hnathawh kha tihniama chutianga dah ngheh tumna te a awm niin kan lo hria a. Hei hi High Court-in November, 2017-a thla 3 chhunga dah nghet tura a tihna te nen kha chuan a inanglo ta deuh a. Health Worker 185 2017 khan dah ngheh an ni a. Tin, Staff Nurse 70 2018-ah a ngaiah chiah dah ngheh an ni bawh a. Hei hi Minister khan lo enzui se tih ka ngen a ni e. Ka lawm e, Pu Chairman.

CHAIRMAN : Tunge sawi leh ang le. MLA zahawm tak Pu Rokhaw, Tuipang bialtu i lo sawm ang.

Pu K.T. ROKHAW : Pu Chairman, ka lawm e. Demand No. 38-na Rural Development Department hi ka han sawi phawt ang a. Rural Development Department changtu hi opposition te lo ni tawh,a leh lamah chuan tunah RD Minister a ni hi a lawmawm ka ti a. Amah hi thalai, mi viak tha tak, opposition pawh lo experience tawh, MLA opposition 5 chauh an nih lai pawh khan MNF thlang hauhtu ber, tuna sorkarna an lo siam theih nachhan pawh hi a thawhrah tih theih khawpa theihpatawp lo chhuahtu a nihna lai te ka ngaihtuah a, RD a chang hi a lawmawm ka ti a.

Tin, keini border-a awmte dinhmun hi Minister hian min hriatchian a pawimawh khawpin ka hria a. Border-a awm kan ni a, kan hnufual bik khawp mai a. Chuvang chuan Border Development Fund hi keini tan chuan a pawimawh em em mai a. Kan bialah border area-ah hian BADP pawisa hi development tak tak, development pawimawh tak a ni a. Agriculture link road te, khaw inkar kawng siamna te, playground siamna te, Community Hall sakna te hi BADP pawisa atanga kan hman hi a ni ber a. Chumi avang chuan BADP hi a pawimawh khawp a. Helaia Minister-in min hriat sak ka duh em em chu BADP scheme hi a scheme siam lai hian keini MLA, a bialtute hi rawn ve theih ni se a tha khawpin ka hria a. A chhan chu a scheme hi a tlangpuiin BDO in a siam a, BDO a VC tlatlum deuh ten an duh

an sawi hi a hnathawh tur hi, a scheme-ah hian an lo telh mai thin a. Chuvang chuan, khaw thenkhatah hnathawh tur pahnih pathum a awm laiin, khaw thenkhatah chuan hnathawh tur pakhatmah nei lovin an awm thin a. Chumi avang chuan BADP area bikah hian V/C te, NGO te rawna he scheme hi siam thin ni thei se la, MLA a bialtute hriatpuina-in. Tin, District Council area-ah erawh chuan MDC leh MLA te hriatpuin he scheme hi siam thin ni se a lawmawm khawp ang. Chutiang a nih chuan he BADP pawisa hmanna hi a effective ang a, development hna pawh rualkhai takin a kal theih ka ring a ni. Tin, BADP hna hi engpawhnise, a area ami te hi duhsak hram ni thei se tih ka ngen duh a, a chhan chu he BADP hna an thawh atang hian mi tam tak an ding chhuak ve a ni. Tin, a area amiten hna an thawh hi chuan thahnem an ngai zawk a, an lo thawk tha lo a nih pawhin a khua amite khan 'i thawk tha lo a ni' tiin an complain a, tha deuhin an thawk leh thin a ni.

Tin, a area pawn atanga lo thawkte hi a chang chuan an thawk tha mang lo a, a then hi chu an thawk tha ve tho a. A chang chuan thawk mumal lo hian an kalsan (PU RAMTHANMAWIA : Kan inthlak lawk ang aw) Deputy Speaker at the Chair.. Pu Deputy Speaker, chuvang chuan a theih hram chuan a area chhung amite hi duhsak bik ni se tih ka ngen duh a, a area pawn amite a bik takin Aizawl lam, Lunglei District amite an lo thawk a nih pawhin BDO te hian an hna hi enpui uluk deuh se tih ka ngen duh a ni.

Tin, Pu Deputy Speaker, MGNREGA hnuiaia material component hi tlem han sawi ka duh a. Hemi pawisa hi a hma chuan VC kutah dah a ni thin a, mahse tunah chuan VC kuta dah ni tawh lo in Project Director kutah hian a awm ta a ni. He material component pawisa hi a tam tham ang reng thin a, a hman dante hi keni a bialtu MLA te hian kan hriatpui ve reng reng lo a ni. Chuvang chuan material component pawisa hman dan turah hian a enga pawh chu ni se MLA te hi rawn ve ni ta ila, an hmanna hi hriatpui ve ta ila a thain ka hria a ni. Tin, a pathumnaah chuan IWMP chungchangah tlem han sawi leh ka duh a. IWMP hi mi retheite chawikanna tura project pawimawh lutuk a ni ta a ni. Kan bialah khian hemi project hi 3/4 tunah hian hma lak mek a ni a, a bik takin Chakhang-ah khian IWMP hi Chakhang-I, Chakhang-II, Chakhang-III, Siasi, khaw 4 velin he IWMP hi an thawk mek a. 2012-2013 atang khan tan a ni a, a estimated amount hi ₹ 6 crore a ni a, vawiin thleng hian ₹ 1 crore chauh an hmang a. An hnathawhna pawh hi hmuh tur vak a awm lo a.

Chuvangin IWMP thawh turah pawh hian MLA hote hian an thawh dan te, an sanction-te, an work-order te pawh hi hriatpui ve vek ila a tha khawpin ka hria.

A bik takin Saiha District-ah chuan tunah MTP (Mara Thyutlia Py) an awm a, tunah hian development, a bik taka district-a development hna an thawh hi an thawk dik em, a dik lo em tih a entu bik NGO-hote pawh khi a monitoring-ah khian anni khi awm thei se a tha khawpin ka hria.

Pu Speaker, a pahnhnaah chuan Information hi tlem han sawi leh ka duh a. District Information Officer-hi an pawimawh em em a, VIP te an kal hian Information Department hi an buai thei em em a. Ka hriat danah chuan District-a IPRO Officer-te hian vehicle an nei lo a, motor provide an niin ka hre lo a. Chuvang chuan hei hi a pawimawh khawpin ka hria a. Engpawhnise, District Officer-te hi vehicle/motor provide theih ni se la a lawmawm khawp ang.

Pu Speaker, Demand No. 39-na Power & Electricity hi ka sawi leh ang a. Tuipang Lui Small Hydel Project hi kum 2011 khan leiminin a power channel leh a four-bay a ti chhe vek a. (Pu Deputy Speaker, thutna in inthlak lai khan minute 2 vel chu ka paih a nia). Tichuan DPR siam a ni a, a estimate kha nuai 300 vela siam a ni. Chu chu tunah hian thawh mek a ni a, hmanni lawk pawh khan a hmunah ka zu tlawh a. Kan Minister zahawm tak hian theipatawpa khi hna khi a rang lama zawh theih tura hma min lak sak turin ka han ngen a ni. Engpawhnise, zawh fel a nih hnuah mega watt engzah vel nge min pek theih ang tih kha nakinah min hrilhfiah thei nghal se ka lawm hle ang. Tin, 33 KV sub-station Phura ami hi Indo-Nabin project Kolkata-in an thawk mek a. Chutih laiin Phura climate hi a lum em em avangin he project zawh hun hi mipuiin an nghakhlel hle a. Hei hi a rang lama zo fel turin kan Minister zahawm tak ka ngen duh a.

Tin, Electric Department MR-a thawk ho hi.. (DEPUTY SPEAKER: *I hun a tawp der mai*) hi kum 25 thawk tawhte, a then kum 28 thawk tawh te an awm a, waviin thlenga MR-a an la awm hi a ni tawh em em lo va, chuvang chuan kan sorkar chak tak hian he mite regularize theih dan hi ngaihtuah thei se a lawmawm hle ang.

A tawpnaah chuan Pu Deputy Speaker, Tuirial Hydel Project kha sawi ka tum lo va, nichinah khan member pakhat khan a lo sawi takah chuan han sawi lan ve ka duh a. A dik takin Tuirial Hydel Project hi chu he project a hmalatu leh

tihlawhtlingtu hi chu Congress sorkar a ni tih Mizo mipui te hian an hre chiang a ni. A dik tak chuan Tuirial Hydel Project kha Congress a sorkar a hma a lak lai khan compensation claim tute kha 40 chuang hret chauh an ni. Tichuan MNF kum 10 a lo sorkar khan compensation claim-tute kha 800/900 vel an lo tling ta a, chuvangin NEEPCO khan compensation claim-tute a pek theih tawh loh avangin a rauh san ta a nih kha! Chumi avang chuan vawiina Tuirial Hydel Project 60 mw pe chhuak thei kha MNF sorkar hmasain a hluihlawna kha Congress sorkar khan theihpatawp chhuahin a zo a. Tichuan vawiinah hman theihin a awm ta a, chuvang chuan Congress sorkar chungah khan lawmthu sawi kan ba nasa a sin. Pu Deputy Speaker, kha Congress sorkar laia kan Power Minister kha tun MNF Sorkar-a Power Minister a lo ni leh hi a lawmawm ka ti a, a chhan chu Tuirial Hydel Project MNF sorkar-in a hluihlawn tawh, Congress sorkar laia Power Minister a nih laia ti hlawhtlingtu vek kha vawiina Power Minister a lo ni hian beiseina sang tak min neih tir a ni. Ka lawm e.

DEPUTY SPEAKER : Pu C. Lalmuanpuia, Aizawl North-III bialtu zahawm tak i lo sawm ang.

PU C. LALMUANPUIA : Pu Deputy Speaker, ka lawm e. Vawiinah Minister zahawm tak pahnih Pu R. Lalzirliana leh Pu Lalruatkima te demand kan han sawi thei hi a lawmawm ka ti tak zet a. Demand No. 39-na Pu R. Lalzirliana, Minister zahawm tak chan Power & Electricity atang hian han tan ve ka tum a.

Hei hi department pawimawh tak a ni a, a tam tham viau a. Amaherawhchu duhthu a sam loh lai te pawh kan demand han en hian a awm thei awm e. Power & Electricity Department hi a tello chuan kan awm thei lo a ni a. Tin, staff thawktute pawh an hah hle thin a, Sunday-ah te pawh hian an awl mang lo a ni. Chhun zan zawm hian hna hi an thawk ni ber hian ka hmu a, an indaihlo em em a. Tin, khawl kan neihchhun te pawh hi a lo tar lam deuh tawh a, member zahawm tak tak ten an sawi ang khan, siam that ngai hi a lo awm ve nual tawh a, henge hi thum thata en that tul tam tak awmin ka hria a. Chung zingah chuan Transformer te pawh hi an indaihlo hle tih a hriat a, Ka bial chung Electric Veng-ah te pawh peak hour, zantir dar 7 bawr velah hi chuan a puak deuh fo a ni. Minister zahawm tak a changtu pawh hi ka sawipui a, a thlakna tur a lian kha an la nei thei tlat lo mai a, chuvang chuan Transformer te pawh hi a lian zawk, a tha zawk, a spare thlenga kan neih theih hi

chu a pawimawhin ka hria a, a tel lova kan awm theih miah loh avang hian hei hi kan ngaih pawimawh zual a tulin ka hria a, kan thuam that a tul em em a ni. Power hi kan la intodelhlo a, ram dang atangin kan chaw lut nasa a, kan thenawm state atang ten, chuvang chuan a intodelh zawnga hma kan lak a tul a. Nichina member zahawm tak ten an sawi ang khan khang Hydel Project Serlui-B kan tih te kha tunah chuan thuam that mek a ni tih an han sawi kha a lawmawm ka ti a. Tin, 12 megawatt pe chhuak thei tura ngaih a ni a, tunah hian 8 megawatt pekchhuah theih a ni tih te kan ngaihla a, lawmawm ka ti a. Khatiang chi khan hmun hran hrana tuna kan neihsa ho hi thuam thata, kan power pek theih zat dawng thei tura ruahmanna kan siam hi tulin ka hria a ni.

Chu, chutih mek lai chuan Pu Deputy Speaker, tuikhuah zawnga hmalak chhunzawm zel hi chu a tha em tih ngaihdan ka nei a. A chhan chu tui han khuah hian kan ram a hek a, hmun a hek a, space a luah zau em em a, hei aia awlsam zawk natural gas hmang te pawh hian hma a lak theih tawhin ka hria a, heng zawng hian ke kan pen tan te pawh hi a tulin ka hria. Meidum-ah tunah mai pawh hian drilling te an bei a, natural gas tam tak kan lei hnuaiyah hian a awm a ni tih hriat a ni a, heng la chhuak zawng hian bul han tana han buaipui hi a van chakawm tawh em tih kha ka sawi duh a. Kan thenawm state mai Tripura te pawh kan hria a, Gomatia District-ah tunah pawh khulai Belpana khuaah khuan an ti mup mup a, natural gas hmangin thermal power an siam a ni.

Keini pawh hian kan tih theih loh ka inring lo va, he lam zawngte pawh hi han hawi ve ila a lawmawm khawpin ka ring a. Chutiang zawnga kan rilrute pawh han buatsaih tan hi tulin ka hria a, chungte chu ka han sawi kai duh a.

Tin, electric wire khawpui chhunga kan han zam kual te pawh hi tunah chuan hma te kan sawn viau tawh a. Theihtawp kan chhuah a, a changa han accident zauh zauh, mi han man zeuh zeuh, nichina kan sawi angte pawh kha a awm a. Kan hma hun lo kal zel turah chuan, engtikah nge lei hnuaiyah te kan phum bo ve theih ang, mumal zawka ruahmanna kan siam theih ang tihte pawh hi a nghahhlelawm khawpin ka hria a. Pu Deputy Speaker, chungte chu ka rawn sawi tel duh bawk a.

Tin, vawiina a sunna kan hman Pu Lalrinchhana kha vawiinah ka hrechhuak a. Phai-a a inentir tur kha ka han thlah liam a, chutah chuan thu min chah a nei a. An in bulah khian high mast a awm a, a eng thei lo va, in ti eng dawn lo a nih law law chuan a sut dan hi min ngaihtuah pui la tih kha min lo chah a. Vawiinah he House zahawm tak-ah hian ka puang chhuak duh a. A enkawltu tak chu AMC lam nimahse, Electric Department-te kha eng emaw chenah mawhphurhnain nei tho in ka hria a. Engpawh nise, kan Minister zahawm tak khan min lo chhinchhiah sak sela, kan House zahawm takah hian ka rawn puang chhuak duh ve hrim hrim a ni.

Demand No. 23-na Art & Culture-ah kal leh ila. An hmalakna a ropui thin a, kan Mizo ro hlu leh thil pawimawh tam tak vawn him kawnga hma an la hi a ropui ka ti a. Hmun hrang hrangah Lianchhiari lunglen tlang tih emaw, Thasiama seno neihna han tih ang chi te, Fiara tui tih te leh kan heritage tam tak hmun hrang hranga awm kan han humhim te hi a lawmawm ka ti a. Hengte pawh hi hei aia tha leh zuala tih dan te pawh a la awm in ka ring a, mahse a lawmawm tawk viauin ka hria .

Tin, kan hnam ro hlu leh nunphung zia han phochhuahna kan Museum-te pawh hi tunah hian a hmuh tlak ve viau tawh a, a lawmawm ka ti khawp mai a. Amaherawhchu, tan lakna tur kawng hrang hrang hi chu a la awm in ka hria a. An demand pun dan han en hian hmalakna tur tlemazawng chu a awm theiin ka hria a, hengte pawh hi a lawmawm ka ti a. Thuamthat leh thawm ngai, kan ro hlu vawngchim tute an ni tih kha ka sawi lang duh bawka ni.

Land Resources, Soil & Water Conservation tih lai pawh hi tlemazawng han sawi ka duh a. Nichin khan rubber te, kuhva te kawng hrang hrangin kan sawi a, kan intodelh theihna tur kawng he department-ah hian a awm a. Kawng hrang hrangin hmalakna tur tam tak a awm a, coffee-te pawh kan han sawi a, Coffee Board-te pawh kan han ruahman a. Khang zawng zawnga kan hmalakna kha a lawmawm ka ti a, hna thar chhawp chhuah tur tam tak a awm in ka hria a ni.

Tin, Board han sawi takah chuan, board chi hrang hrang kan nei ve a. Mizoram-ah hian kan PSU te enkawltu tur chungchangte pawh hi ka lo

mitthla a. Sawi chhuah chi a ni lo em ka hre lo va, central-a kan Board te kan thlir a, Spices Board te, Cardamon Board te, Rubber Board te pawh an nei a. Anni ho Board enkawl dante khu an changtlung riau a, a lawmawm ka ti a. Khungahte pawh khuan hmalakna tur tam tak a awm in ka hria a. Anni te pheih chu IAS senior ten an han thut a, hma an han la tak tak te khu a ropui ka ti thin a. Kan ramah te hian engtikah nge kan tih ve theih ang? Heng Board enkawl tur hian engtin nge hma kan lak ve theih ang tih te hi ka rilruah a rawn lang a. Tih tak zet a kan Board te hi kan enkawl chuan kan ram leilung, kan ram hausakna hi a tha a, hmasawmna tur tam tak a awm in ka hria a, chungte chu ka han sawi lang leh duh bawk a ni.

A pathumnaah chuan Demand No. 38 Rural Development hi ka sawi leh duh a. An budget pawh 9.98% vel khan a pung ve a ni a. Zokhaw lam, rural lam hi an ngaihpawimawhawm hlein ka hria a. R.D Block-te pawh kha, kan ram hmasawmna kal tak tak tur chuan han tih tam deuh te pawh kha a chakawm tawh khawp mai, 26 kan nei a, state dangte han thlir khan tlem chuan rualawh chu a na deuhin ka hria a. He lam hawi zawnga ke kan pen tam hi a tulin ka hria. Khawpuiah pem luh ruih ruih tum lova Zokhaw lam ten khatiang lam zawnga hma kan lak te pawh hi a tul em aw ka ti a, chungte pawh chu ka sawi lang duh a.

Chuta langsar deuh pakhat ni 100 inhlawhna hi ka vei ve em em thin a. Ni 100 inhlawhna hi kan tangkaipui khawp mai a, a lawmawm tak zet zet a, tihpun deuh deuh pawh a chakawm em em a ni, Pu Deputy Speaker. Amaherawhchu, ni 100 kan inhlawh dan hi kan va thawk chhuak a, chawhma te an va thawk a, hemi kan hnathawh dan ah hian ka ngaihtuahna a kal thui thin khawp mai a. Kut tling loa hnathawh kan inzirtir deuh em aw tih ngaihdan te ka nei a. Hna hi thawk tak tak ila, thawk tam ila, nilenga hna thawk a, ni vanvuaia hna thawk tura kan inngaihna kha, hei hianin kan hnathawh kal zelah hian a tha zawng hian min pawt em aw tih ngaihdan ka nei a. Heng kan demand zawng zawngte pawh hi a hlawhtlinna tur chu kan thawh tak taknaah hian a inngat dawn a ni. Pu Deputy Speaker, hna hi kan thawh tak tak loh chuan he ramah hian hmasawmna tluantling a awm dawn lo va, kan ke pen hi a bai dawn a ni.

Kan ram han thlir hian Aizawl chhung ngei pawh hi han thlir ila Pu Deputy Speaker, kan hnathawh dan hi hei aia nasa zawka ke kan pen a, taihmak leh zual hi a tulin ka hria a. Zingah han kal ila, dawr-te pawh hi dar kua/dar sawm velah hian kan inhawng manglo a ni. Tin, tlai-ah han ti ila, kan inkhar hma leh si a. Helaite pawh hi kan inpawhfan deuh hi a tul em aw ka ti a. Hna thawh tam lai hi kan dinchhuahna tur leh kan ram in hma kan sawn theihna tur a ni a. Ka vei ve em em thin a, helai hi Pu Deputy Speaker, vawiinah sawina hun remchang niin ka hria a. Taihmak, tih tak tak, ram dang mi fate aia kan thawh nasat zawk a tul a ni. Kan ram dinhmun han en hian, kan thawh hun chhung hi tam sela, a tak taka hna thawka ke pen chhuak tur, tunhmaa kan pi leh pute han en khan zingah an thawk chhuak a, ni tla vanvuaiin zanah te an haw leh thin a. Khatiang deuh tak tak a, (mi zawng zawng hi ka tihna nilo in), khatiang zawng deuha taima a, thawk tam tur zawnga kan inzirtir hi a tulin ka hria . A tak taka kan thawh hi a tulin ka hria a ni. Sawi tur ka ngah khawp mai a Pu Deputy Speaker, a lawmawm e. Khati chinah khan ka duhtawk mai ang e. Ka lawm e.

DEPUTY SPEAKER : Hun i hmang thiam hle mai, tunge sawi leh ang ? Pu C. Ngunlianchunga, Lawngtlai West bialtu MLA zahawm tak i lo sawm ang u.

PU C. NGUNLIANCHUNGA : Pu Deputy Speaker, ka lawm e. Vawiinah Minister zahawm takte Pu R. Lalzirliana Demand leh Pu Lalruatkima demand te sawiho tur a ni a, Department pasarih a ni a, kan sawi leh zung zung mai ang e.

Pakhatnaah chuan Demand No. 27-na District Council & Minority Affairs atang hian bul han tan ila. Vawiinah hian helai House-ah District Council chungchang sawi theia ka awm hi lawmawm ka ti khawp mai a. Pathian leh mipui avangin District Council-ah sawn kum 20 dawn ka lo awm ve tawh a, helai hian Mizoram sorkar atanga inenkawl danah te pawh duhthusam tam tak kan nei ve thin a. Tichuan, a hmasa bera ka sawi duh chu Pu Rintluanga Sailo, MLA zahawm tak Dampa bialtu khan India sorkar leh Mizoram MNF-te inremnaah khan minority ten an chanvo an hmuh theihna tur atan point-ah dah a ni e, a ti a. Pu Rintluanga'n minority te a

ngai pawimawh khawp mai a, lawmawm ka ti a, khangte kha a rawn sawi chhuak a. Chutih rual chuan Pu Deputy Speaker, kan hre theuhin ka ring a, Mara Autonomous District Council-ah Inquiry Commission tirh niawm tak a ni a, chumi avang chuan Congress sorkar dinglai chu hlauin BJP-ah MDC zawng zawng an inzawm ta vek mai a. An hlauh nachhan chu Mizoram-ah MNF a sorkar apiang hian District Council te saw sawisak an ni thin a, chuvang chuan be la, be lo la ka talh tho tho ang che tih hlauin “Central sutpui kan vawn mai loh chuan kan tan himna a awm lo a ni” an ti a ni, an khawngaih thlak khawpin ka hria. Chuvang chuan, vawiinah District Council Affairs Minister, ka bula thu Pu K.T.Rokhawa'n a sawi ang khan senior tak leh pa tha tak a ni a, ani phehi hi chuan a ngaihdan a nih ka ring hauh lo va. Vawiina kan District Council member te zahawmna te, sorkar zahawmna te pawh vawng hlei thei lo va an han tlanche mai khi an khawngaihthlak hle a ni tih he House kaltlang hian ka sawi duh a ni. Chutih rual chuan Pu Deputy Speaker, District Council-in a lo ti dik lo va, District Council sorkar-ah sawn ti diklo an lo awm a nih pawhin, a sorkar anga innamthluk emaw, in dissolve emaw, in suspend emaw ni lovin, a ti diklotu kha Jail-ah pawh a tul chuan tan tir mai ni sela. Chutiang zawnga kalpui a nih loh chuan sawlaiah sawn hnam angin sorkar kan neih saw a khawngaihthlak tlat a ni. Kei pawh ka sawi tawh ang khan District Council-ah hun rei tak ka lo awm ve tawh a, Congress sorkar-ah khan hetiang ang a awm a nih chuan ACB case te, CEM ni laite, DEM ni laite pawhin an awrh mai a, tunah pawh hian eng emaw zat ACB case nei, kal mek an awm a ni, khalaiia sum hman dik lohna avang khan.

Vawiinah hian he sorkar thar ngei pawh hian, a sorkar angin sum leh pai a hman diklo vek lovang, amaherawhchu khami atanga sorkar hnuaia thawkte, mimal anga lo hman diklo ta te pawh an awm a ni, thla ruk lek la kal chung hian. Entirnan - Civil Aviation Department-ah helicopter charter-na, keimah ngeiin ka charter-na cheque ka pek te pawh private account-a lut a awm a ni. Khangte kha sorkar anga action lak ngawt chi a ni lo, a ti diklotu khan a tuar mai tur a ni. Chutiang chuan helicopter man te leh consultancy firm atanga kha Aviation Department-in hna a thawhna tur, private account-a lo dah luh mai te pawh kha, vawiina kan House Leader

zahawm takin a tih tir a ni hauh lovang, an lo enkawl venaah khan mimal tih dik loh kha chu mimalin tuar mai thin sela. Chutiang chuan District Council-ah pawh, District Council-in a hnuaiia thawktute ah sum leh pai hman dik loh a lo awm a nih chuan, a Council anga inthiah sak emaw, in dissolve sak emaw, ni lo sela. India dan pui duangtu ten India ram chu pangpar huan zau taka awm ang, chutah chuan pangpar chi tinreng a par anga, anmahni par theuhin an par tur a ni a tih angin he Zoram khawvelah hian minority an ni emaw, an ni lo emaw, anmahni par theuh hian inpar tir ila, Autonomous Council-te pawhin anmahni ro inrelna an neih saw zah sak ila, thuneihna lian zawk te, sum leh pai tam zawk te pe ila, tichuan he Zoram hi ram nuam takah kan siam ka beisei a ni.

Tichuan Pu Deputy Speaker, tuna kan kalphung leh kan hriat lar em em District Council ten an buaipui em em thin, direct finance tih an sawi an sawi nachhan pawh hi sawlai Autonomous Council a nih vena anga thuneihna tawp nei a, Mizorama party dang entirnan Congress District Council-ah a sorkar a, Mizoramah MNF a sorkar-a, Mizoram-a sorkar an nih loh chuan thiah mai an nih zelna te awm thin hi an duh lo va, chumi atanga tal chhuah ve duhna lian tak a ni tih lai hi vawiinah Pu Deputy Speaker, he House zahawm tak kaltlangin ka sawi duh a ni. Vawiinah hian kan District Council te saw, nimin lama kan budget sawiah Education Department chungchang Lawngtlai East bialtu zahawm tak Pu H. Biakzauva'n a sawi ang khan 6th Schedule-ah Elementary Education chu District Council thuneihna a awm tur a ni. Chutih mek laiin Middle School eng emaw zat saw Mizoram sorkar-in a enkawl tlat an awm a ni. Sawngte pawh saw District Council thuneihna a nih angin elementary chu, an area ami chu District Council kutah hand over mai ni sela, thuneihna kha pek mai ni sela. Tin, department angte pawhin dual function a tam em em a ni, sawlaiah sawn. Chu tak chu District Council-in department a neih ang chi te reng reng saw chu state atang hian withdraw mai ni ta se, District Council-ah kha pawisa kha an hnathawhna tur a awmlo a nih pawhin, a awm ang ang District Council area-a sum leh pai state-in a lo hman thin kha District Council-ah chhun luh ni se, District Council ramri chin chhung lamah saw chuan District Council thuneihna awm ta se chuan ka rindanin direct finance te pawh hi an dil an dil lo maithei a ni. Tin, sawlaia

an thuneih vena public mandate, mipui thlan tlin an nih vena zah sak a, helaia an nawm an maka thiah mai zel ang chi hi chu awm tawh lo hram se tih vawiinah hian Pu Deputy Speaker, nangmah kaltlangin he House zahawm takah hian ngenna ka siam duh a ni. An inthlan leh hunah, general election an neih hunah, ro an rel diklo a nih chuan, mipuiin thlak ve mai rawh se. Chutiang ni lova, sawlaia kan Council rorelna hetiang a sawisak thin hi awm tawh lo hram se tih ka sawi duh a ni.

A pahnihnaah chuan, Soil Department hi a awngrawp khawp mai a. Lawngtlai-ah sawn Division kan nei ve a, kawng thlangah sawn a awm a. An office pal hungna leh an building hrim hrim te pawh hi an khawngaihthlak a ni, department ve si, a hming chuan an kal ve a mahse engmah activities an nei thei tawh lo va. Minister senior tak leh chak tak kan nei a, kan Minister zahawm tak hian kan Division te hi a nih dan tur ang diak diaka thuan a nih theih loh pawhin tun ai tala hmasawna hi kalpui thei se. Kan ram leilung hausakna luangral zel tur humhalh tur pawhin an pawimawh em em a ni tih tawite in kan sawi duh a.

A pathumnaah chuan Demand No. 39-na Power & Electricity chungchangah hian tuikhuah lama han intodelh tur leh hma thar han lakna tur kha kan House Leader, Finance Minister speech-ah te leh he kan sorkarin hmalak a tumnaah tarlan a awm lem lo va. Mi thil neihsa atanga inenkawl that te pawh hi kan mamawh chin a awm niin a lang a. A bik takin kan bial angah te chuan, Pu Rintluanga bial leh ka bial hi a inang khawpin ka hria, kan kilkhawr a. Sorkar hmasa khan RDGBY hmangin hma an la a, electric hruite chu an thlung ve a. Vawikhat a eng zawk a, abak zawng chu a hruie zawng kan hmu a, a chat a, engtihnamah a ni leh tawh lova. Chuvangin, kan neihsa thawm that leh kan miten eng an hmuh that ve theihna tur hi kan ngaihtuah a. He sorkar chak tak hian a kalpui a pawimawh takzetin ka hria.

Demand No. 6-na Pu Lalruatkima Department enkawlah lut lawk ila. Land & Revenue Department hi thawktu an indaihlo khawp mai a. Aizawl lamah kan lo awm ve a, in hmunte kan han nei ve a, hming thlakte kan han duh a, a thang rei thei khawp mai. Surveyor te kan han bia a, a hmingin MLA te Pathian leh kan hotute duhsakna azarah Minister-te pawh kan han ni ve a, mahse a tih hleihtheih loh a ni.

Chuvangin, sorkar tharah hian Minister chak tak leh viak tha tak leh a ngaihna hria kan nei a. District Council-a ka awm laiin EM ka nih laiin Revenue hi

ka enkawl ve tawh a, department enkawl hahthlak tak, lungawina awm lo department niin ka hria a, Revenue Department hi a hahthlak ber mai awm mang e ka ti a. A chhan chu chatuan daih roreltu enkawltu department a ni tlat mai a. In hmun lo ram pute atanga inthlahchhawng zel kan ni a. Tin, thawktute lamah eng emaw remchang hmangin thawktute baw pass kan inpek thua bur bur a. Khimi RIPAN hnuaiah khian 1987-a in hmun pass ka neih kha, min lo pekthuah a, Revenue Department-a tax ka pek reng laiin ka chan hlawm ringawt a. Department lam indaihlohna te pawh a nih ka ring a, department indaihlohna hi thum that a pawimawh khawp mai tih ka sawi duh a ni.

A tawp ber atan chuan Pu Deputy Speaker, pawimawh em em mai RD Department-ah lawmthu ka sawi lo thei lo a. Kan Minister, opposition kum 5 a ni a, term hmasa lamah helamah hian a thu a, a duhthawh thei khawp mai a. Silpauline a lo dil pawhin thiante aia dil tam zel hi a ni a, kan inpe lo thei thin lo a. Tunah Minister a rawn ni chho a, rangvate opposition te min han pe ve a, kan lawm hle mai a, a ngaihna pawh a hriain ka hria. Kan lo dah tawh “Chief Minister Housing Scheme” kan tih kan sorkarin kan dah kha share-te min han pe ve leh a, kan lawm tak zet zet a ni. A tam lo naa thilpek a nih hrim hrim chuan Minister viak tha leh ngaihna hria, member-te duhsak nachang hria hi kan Minister zawng zawngte hi ni vek ula a tha khawpin ka hria.

Tin, Education Minister chungah pawh lawmthu ka sawi. Filter te, greenboard te min pe a, ka lawm takzet a ni. Chutih rual chuan Pu Deputy Speaker, (DEPUTY SPEAKER : I hun a tawp dawn a, a pelh theih miah loh a nia) dar 5-ah khi chuan ka tawp ang, hun tlem a la awm. Rangva te pawh hi sem leh dan tur sum hi dah ni se, a tangkai khawpin ka ring.

Vawiina kan Power Minister hi RD Minister a nih laiin khang kha a dah a. Mirethei leh chhumchhiate vanduinah leh manganna an tawh ni khua hian a hlu khawp mai, a Pathian thu a. Chuvangin RD-ah hian rangva leina hi dah leh hram ni se tih ka ngen a.

PMAY thlangtu tur lai tak hi ka sawi duh a ni Pu Deputy Speaker. A mimalin kan Minister hi ka zawt thin a, dan angin kan kal ang a ti a. Kan bialah hian tuna thlan mai turah hian 517 PMAY thlan tur a awm a ni. VC kan inthlang a, VC tlemte Congress-in kan nei ve a. Bungtlang BDO khu a buaithlak khawp mai a,

guideline-ah chuan Gram Saba thlan tur a ni. Chutihlai chuan kan Congress VC-te kha a thlan tir duh chuang lo a, MNF unit te, block-te a thlan tir a. Chu chu thil kalphung a niin ka hre lo. Vawinah hian Pu Deputy Speaker, kan Minister hian he House kaltlang hian, “Guideline-a kal tur a ni,” a tih chuan min puan sak se tih ka sawi duh. Ka khingpui MNF candidate Pu C Ramhluna kha a thu khawp mai tunah chuan. Jagnasuru khua VCP (PU LALRINTLUANGA SAILO: Kum 10 an lo practice kha a nia, khalai kha chu ennawn a tha ang e a..) Khawngaihtakin, Pu Rintluanga hi a hriat ve mai mai atana ka duh chu Minister ka ni lo va, khatiang khan min lo chhang min lo chhang tur a ni lo, Minister-in a sawi tur a ni. A guideline anga a kal dawn a nih chuan a tha ka ti a, a nihna angin kal rawh se. A nih loh chuan a thlang theitu tur bawkin a thlan loh chuan a manganthlak tlat a ni. Jagnasuri VC Congress-in kan nei a, kan VC ten Gram Saba hmangin an va ti ve a, “ Pu Ramhlunan, Jagnasuri-ah chuan lo pe suh min tih avangin ka accept thei lo ”, a lo ti mai a. Kha kha a kalphung niin ka hre lo, Pu Deputy Speaker.

BADP chungchangah pawh sawi tur tam tak ka nei a, mahse hun a awm tawh si lo va, hun min pek belh a ka lawm e.

DEPUTY SPEAKER : Hun a tawp chu a ni mai a. Darkar chanve kan chawl leh mai dawn em ni ? A tha mai em ?

Aw le, kan rorel kan chawl rih ang a, 5:30 PM-ah kan lut khawm leh dawn nia.

RECESS AT 5:00 PM

5:30 PM

DEPUTY SPEAKER : Aw le, kan chhunzawm le hang a. Tu nge han sawi ang? East Tuipui bialtu zahawm tak Pu Ramthanmawia.

PU RAMTHANMAWIA : Pu Speaker, demand kan sawiho turah hian Demand No. 23-na Art & Culture hi ka sawi duh a. Khawchhak lamah hian pi pu sulhnu, hmun hlui, hmun hlu thahnem tak a awm a, hei hi kan cheihnuma kan enkawl that a ngai hle mai a. East Tuipui bial chhungah khianin a mak khawp mai a Fiara tui te, Lianchhiari Lunglen Tlang te, Lianchhiari puan tahna te, Thasiama seno neihna te, Lamsial puk te, Khuavang lamtluang thum te, Far puk te, Chhura chirawt lung te, Kungawrhi hnuh luhna te, Chawngvungi Lung te, Lungkeiphawtial tih te

thahnem tak a awm a ni. Chu mai bakah tlang hmingthang tak Lurh tlang leh Tan tlang te a la awm bawk a. Tin, Khawbung-ah khian Hla Kutpui Mual, mipui in kan hlut em em kan nei bawk a ni. Heng hmunte hi khualzinte tlawhpawh hmun a ni a. Ram dang atang te pawhin heng hmunah hian khualzin te an lo kal thin a. Amaherawhchu, vawiina ka sawi duh chu heng pi pu te sulhnu, hmunhma hi enkawl that a pawimawh rualin, heng khualzinte riahna tur hmunhma hi kan neih loh avangin harsatna kan tawk a. Hengte pawh hi ngaihtuah a ngai hle mai a. Tin, kan hriat angin khilalah Kawtchhuah Ropui, Tuivangchhia-ah khian hmun pawimawh tak a awm a. A panna kawng khi a tha lo hle mai a, black topping a ngai a. Tin, electric power a thleng lo va, khualzin te tan a hmuna khaw hawina tur a awm lo bawk a. Hengte hi view point tower te hi sak theih ni se. Khilai East Tuipui bialah khian sum lakluhna tur tha tak tur a awm a ni tih ka sawi duh a ni. Kan Minister zahawm tak hovin ka bial chhungah te khian la han zin ila, hmalakna tur tam tak, lunglen thlak tak tak tam tak khilalah khian a awm a ni. Chungte chu kan humhalha kan enkawl that a pawimawh hle a. Hun kaltaah khan eng emaw zat kutthlakna lo awm tawh mah sela, duhthusam a nih loh avangin tun sorkar thar hian heng kan pi leh pute an thlang tlakna hmun leh an lo chenna te leh an hnuhma, an sulhnu te khi enkawl that a pawimawh hle a ni tih kha Demand No. 23-naah hian ka sawi duh a.

Demand No. 39-na Power and Electricity tih hi tlem ka sawi duh bawk a. Electric power pawimawh zia kan hria, a tel lova kan awm theih loh dan te. Sorkar apiangin hma an la a, theihtawp pawh an chhuah zel a. Sorkar hmasa MNF pawh khan Serlui B Hydel Project tharthawh leh, 12MW pe chhuak thei turin hma a la a, tunah pawh hian eng emaw zat kan chhi mek niin kan hria a; a lawmawm em em a. Chutiang zelin a hnua sorkar te pawhin hma anrawn la zel a ni. Amaherawhchu kan mamawh khawp hi kan la nei lo va, hengah hian hmalakna tur a tam hlein ka hria a. Kan sorkar hian ngaihtuahnaa sen a ngai a ni tih vawiinah hian sawi ka duh a. Khaw changkang leh changkang lo tehna, kan han sawi thin danah chuan, ‘in khua motor kawngin a pawh em ? Motor a kal thei em ?’ tih te kan inzawt a. Chumi hnua kan inzawh lehna chu ‘electric, power hi in khuaah a lut em’ tih te a ni. Chuvang chuan electric eng hi kan mamawh em em a ni. Kan sorkar chauh va, hma lakna hun tha tak kan nei dawn a. Kan power Minister chak tak hian a ngaihna a hre dawn tih kan hria a, kan thla a muang a, kan lawm hle a ni.

Ka bial chhungah hian Tlawva Hydel Project, sorkar hmasain an lo ruahman kha a awm a. March 2012-ah khan agreement siam a ni a, 2015-a zawh tur a ni. Mahse, a zo thei lova, 2017 December thla thleng an ti leh a, a la zo lova. March, 2018 an extend leh a, tah pawh chuan an la zo thei lo va. Tunah hian June, 2019 an ti a, hei pawh hi an zawh hmel loh hle a. September 2019 thleng hi extension an dil leh niin ka hria a. Hei hi fur lai, July leh October thla chhunga MW pe chhuak thei tur anga ngaih a ni a. Thal lai erawh chuan khawl te, KW pe thei tur bun tel a ni bawk a ni. Hei hi ka han sawi duhna chu, he thil hi thil lawmawm tak a ni a, hlawhtling sela, khi lai East Tuipui bial tana a hman sen loh kan thar thei dawn a, a bang chu Champhai lamah te kan thawn thei dawn a ni. Chungte chu nghahhlelhawm hlein ka hria a. Tin, hetiang taka engatinge an zawh har tih hi, ka hriat danah chuan a tira agreement siam danah khan thil duhthusam loh deuh a awm a ni awm e tih te sawi a ni a. Tin, civil works zawng zawng kha pek tel vek a ni a, heng company hi; hei hian an hna a tih muan phah an ti a ni. Chuvang chuan Kiva Small Hydel Project kan buatsaih leh turah chuan civil engineer hna hi chu company te thawh tir loh hi a fuh awm mang e aw ka ti a. Hei hi kan Minister pawhin lo chhinchhiah sela. Kiva hi 1.5 mw ve ve, khawl pahnih bun tura ruahman niin ka hria a, a pahnih belkhawm 3 mw, tunah hian ruahmanna a kal mek a, kan Minister zahawm tak hian hma min lak pui a, bul tan theihna tura tan min lak pui theihna turin khi lai khi ka bial chhung ami tho a nih avangin ka han sawi tel duh bawk a ni.

Tichuan Rural Development Minister zahawm tak Pu Lalruatkima chan hi ka sawi duh a. Kan sawi nasa tawh a, sawi loh pawh kan nei tawh loin ka hria. Keini thingtlang bialtu tan phei chuan RD hi kan inngahna tak tak a ni. Kan hria a, LAD atangin hnathawhna tur kha kan nei vak lo a ni. A hnua kan nei zel dawn a nih chuan ka hre lo va, tuna a lan danah hi chuan LAD kan beisei thin kha sum a thahnem viau lo va. Chuvangin RD Department hi BADP hi kan inngahna tur a nih avangin, BADP atang hian ka bial chhungah khian khaw 26 a awm a. A cover vek lo nain BADP sum atang hian nasa takin hma an la a. Hall-te kan sa a, field-te kan lai a, kan bial hian hmasawn nan kan hmang nasa em em a ni tih ka sawi duh a.

Tunhmaa an lo kalpui dan hi ka zawt a, duhthusam lo laite pawh kan hmu a. A chhan chu Pu Deputy Speaker, sanction lo kal hi a bial chhung ami ten an thawk mumal lo tih a ni a. Aizawl atangin an rawn thawk a, an duh chen chen an lai a, an haw leh mai a. Engzat nge an laih dawn tih hi a khaw mite leh VC te pawhin an hre

lo a ni. Chungte chu kan lo kalphung tawh a nih avangin, ‘sorkar tharah hi chuan ka ham strict dawn ka ti a. Km 3 laih tur a nih chuan km 3 a lai tur a ni, lo teh zel rawh u’, ka ti a, an lo teh ngat ngat mai a ni. Chuvang chuan dik takin, rinawm takin he sorkar thar hian hna thawh a tum avangin a hna a tha tur a ni a, a tling tur a ni tih hi ka bialah BDO-hote pawh ka kawm tumin ka sawipui a.

Kan duh dan hi an hre tur a ni. He bialah East Tuipui-ah hian hma lak kan tum dan hi officer-te hian an hre tur a ni ka ti a. Champhai-a officer awm zawng zawng a hran te tein ka kawm vek a ni. ‘In lamah ka tang dawn hna chungchangah chuan, (Pu Deputy Speaker, hun tlem min pek belh lawk mai ka sawi rang thei bawk si lova) sorkar thar hi kalphung tharin a kal dawn a, tunhmaa zuzi taka an kal thin ang kha a theih tawh dawn lo va. Dik lo taka sum a hmanna tura hman a nih loh chuan nangni pawh infimkhur hle a ngai ang’, ka ti a ni. Chutiang chuan he sorkar tharah hian RD hnuiaia hna awm reng reng pawh kan party pawh ni sela, tupawh ni sela tling lo leh dik loa thawk chu bill pek loh tur ka ti hmiah mai. A lehpekah hna an thawk tawh lovang tiin khawtinah ka sawi vek a ni. Chuvang chuan Pu Deputy Speaker, sum hi a lo luh ang anga daihzai taka BADP sum hi hman kan tum a, chutiang tur chuan Minister zahawm takte leh department mite pawhin min tawiawma min puih kan duh a ni.

Tute emaw Aizawl atangin kan pe a ni thei a, mahse a tling lo hi chu bill pek ka phal dawn lo a, ka remti dawn lo a ni tih lai kha ka sawi chhuak duh a. Hun kal tawha kan kalphung kha tha tam tak awm mahse fuh lo lai tam tak a awm a. A fuh lo lai ang chi kha chu kan hmasawn vena tura sum lo kal hi dik taka, a nihna tur anga kan hman theihna turin bialin hmasawwna kan hmuh thehna turin BADP sum hi tha tak hman kan tum a ni tih kha he House kaltlang hian ka sawi duh a ni.

Engpawhnisela hun a tam lo hle mai a, department dang pawh sawi ka duh tehreng nen! Art & Culture-ah khan Champhai, Aizawl leh Kolasib District library hi library puitlinga kalpui ve theih tawh a ni ang em! tiin Minister hi ka zawt a. Art & Culture hi kan ngaisang a, kan hnam ro hlu vawn nunna leh vawiinah pawh Pu Deputy Speaker, Minister zahawm tak kan tawiawmna ni pah bawkin Art & Culture Demand sawi niah hian a theih ang angin kan hnam incheinain a thei thei kan rawn inchei a. He demand hi kan sawi vak ngai loh a ni a, a pawimawh zia te kan Deputy Speaker pawhin a hria a. Vawiinah hian lawmawm ka ti a, kan kal zelna turah pawh

department-ah hian thil tam tak hmabak tih tur a awm a, chungte chu kan Minister hian kan sawi tak angte kha ruahmanna tha zawkte rawn siam zel turin ka ngen bawk a ni. Pu Speaker, ka lawm e.

SPEAKER : Tunge phar leh in awm em? Pu Duha kha kan hmabak leh chu a ni maw, member zahawm tak Pu Lalduhoma i lo sawm ang.

PU LALDUHOMA : Pu Speaker, ka lawm e. Art & Culture atang hian ka'n tan ve ang a, culture hi Pathian siam a ni an ti a. Kan culture vawn nunna leh kan tihlanna pawimawh tak pakhat chu kan incheina hi a ni a. Kan sorkar pawhin Nilaini hi Zo thuam inbel ni atan an ruahman niin ka hria a, a lawmawm ka ti a.

Tin, khawvel ram hrang hrang Parliament-ah hian member te hi, India ramah hi chuan an ti lo va, khawvel ram hrang hrangah hian mahni hnam incheia inchei ni hi an nei a. Burma-ah pheih khi chuan nitin mahni hnam incheiin an inchei a. Nikum khan Burma ram Parliament Session ka han chhim ve a, sipai ho tih loh chu mahni hnam inchei vek khan an inchei a ni. Chuvang chuan kan House-ah pawh hian han tih ve te pawh a tha mai thei a, hetia han rawt chawp mai ni lo hian mumal deuh hleka kan siam theih chuan a tha awm mang e tih te min ngaihtuah tir a.

Tin, kawr nghawng nei lo hi vai thawmhnaw emaw kan ti a, Mizo design hmasa ber a ni a. Mizo thawmhnawah hian nghawng nei a awm ngai lo va, Chinese collar kan ti ta zawk a. Chinese ho pawh hian an lo nei bik lo va, heng kawr nghawng neilo te pawh hi kan inchei dan dik tak zawk a ni tih ka sawi duh a.

Tin, Zo siam hi ngaihsan kan duh khawp mai a keini hian, kan Minister ho Bangla zawng zawng leh officer ho Bangla ahte leh kan office hrang hrangah hian Mizoram-a kan siam theih thil a nih phawt chuan hnam dang siam hi hmang tawh lovin thlak vek ila, tualchhunga hetiang lama eizawngte pawhin market an lo hmuh phah ve ang a, khata tang khan kan hnam thil hi chu kan pho chhuak ang a, khumte pawh kan lo siam nuam lo deuh a nih pawhin khum nuam lo deuhah pawh kan mu rih mai tur a ni. Kan Chief Minister hovin Zo siam ngei khuma mut hunte hi kan nghakhlel a ni keini chuan. Khatiang zawng khan kan hnam thil ngaihsan hi kan duh hle tih kha ka han sawi a ni.

Tin, kan hnam lam ang chi pawh hi tih phuisui deuh hi a ngai khawp mai a, a nihna ngau ngau ang hi chuan han hmuhhnawm lutuk hi kan ngah lova. Vawikhat chu

Delhi-ah function eng emaw ah khan Pu R.L. Thanzawna, kan Information Director hmasa ber ho khan cultural troupe an rawn chhuk thla a, khuallam hi an rawn show a, kan Prime Minister Pi Indira Gandhi khan khuallam kha an lam zo tep dawn tawh tihah khan ‘Engtikah nge an lam tan dawn?’ a ti a, Khuallam kha ani chuan lamah a la ngai lova, a hmahruai lam turah chauh khan a lo ngai a, an lam zo tep tawh kha a ni si a. Chutiang vel chu hnam dang mit hmuhah hian kan lamte hi a ni a, han modify deulte hi a pawl lutuk lo turah ka ngai a ni.

Tin, hman ni lawk khan Synod Choir ten Wales ram an zuk fang a, intihsiaknaah pawh a ti tha ber pawl te an zuk ni a. Kan hnam incheiin an zuk inchei a, chheih lam ang chi, tlar thum zai angtein Pathian an zuk fak tih kan hria a. Kristianna a lo luh atang hian kan culture tam tak kan thukru ta hi a pawl ti em em tute zing ami ka ni ve a. Chuvang chuan, kan sorkar pawh hian Pathian hla, Puma Zai thluk te, tlar thum zai thluk kan tih ang te inphuah siakna hunte pawh hi siam ta nghe nghe se, kohhran pawh hi a inhawng tawh khawpin ka hria. Kan biak in chhung ngeiah, kan hnam hla thluk Pathian min pek ang chiaha Pathian kan fak hun leh kan hnam lam anga kan lam hun turte hi kei a nghakhlel pawl ka ni a. Assam Rifles Lammual-ah mipui kan han pungkhawm a, zaithiam tak tak an zai a, amaherawhchu, chhungril atangin min cho chhuak lem lo. German ral run hlate an han vawrh chuan tleirawl te te kan culture hre pha hauh lo kha an hnukah hian a khawih a, an che lo thei lo, an phu dual dual mai a ni. Chu chu kan culture, kan pianpui a nih vang a ni a, heng hi chawisang zel ila tih ka sawi duh a.

RD – ah hian ka kal ang a. Model village MLA te min thlantir leh dawn niawm tak a ni a. Tunhma lama model village kan lo neih thin kha eng tehchiam a ni hauh lo mai a, an khuaah han kal ila an sawi lem lova, an sawi loh pheih chuan model village a ni tih kha a hriat vak loh a ni. Tun tumah hian kan ti leh dawn a nih chuan awmze neiin kalpui ni se ka duh a. District tinah DC chair se, department tin aiawh kha rawn awm ve sela, kha district chhunga department hrang hrang khan kha model village-ah khan an budget atangin eng emaw zat rawn dahin, kha khuaa thil awm thei tur eng emaw, item hnih khat tal kha chu rawn ti ve ta thliah thliah se, MLA te duhdan pawh ngaichangin, tichuan model village neih hian awmzia a neih ka ring a, chutiang chuan rawtna ka siam duh bawka a.

Tin, Village Haat hi kan nei thluah mai a, a ram a, an sa zo a, contractor-in sum a hawn a, kha kha Village Haat sak kan chak nachhan hi em ni aw tih theih tur hian a hman tangkai lam hi chu a chhe em em a ni. A thenah NGO-in an enkawl a, a thenah department-in, a thenah VC ten, hei pawh hi a enkawl tha theitu ber kutah hian hlan ni mai se, chu mite enkawl ngei ngei tur a ni tih dan khauh takte hi nei lem lo ila, hmang tangkai thei tur leh hlut thei tur apiang khan enkawl chho thei se a thain ka hria a ni.

Tin, RD hi kan department zingah sum tamna, village level thlenga sum lenna a nih avangin thil fello tam em em fona a ni a, chumi veng tur chuan a mechanism hi a awmsa a, chu chu State Level Monitoring Cell (SLMC) kan tih hi a ni a. Tuna i dinglam amite sorkar lai khan he SLMC hian thil diklo tam tak a hai chhuak a ni, chumi a hai chhuah chu he House-ah ngei hian keimah ngeiin ka pulut a ni. An thil va hmuh chhuah kha sorkarin lo uksakin, thil ti diklote kha chhuiin hma la ni se, he SLMC hmang hian kan mipuite ipte-a lut tur hi kan vawnhim sak thei dawn a. Mahse an transfer darh ta vek zawk a, hnathawk theilo in an siam a, a hnu zelah pawh he SLMC hi mumalin a function ta lo a ni. Tunah pawh kan sorkar thar hian he SLMC hi engti takin nge a hman tangkai tih hi kan lo tehna tur a ni a, a hman tangkai duh vak loh chuan an tih ngai tih leh an duh dawnah kan ngai lo thei lo ang. Chuvang chuan, hei hi tangkai taka hman a nih chuan kan ramah eirukna-te a bo ang a, a tha dawn a ni tih ka sawi duh bawk a.

P&E –ah hian han lut ila, Electric Department hi kum 40-a upa a ni tawh a ni tunah hian. Israel fate thlalera an vahvaih kum ang vel kha a upat lam hi a ni tawh a. He department hi Mizoramah hian kum 40 a vakvai ve em maw ni aw tih a awl khawpin ka hria . Kha kum 40 chhungah khan vawiina kan installed capacity chu 29 mega watt a ni a, a tak taka kan thar chhuah chu 8 mega watt a ni tih kan hria a, chu chu kan potential atanga chhutin kum 40 chhung hian 1% pawh hi kan la phak hauh lo a ni. Pathianin resource min pe a, potential min pe a, kum 40 chhungin kan haichhuak tlem lutuk a ni.

Tin, rural electrification-ah RGGVY hi i dinglam am te sorkar laia an tan kha a ni, MoU an signed pui kha a ni, vawiin thlengin kha mite khan an la thawk. Thingtlang electrification a la phuisui lo em em a ni. Eng vang nge kan tih chuan induhsakna uchuak tak nen bul an tan a, kha miten an contract thawhna tur sum

atang khan za a za deuh thaw a tirah khan advance-in an pe a ni pawisa an hmu tawh a, an thawk tha duh hauh lo a ni. RGGVY hnathawh endik hian Mizoram kiltin hi ka vak chhuak ve tawh a, PAC angtein, duhthu an sam lo em em a, tunah hian min terminate se tih hi an chak zek zek a, min cho a ni. Hnathawk turin an nawr luih theih loh. A chhan chu engvang nge kan tih chuan pawisa tam tak a tira an pek vang, kha kha a ni tlat a ni! Corruption hian kan ram hi a tichhe lutuk, a pawl em em a ni. Tunah hian han ban ngawt dawn ila, a hlawk lo zawk kan ni tawh bawk si a, nawr kal hram hram tumin department hi an hah em em a ni tih pawh kan hria. Health Care Scheme pawh a tirah 95% damlo pakhatmah inenkawl hmian an pe a, vawiinah 10 crore chuang damlote bill min la bat sak a, a rei tawh lutuk! Khang kha agreement dik lo, rilru thianghlim lo atanga siam a nih avanga heng thil hi kan ram hian tawngbaw thin kan ni a, heng hi bo tawh se tih hi ka duh ngawih ngawih a ni.

Tin, kan ramah hian Hydel Project 8 hluihlawn cheng tam tak eiraltu kan nei a, Bairabi-ah Thermal Project, tuna kan hotute vek sorkar laia an siam chhawrtlak miah loh hluihlawn a awm bawk a. Heng zawng zawng hi sum luanralna a ni. Tin, tunah hian kum 2008 vela intan in MoU signed tawh project 9 kan nei a ni. Kum 10-a upa te an ni tawh. Heng hi agreement ang hian hna thawk ni se 2411 Mega Watt thar theihna a ni heng project 9 hi. Amaherawhchu, clearance la pawh an la awm lo, approach road laih pawh a la awm lo, tihian a awm mai mai a ni. Engatinge MoU sign te hi kan chak em em? Tih tak takna thinlung awm si lovin kan ti a, satel speed in kan kal leh a, khang MoU zawng zawng kha vawiinah hian cancel leh vek ni se tih hi ka demand a ni. Awmze nei lo a ni. A tharin awmze neiin thil kan tih dawn chuan bul i tan leh ang u, tlai lua a awm lo ve.

Heng zawng zawngah hian tunge mawhphur kan tih chuan sorkarna lo chelh tawhtute hi an ni a tih loh theih loh. Kum 40 chhunga heti taka intodelhloa min siamtute hi kan rama roreltute an ni tih hi phat thu a awm lo a ni. Tin, a bik takin tupawh lo sorkar sela, a hotupa berin a tuipui lam apiang hi a hlawhtling thin. Hotupa ber tuipui loh lam hi chu a hlawhtling mawh khawp mai. Vawiinah hian Brig. T.Sailo kha kan hotu ni se chuan hetiang dinhmunah hian kan din ka ring miah lo a ni.

Tichuan, solar-ah hian ka kai ang a. National Institute of Solar Energy-in potential kan neih zah an chhutchhuahah hi chuan 9.09 Gigha Watt kan nei a ni, chu

chu 9000 Mega Watt a ni. Solar energy hi Mizoram hian 9000 Mega Watt kan nei a nih chu. Kan hman sen hauh loh tur Pathian in min pe a ni. Khami hnuaiah khan Rooftop Scheme-te kan han sawi ve vuai vuai a, Solar City tihte pawh a ri kan hre thin a, a tak taka kal hi a la har em em mai a. He solar hi han ti tak tak ila chuan power grid nena thlunzawm a electric bill pawh pe mang lovin a nei tha deuh phei chuan kan hman sen loh kha department zawk khan min leisak dawn a ni. A tha em em a, engatinge hei hi lian tham taka kan kalpui loh? Tunah ZEDA in an ti, June thla chhungin a tawp dawn tih hmannah kan hria. Engatinge heng information te hi kan thup tlat? Mipui hriat hi kan hlau em ni heng thil thate hi? Puangzar ila, mipui hian ti sup sup sela, khawpui tinah in nei tha, huan nei tha chuan ti vek rawh se. Tuikhuah atang kher ni lovin, solar hian min chhawk zangkhai thei a ni tih hi thil chiang tak a ni.

Tin, Thenzawl-ah sawn Phivawk ram a awm a, tah chuan solar project siam a ni a, 10 mega watt thar theihna tur a ni. Japan International Co-operation Agency-tenen a funding hi lo kal tur a ni a, saw saw hluihlawn a ni ringawt mai bawk a, ka ui em em mai a, kan Minister hian han en thar leh ta se, la tun nun theih a ni em? 10 mega watt-te chu pui tak a ni. Tuirialte pawh kan sawi kan sawi, kan chanai hi chu tlemte a ni. Tuirial Hydrel Project hi sawi sawi tlak a ni lo, luite khuah ang lek a ni, kan chan tur hi a tlem lutuk! Chung ai chuan 10 mega watt thar thei solar project-te chu a ngaihhlutawm zawk daih a ni tih hi kan hriat a thain ka hria.

Land Resources-ah hian kal leh ila. Rubber chungchang hmannah ka zawt a, Mizorama private rubber chingtu zat leh an rubber chin zat te, an plantation area te department-in a hre lo hi a pawl ka ti ngawih ngawih a ni. Kan mite rubber-ah eizawng sela, uar sela, pui ila titu department khan mipuiin engzah nge an chin pawh an hre lo hi a zahthlakin ka hria, kan department-te pawh an tan hle a ngaiin ka hria. Hengah hian approach road mamawh tak tak tam tak an la awm bawk a ni.

District Council-ah hian 6th Schedule District Council hi Mizoram pum puia introduce leh hi ngaihtuah tlak niin ka hria a, Meghalaya-ah te pawh an la nei vek a, state an nih avangin District Council an paih chuang lo. Tunah hian tunhma lama Aizawl Undivided leh Lunglei area zawng zawng kha non-tribal area kan ni tawh lo. Constitutionally chuan tribal area an ziahna list-ah khan a lang miah tawh lo a ni. Amaherawhchu min dimdawi a kan chungah engmah a la thleng lo a ni mai a. Tribal

area-a awm lo tan chuan income tax chawi a ngai tlat mai a, 'hei in awmna hi tribal area a ni tawh lo, non-tribal area a ni tawh, income tax chawi rawh u', min ti ta se, kan sorkar hnathawk zawng zawngte hian pawl an ti khawp ang. ILP te pawh in ti thei tawh lo ang, non-tribal area-a cheng kha non-tribal area ah a rawn zin ve dawn a ni mai, Tribal area in ni tawh lo min ti se kan hnam tan a pawl lutuk dawn a ni. Tin, in hmun lo ram pawh tunah hian non-tribal chuan sorkar phalna lo chuan an nei thei miah lo kan ramah. Hengte pawh hi a su buai vek dawn a ni. Trading by non-tribal tihte pawh kan nei thei tawh lo a ni. AMC-ah hian Licensing Regulation an han siam a, a tha lo ve kan ti ngawih ngawih chungin an pass lui a, YMA leh NGO-te MIMA te hovin he dan duh lo hian AMC Office an hual a nih kha. Vawiin thleng hian hei hi an tilui a, kan AMC hnuaia kan licensing regulation hnuaiah hian non-tribal license nei an tam lutuk tlat tawh. Chuvangin, Municipal Council-te hi i pawng sawimawi lo vang u. Tribal Institution a ni lo va, trading-ah harsatna kan nei ziah. Lunglei ah awm ve se hnam dang vai sumdawna an dang thei dawn lo, hei hi a ken tel tur a ni. Chuvang chuan uluk takin Municipality kan tih fo ah hian kan hnam a him em tihte hi kan ngaihtuah a thain ka hria .

A tawpna berah chuan vawiinah ka zawhna Unstarred Question a lo chhuak a, Mizoramah hian Illegal Village 26 a lo awm tawh a, a tam ber chu kan District Council area ami a ni. Heng hi illegal village a ni tih kan hria a, a record pawh kan nei reng a nih si chuan kan ngawi mai mai dawn em ni? Hetia kan tih zel chuan kan hnam hi a boral mek zel a ni. Kan lo tihsual tawh te pawh lo awm tawh pawh ni se tun atang hian tidik turin hma i la leh teh ang u. Heng kan village te chung ah hian rorelna lekkawh hi tul ka ti hle a. Khang te kha ka sawi hman tawk a ni e. Pu Speaker, ka lawm e.

SPEAKER : Aw le, kan Minister zahawm tak pahnih demand sawihona chu kan duhtawk rih ang a. Mi 25-in kan sawi a. Tunah chuan kan Minister zahawm tak Pu R Lalzirlianah demand sawi te kha rawn wind up se, sawifiah ngai a tih te sawifiahin House pass rawn dil nghal se.

PU R LALZIRLIANA, MINISTER : Pu Speaker, ka lawm e. Vawiin hian a hmasaa kan sawi duh chu helai House zahawm takah a zawna term 5 bial ngai atanga tlinga, thu thei leh cabinet Minister a zawna wawi 3 ni theia min siamtu kan

Pathian leh kan Chief Minister zahawm tak leh ka bial mipuite chungah lawmthu ka sawi a ni.

Pahnihnaah chuan Pu Speaker, vawiina i inchei dan te ka hmuh hian a ropui ka ti a, a lawmawm ka ti a, hnama Chiang-ah hian kan lo tel dun har deuh a ni tiraw! An la tih ngai reng reng loh rawn tichhuaktu kan lal huaisen leh rorel thiamte inchei dana i rawn inchei chhuak te hi ropui ka ti a. Tin, kan thiante ka bul ami kan Agriculture Minister te leh an hming chu ka sawi vek lo mai ang a, kan doctor ah Pu Thiamsanga te leh midang Mizo dress rawn haa vawiina kan culture department kan sawi dawn avanga kan Deputy Chief Whip thuawia lo kal te ka lawmpui che u a, a ropui ka ti a pawn lam lan dan incheina chauh hi hnama chianna a ni lo ve thenkhatin an ti mai thei a, amaherawhchu rilru leh thinlunga kan vei te chhuak liam kan ngaihtuah angin kan incheina lamah pawh kan lang chhuak thin a ni. Chutiang chuan hnama Chiang te vawiinah kan lo kal khawm hi a ropui ka ti khawp mai a. Opposition Group Leader-in tuna rawtna a rawn siam kha a ropui hlein ka hria. Kan hnam zai thluka kan Pathian fakna te pawh hi inelate pawh siam ni se a rawn ti kha ropui ka ti khawp mai. Kha kha zawm ngei te pawh kan lo tum dawn a ni tih kha tunah hian ka sawi duh nghal mai a ni. Helai MNF Ministry Pu Zoramthanga kaihhruai hnuaia awm hi a nuam ka ti a, kan zalen a, tin, mithiam tam tak thu khawm, opposition i veilam ami pawh mithiam hliir an ni a, helam i dinglam ami pawh mithiam hliir an ni a, an zinga awm hi nuam ka ti em em mai a. Vawiinah hian mi zir sanglo, hriatna pawh ngahlo mi an dawm thiamin ka hria a, hotu/leader en lek lek hian min en in ka hria a, keimahni party chungah hian a lawmawm ka ti tak zet a ni. Thenkhat te khan Minister chak tak te min han ti a, hemi hi chu keimahah hi chuan tih tawh loh ni se thain ka hria. Tin, tunah hian Minister chak tak tih hi a hun ka ti lo hrim hrim a, kum hnih te, kum thumte kal ta sela kan department-ah eng nge kan nih khatah khan a lo lang dawn chauh a, kan hnathawhin kha kha chu hriil chho sela a thain ka hria a ni.

Vawiinah hian MLA zahawm tak tak 25 laiin ka department min sawipui a, an chungah hian Pu Speaker, ka lawm tak zet a ni. Tin, nizan lamah khan dar10-ah kan bang a, khata bang tur kan nih kha chuan darkar 3 dawn lai hun ka neiin ka hria a, a chhan chu ka hnunga ti tur Pu Ruatkima hian minute 30 bak ka ti lo vang a ti an Ti a chutiang a nih dawn chuan sawi ran teh vak pawh a ngaiin ka hre lo va, ka hmaa sawitu mi 25 khan an hun kha an bawhpelh vek a, hun an dil belh vek a, ka lo

hmang rei deuh a nih pawhin ka rawn dil belh che angah min lo hriatthiam a, hleih nei taka i chet chu ka ring lemlo a.

SPEAKER : Nichin khan kan lo awm har deuh ani i ti a ti raw. Hun kha ren miah suh.

PU R LALZIRLIANA, MINISTER : A va nuam thin e aw. Ka lawm e, Pu Speaker. Ka department-ah hian sawi tur tam tak ka nei a, ka inbuatsaih tha khawp mai a, nizan khan dar10-ah kan haw a, chaw kan ei peih meuh chuan dar11 a lo ri a, wawiin a mi tur kan en a, dar 12:30 a lo ri a, tichuan ka muhil thei lo va, peptica te kan ei vel a, Pu Speaker, tiang chuan ka muhil ta a. Zing dar 4-ah ka tho leh a, ka inbuatsaih ve viau a, keima tawkah chuan Power Department hi tlemte sawi mai ila.

A sawi zawng zawng kha an hming kha chu ka rawn lam vek seng lo ang a, hming lam lo khan kan hotuten insawi kha rawn sawifiah ka tum dawn a ni. Quarter chhiat chungchang te kan sawi nasa khawp mai a, a dik a. Kan quarter hi hmanlai U.T. lai, central sum kan pawh theih laia sum ren vak lova department-in an sak a hlui tawh deuh hi chu a tlangpuiin a chhe tawh a ni.

A bik takin Bilkhawthlir biala a sawi hmasa bertuin a sawi pawh kha thudik vek a ni a, a hmunah kan zuk kal a Tunhmaa Serlui B an tan dawn khan a project a lian tham a, tha tak takin an zuk sa a, amaherawhchu luah lohvin a awm a, staff indaihlohna avangin, khulaiah pawh post hnem theih bik a ni ta lo va, chutiang chuan a ram nasa tawh a. Hengte pawh hi chei that ngai tak niin kan hria a, 'estimate te han siam ula a, chhe zual zual hi', tiin ka chah ve ringawt a ni. Chutiang chuan maintenance ti turin tunah hian ngaihtuah mek a ni a. Tin, Serlui B-ah hian khawl 3 a awm a, khulaiah khuan khawl 3 awm kha a tirah chuan an han tinung dawn a, amaherawhchu a chhia te kha a lo awm a, a chhiat khan a dang la leh zel lovin khawl pakhat ami kha an lak thin avangin khawl pakhat kha chu kal thei loin a awm ta char char a. A chang phei chuan khawl pakhat chauh tihnun a ni a, tunah chuan pahnihin an tihnun tawh a. Hmannia kan zuk kal chuan, 'hun reilote, ni nga ni ruk vel kan han en ang a, chumi hnuah chuan khawl thum hi kan

start ve thei ang', an ti a, tunah chuan khawl pathumin a kal tawh niawm takin kan han hria a ni.

MLA zahawm tak tak te khan kan power chhiat fo dan te an sawi a, chungah chuan a chhan deuh bera kan han sawi kha chu transformer chhia a ni a, a puak tih te a ni a. Chungte chu nichin khan i vei lama kan thiante khan, 'sorkar hmasaah pawh khan power Minister a ni a tunah a chhunzawm leh a' min ti a, a dik a. Tunah hi chuan pawisa han dil vel hi a innawm hleih riauin ka hria a, a hmasaa kan Leader leh vawiina kan Leader hi.

Hmanniah khan D.O. letter ka ziaak a, chutah chuan 'power kan chhiat fo nachhan leh mipui mamawh ber te a ni si a, chuvangin transformer hi standby atan a spare min pe teh' ka han ti tawp mai a. Anin 'kan ziaak ange' a ti a, a ziaak a. A ziaak dan kha a tha ka ti khawp mai a. 'Power hi mi zawng zawngin kan mamawh a ni a, tuna an rawn sawi hi pawisa hi pek tha ka ti a, file-ah rawn process nghal ang che u' a ti a. Finance-ah kan kalpui ta a, an rawn process ang a, tute tihdan angin emaw, helaia Finance Minister, Chief Minister a nih anga lo ziah kha a ni a, Finance Minister a nih ang khan a lo reject leh lem lo ang chu maw tih kha ka beisei dan a ni a. Chutiang chuan chumi lei tur chu tunah hian department-in kan han tichhuak a, chumi keng chuan a nia ka han kal ni.

Transformer 12.5mva te, 132 leh 133kv atan te a ni a. Tin, power transformer 10mva, 33/11kv atan, hei hi pahnih ve ve a ni a, cheng 7200 lakhs man a ni. A man hi a to angreng khawp mai a, pali chauh leina tur pawh kha khati kha a ni a.

A dang hi a la awm leh a, distribution transformer hi 500/kva 11 a ni a, hei hi 6 lei tur a ni a, 250 kva 11/0.4 kv hei hi 50 lei tur a ni a, 100 kva 11/0.4 hi 100 lei tur a ni. Tin, a te deuh 63 kva 11/0.4 kv hi 37 lei tur a ni a, 25 kva 11/0.4 kv hi 69 lei kan dil a, hei hi a man tur chu cheng nuai 499 leh singriat man a ni. Hetiang kan neih hunah chuan kan transformer a chhia tia kan hotuten in sawi kha kan thlak thei nual dawn a ni, in sawi zar te pawh a niang, a lawmawm kan ti khawp mai.

Tichuan sub-station thum tha tura kan hotute, khawchhak lam MLA ten an sawi kha a dik khawp mai a. Kei pawh hian sub-station 3 lai ka hawng tawh a, amaherawhchu staff indaihlohna avangin vawiinah hian duh angin thum that theih a ni lo a ni, a pawl kan ti khawp mai.

Tin, 33 kv line Khawzawl, Kawlkulh pawh hi vawiinah chuan changlung zawka tih tum a ni a, 33 kv power lian concept paper kan siam a, hei hi pawm a nih chuan kan la lei thei mai dawn a ni. Tichuan tun dinhmunah hi chuan 33 kv sub-station siam thar 4/5 vel te hi kan tihen belh tur chu a ni a. Amaherawhchu khaw za chuangah hian thawktu kan indaihlova. A chhan chu Power department hi khaw tinah transformer enkawltute an lo ngai a, khatiang department kha kan ni a, khua zawng zawngah hian kan staff te an awm a ngai a ni.

Tin, Tuiching Micro-hydel Project hi 100 kw pechhuak thei tura siam a ni a, chu chu tunah hian a khawl hi kan bun zo tawh a, khawl tlan tir mai tura dah a ni. Kawlbem bulah khian small hydel project siam a ni tih kha kan sawi a, hei hi civil construction zawh a ni tawh a, tunah hian electronic mechanical works hi MS Mortexs te tih tur a ni a. Hei hi ti thuai tura hriattir an ni tawh baw a ni. Electric Department hi tunhma atang tawhin corporation - ah leh hi tum a ni a. Chutiang chuan tunah hian corporation- a inlet turin inbuatsaih mek a ni a. Chumi zirchiang turin Administrative Search College of India, Hyderabad amite hman a ni a. Hei hian report nakin lawkah arawn pe ang a, kan beisei ang tak phei chuan July thla chhunga report rawn pe ngei turah kan beisei a. Chumi a niha duhtusam anga a awm phei chuan notification pawh rawn chhuah theih thuai tura beisei a ni.

Serlui B hi commission lohna chhan te nichin khan an rawn zawt a. Serlui B khu kan commission lo na a, commission pawh a ngai vak lem lo, kan hmang reng tawh mai a, tunah phei chuan kan rin rawl ber a ni tawh a. Amaherawhchu, commission kha sorkar kalta khan kan tho vak lo aniang a, kan bul tan a ni a, kan tih flop tawh khami rawn ti leh tu, MNF Ministry sorkar intawmah khan bul an rawn tan tha leh a. Chumi an lo zo tawh si a, han enkawl zui loh kha chu tiin kan enkawl zui ta kha a ni a, commission te pawh kha kan han chak viau kha a ni a party lam kha chuan. Amaherawhchu, hotu lam atangin commission a tul lem lo ve tihna te a awm a ni ang e, commission a la ni lo a. Keini hunah hian khutianga a khawl 3 te

kan han tinung chho leh char char a nih khu chuan a lawmna ve hrim hrimte pawh a hmuna zu neiha zu intihlim vel te pawh a chakawm alawm! Chawngkhupa Island kan tih velah te pawh khuan kan zu chetla vel ang a nuam deuh tur a nia. Tunhma chuan nawmchenna hmun atana siam niawm tak a ni a, amaherawhchu Chawngkhupa Island kan tih tawh erawh chuan fianrial nei duhte, tawngtai duhte tan a rem viau ang tih kha hmanna kan zuk kal chuan kan sawi a ni. Kan hawn loh nachhan tak pakhat hi chu compensatory afforestation la pek theih loh a nih avang hi a ni a, mahse han commission, han hawn emaw, zu lawm emaw chu engmahin a dal tak tak lemlo turah ka ngai a ni.

Nichinah khan member zahawm tak te khan engzatnge Mizoram atang hian kan thar chhuah ve an ti a. Hei hi keipawh ka hrethiam chiah chuang lo va, a million angin an rawn si a, a mega watt tih velte a nih loh kha chuan keini ang technical mi ni lo tan chuan hriat a har khawp mai a. Tuna kan thar chhuah chiah hi chu 40.80 million unit a ni a, phai atanga kan lei zawng zawng hi 662.76 million unit a ni a. Generating station atanga power kan leina senso hi nakinah pawh ka la rawn sawi dawn tho a, 288.862 crore a ni. Tin, power kaihhnawiha sum pek chhuah zawng zawng hi 387.33 crore a ni.

Tichuan, Champhai-ah hian online-a electric bill pek chungchang te, Champhai lovah pawh hmun dangah hian a tih theih lawm ni tihte a awm a, Champhai mai ni lo, Mizoram pum puiah hian online-a electric bill pe thei turin department hi an inbuatsaih mek a, kum 2019 chhung hian a tul tul tih zawh kan inbeisei a ni. Chuvangin, online-in kan pe ve thei thuai ang tih kan beisei.

Tin, 132 kV line Saitual-Champhai kal hi a chhe zing khawp mai tih a ni a, a dik awm e, Bukpui-te pawh 132 kV sub-station atanga Khawzawl lama 132 kV power la thei turin tunah hian hma lak mek a ni a, chumi tur chuan disinsulator te thlakin 32 kV Lungdar sub-station pawh 132 kV sub-station a tih len chhoh tum a ni a, hemi hnuah hi chuan Champhai lam atang pawhin power kan hmu regular thei deuh turah kan beisei a ni.

Nichinah khan electric accident chungchang kha kan ngaithla a, heng hi anmahni te, an chhungkuate nen engkim sawifel vek tawh a ni, a zialo thin khawp mai. Electric hi kan duh vanga inman tir kan ni bik lo va, eng emaw tihsual palh a ni kha lai kha.

Tin, Pu Hlana ka'n sawi bik ang e, kan electric hrui hi bare conductor-a thlak vek a tha lawm ni arawn ti a, a dik khawp mai a. Hei hi thlak vek kan duh a, sum nei ila han lei chur chur kan chak a, tun Ministry hian ABC cable leh bare conductor thlak hi a ngaipawimawh hle a, tunah hian DPR kan siam a, kan buaipui mek a, funding/sum hi khawiah nge kan zawn ang tihte kan ngaihtuah chho mek dawn a ni.

Tin, ban tha lo, sawlai Zarkawt bawr velah Pu Rindika Ralte khana sawi a, hei hi chu kan hotuten an lo ngaithlaa i thusawi kha, an enzui ang a, tih that tul a nih chuan an lo ti tha vat ang. Tin, high mast chungchang Pu Chhuanthanga'n arawn sawi kha chu UD & PA kut a ni a, keini kan inrawlh chiah tawh lo va, a chhia a awm a nih chuan chumi siam tur chuan kan hnenah anrawn sawi ang a, chu chu kan tih tur a ni. High mast emaw, street light emaw tih tur a nih pawhin, thingtlang ami chu LAD in an ti thin a, a bill an pe vek ang a, Aizawl khawchhung ami chu UD & PA-in a bill an pe ang a, chumi hnuah kan naute'n a connection leh a tihen kha chu an lo ti dawn a ni.

Tin, khawthlang lam bialtu kan Deputy Chief Whip, Chawngte bialtu western belt-a West Phaileng, Marpara, SouthTuipui, Bungtlang, Lungsen, Tlabung, Chawngte vel hi kan inang a, kan eng tha lo a ni tih a sawi kha. North Eastern Region System Power Improvement Project (MERPSIP) hnuaihan hna thawh mek a ni. 132 kv line from West Phaileng to Marpara, Lungsen, Chawngte, South Bungtlang-ah hengah te hian hna thawh tan mek a ni. 132 kv Sub-station at West Phaileng, Marpara leh Lungsen, Khawiva tunah hian buaipui mek a ni. Tin, 33 kv Sub-Station Bungtlang South hi thawh mek a ni a, thawh zawh a nih chuan kan eng tha tawh turah kan ngai a ni. MLA zahawm tak tak te thusawi atanga karawn react theih te a ni a. Helaiah hian keimahni kalphung hrim hrim leh kan thawh lai thenkhat te sawi ve a tha ang tiin ngaihtuahna ka nei a.

MLA thenkhat i veilam amite khan Pu Zoramthanga Ministry hian power lam hi ngaihsakna reng reng a nei lo a ni min tih kha, a ni lo deuh ang a ka ti a. A chhan helaiah hian kan budget kan pek dan atang hian 2018-2019-ah khan 4268.74 lakhs min pe a. Kuminah hian 56739.13 lakhs min pe a, chumi atang chuan power hi kan hotupa hian a ngaihsak a ni tih

a chianna chu. Nikum lam ai khan 14670 lakhs in a tam zawk a ni. Chuvangin a tamna kan en hian kan hotupa chuan a theih ang tawh chuan power hi kan intodelhna turin hma lak a tum a ni tih hi a chiang hlein ka hria. Helaia tel ho hi kan sawi thuak thuak anga. Office expenses - ah hian 2019-2020-ah hian 80 lakhs min pe a, kum kal ta ai khan tlemin a tlem deuh a ni. Finance lam hian min hre thelh deuh em aw ka ti a, ka sawi tawh ang khan khawtinah hian office angreng kan siam a ngai a ni. Indaihloh zualnaah khaw lian deuh atangin an va hmui a ni lek a. Electric bill pekna tur te khawpui lian deuh ah te chuan siam a lo ni a. Office hi kan ngah khawp maia mipuite awlsamna kan duh vang a ni a. Chungah chuan kan tlukpui nia kan ngaih te (i ti mai ang, ngaih loh lamah lo ngai lo se) PHE office expenses - ah hian 250 lakhs an pe a. Tin, PWD - ah hian 170 lakhs an pe a, P & E pawh a ngah ber kan ni zawk awm e. 80 lakhs kan dawng hi a beitham deuh em aw, nakinah ennawn chi aniang a, tihsual palh te awm thei a ni kan ti a.

Tin, kuminah hian a tir atangin Power & Electricity Department hi kan han lak ve takah chuan phurna te pawh min siam a ni. Ka thawhpuite pawh a hmunah kal a thil ti chat chat turin kan inhrilh tawh a. POL a kalna tur ber kha nikum lamah 8 lakhs min pe a, kuminah min pe miah lo mai hi kan motor te hi engtia tih tur nge, min auction sak dawn nge ni ti a ngaihtuahna ka neih lai chuan vehicle-ah khan nikum lam aiin min pe hnem leh lawi si a, tihsual palh a ni ang tih ka ring.

Tin, ZEDA grant-in-aid general-ah hian kum 2019-2020 - ah hian pawisa 324 lakhs dah a ni a. JRC leh ZEDA hote hman tur a ni tlangpui a. ZEDA hi tihlen a tul khawp mai a, a chhan chu kawlphehtha siam chhuah lamah hian state sorkar tan nasa takin sum a siam a. Chuvangin ZEDA tihchangtlun a, a thawktu lak belh hi kan ngai hle a ni. Tunah hian Roof Top Solar Project Scheme te in publicity a tha lo lutuk a ni tih te pawh a awm a. Publicity tha takin ti ang che u kan ti a, thingtlang ah te pawh an zin chhuak a ZEDA hi mipui ten an hre ve viau tawh a. Engpawhnise, June 29 thleng hian la tih theih a ni. Kan hotute ti duh in awm a nih chuan June 29 hmain tih a ngai a ni. Ka sawi chhuak nual tawh a, kan inchungah khuan ka siam ve a, rem leh rem lovin inchung rangva chungah te ka kilh beh tir a

ni. Tunah hi chuan power man hi ka chawi tawh lo va, connection fee chauh hi kan chawi a ni. Hmanni khan minrawn en sak a, 222 unit vel i khawh tawh an ti a, engzat man tur nge chu ka hre lo va, man lo va lo chhit theih hrim hrim kha a hluin ka hria. Midangte pawh hian tih ve a tha a. Tin, miretheite dawr chi tak an ni a, 70% subsidies rate a min siam a ni a, a tha khawpin ka hria a. Hei hi ti ve theuh turin ka MLA puite pawh ka duhsak che u a ni.

Other Charges kan tih hi kawlphehtha lei nana hman thin a ni a. Nichinah khan MLA zahawm takte khan pawisa awm zat kha chu inrawn sawi tawh a, sawi nawn lo mai ila a thain ka ring. Kawlphehtha lei nan tam tham tak kan dah thin a, tunah pawh nuai 30,000 lai dah a ni a. Amaherawchu kawlphehtha kan leina hi kan pe har thin a, a chhan chu pawisa hi Finance Department hian min pe tho tho a, mahse kan pawisa kal kual vel hi file pawh move nghal chat ila a sanction lo chhuah tak hi chu ni khaw rei hi a lo ni leh thin si a, a kal kual rei a. Chuvangin, late fee kan chawi thin a, late fee kan chawi chuan a aia tam daih pek a lo ngai a. Kan pek nghal mai erawh chuan pek nghal mai lawmman kha 2% rebate a awm ve thung a. Chutiang chuan ti thei ila chuan ₹600 lakhs vel kum khatah kan save thei dawn a. Hemi atan hian kan Finance Minister leh Chief Minister zahawm tak hian min lo chhinchhiah sak se. Hmanah khan dilna pawh kanrawn siam tawhin ka hria a. Kawlphehtha leina tur fund hi min siam sak ta se, anmahniin an lei veleha kan pek theih nghal mai chuan sumdawnna chi khat a ni ve tho tho dawn. Kan lei man zat kan zuk pek piah lamah khan rebate 2% kan la nei thei leh dawn a. Chuvang chuan hetiang hian min tih sak se a tha ngawtin ka ring a ni.

Tin, solar sawi takah chuan 20 mega watt Vankal Solar Park kan siam a. Tunah hian infrastructure hi ₹ 2107.12 lakhs -in kan thawk mek a. A kawng khi black-top chu sawi loh metal pawh a la ni lo va, ruah a sur hlek hian kan tang zel a. Hmanah khan keipawh lungphum han phum ka tum a kan tang a, Kawlkulh atangin a lung kha kan phum ve ta mai a. Han thik tur tingtangin kan Prime Minister pawhin Aizawl atangin Tuirial kha a zuk hawng ve tho a kan ti a, urhsun deuhin Kawlkulh wayside Tourist lodge-ah khan a lung kan phum ve a ni.

Mega Watt 2 pe chhuak thei tur solar park Tlungvel - ah khian kan siam bawk a. Pawisa kan mamawh hi ₹ 1400 lakhs a ni a, ₹ 760.85 lakhs hmuh tawh a ni a, a dang hi chu SEDP atangin hmu turah kan inngai a ni. Hei hi kuminah zawh kan

tum a, kan tih zawh theih chuan Mega Watt 2 tha tak ni sa hnuaiah kan nei thei reng dawn a ni.

Chu lo chu 'Augmentation of 33 kV Sub-Station within Aizawl' hi power sem darhna Aizawl khawpui chhung ami 33/11 kV Sub-Station hi a load a san lutuk tawh avangin transformer hi a chhe fo thin a, transformer lian zawka thlak tum a ni a. 10 MVA lo thleng mai tura beisei, order tawh a ni. Tin, Zuangtui-a 132 kV Sub-Station saw tih len tum a ni a. Hei hian min chawm zo tawh lova, 12.5 MVA hi 25 MVA transformer 2 - a thlak tum a ni. Chu chu mega watt 50 lai pe chhuak thei tihna a nih chu. MVA an tih hi mega watt sawina a ni ang. He transformer hi tunah hian vuah fel vek a ni tawh a, an test ang a, a lo that chuan commission mai theih a ni.

132 kV Line, Sihhmui hi nichinah khan kan sawi tawh a, sawi lo mai ila. 'Improvement of 132 kV Line from Bukpui-Khawzawl via Lungdar' te pawh hi kan sawi tawh a. Hei hi khi lamah line khat chauha hmu lovin hemi siam zawh a nih hnuaiah chuan Champhai, Khawzawl leh a chheh velte hi supply 132 kV kawng nhihin kan pe tawh dawn a, an tan a chhenfakawm viau ang tih kan beisei a ni. Mega watt 5 pe chhuak thei tur Hydrel Project Khawiva tihte nichinah kan sawi tawh a. Mega watt 4 pe chhuak thei tur Kawlbem te pawh kuminah zawh tur a ni a. A chung ami 5 mega watt pe chhuak thei pawh hi kumina zawh tura beisei a ni.

Mega watt 24 pe chhuak thei tur Tuirini Hydrel Project hi tunah hian la tih chhoh zel a ni a, approval hi 465 crore neih tawh a ni a. Pawisa hi New Development Fund atangin 352 crore puk a ni ang a. Chutiang tur chuan Ministry of Power pawhin phalna min rawn pe tawh a. MNRE atangin 20 crore min rawn pe baw ang a, state-in 83 crore sanction min pe ve ang a. Tunah hian Forest pollution clearance leh Irrigation leh Fisheries-ah No Objection dil mek a ni a. Revenue Department atangin land acquisition dil mek a ni baw. Helaiah hian thil vanduaithlak deuh mai a awm a, ka bial khua a ni a, ka tan hian a harsa khawp mai a. Power lamah a hminga hotu ka ni si a; tin, khi lamah ka bial mipuite, Pu Speaker, nang pawh i bial mipuite khaw 3/4 lai amite an tel baw a. Kan pahnih bialte engkim an neihna, tunhmaa pi leh pu atanga lo, huan, ro leh leilet an lo neihna a lo ni ve a. Hei hi tunah hian Revenue lam atanga dan kan en chuan riverine reserve a khilai ram nei zawng zawng chu compensation claim thei loh a ni a, chutiang a nih

chuan no objection lo sign tu zawng zawng kha kar hmasa lamah khan Saitual - ah mi tam tak an inhmukhawm a, engti kawng zawng mahin kan huan lo/ram tih ral hi kan phal dawn lo an lo ti leh ta bawk si a, ka tan hian a buaithlak duh khawp mai a. Dan chu danin a kal tur a ni bawk si. Khilai 24 mega watt pe chhuak thei tur leh harsa taka Bank, China lam ami te, hmunpui lian zawk daih ami te pung tlem zawka puk kan han tum zawk te, kan han hlawhtlinna te, Ministry of Power ten min lo phurpuina zawng zawngte kha a thlawn vek mai ang tih kan hlau khawp mai a, chu lai te chu kan House Leader hian min hriatpuia, chu lai te chu a her rem dante min hriatpui theih chuan a changtu ni mah ila, khilaila an thil neih dan te, Revenue tho in ram an pe a, Revenue tho in zangna dawm na pek an rem ti leh lo a, kumtin chhiah an chawi ve reng tho si a. Chu lai chu keimahni leh keimahni Revenue tawp zia lanna a ni a. Helailah inpekthuah tam tak kan awm thin a, tunlaia tawp thar a ni lo va, tun hma lam atanga Director fel ber pawhin tih fel tum mahse a tih fel tak tak theih tawh lo, chu chu ka han sawi ve duh mai mai a ni.

Tichuan in sawi chiah loh pakhat kha 132 kV line Melriat to Khawiva pawh hi kan sawi tawh hengte hi zo thuai thei tawh tura hma lak mek a ni a. 33 kV Sialsuk hengte pawh hi 95% kan zo tawh a, Tichuan Lawngtlai lam te, Saiha lam te, kan sawi nual tawh a, kan sawi fel tawh niin a lang a. Tin, heia kan hotuten an rawn khak tel zauh scheme mirethei zawkte tana eng pekna tur a ni a. Mizoramah hian chungkhaw 25755 kan pe tawh a, nichina Group Leader zahawm takin a sawi nge ni, Pu Mathlantea rawn sawi kha hei hi North East-ah a zo hmasaber kan ni a, kan inchhuang ve viau a ni. DDUGJY hi crore 30 senga thingtlang khua 45 te hnena eng pekna tur a ni a. Heta tan transformer thar 77 leh 11 kV line 208 kilometre leh LT line 70.2 kilometre zam tur a ni a, chhengkaw 1480 hnena a thlawna eng pekna tur a ni, heng hi thil tha tak a ni.

Power lei leh hralh chungchangah Power hi kan leina nichina ka sawi tak ang khan kumin 2018-19 khan crore 288.18 a ni a, kan lo hlep ve thung chu crore 266.02 kan hmu let ve thung a ni. Hei hi engtingge in hralh theih, kan la intodelh si lo va in ti mai thei a. Kan hna thawktu te hian zanlailah dar 1:00 atang 4:00 thleng te power hi lei duh state tam takte an lo awm thin avangin an lo lei chhawn ve tir thin a ni. Kumina revenue 2018-2019 kan chhunluh kha ₹ 21309.71 a ni.

(PU LALDUHOMA : Pu Speaker, kan lei atanga kan hralh chhuah kha a tam viau mai a, kan mamawh aia tam kan lei thin a, khati zat zat hralh leh tham kan nei te kha chu tan kan lak a ngai hle a ni) (interruption)

Pu Speaker, ngaihdan pahnih a awm thei ang a. Peak hour-ah kan mamawh lai chuan kan mamawh aia tam kan lei lo va. Kan hman tawh loh, (keini chu industry kan nei lo va, zan lamah kan mengrei bawk lo va, hna kan thawk bawk lo va) hi kan mut rehah an lo hralh thin a ni. Chuvangin kan Engineer-ten an hisap dan hi chu a dik tho awm e tih kha ka lo pawm ve dan a ni e.

(Darkar 1 pawh kan la ti lo ve. Kan MLA zahawm takte kha tuman an hun an ren bik lova chuvang chuan zanin na na na chu naktuk lama ti tur kha men an thei ang chu maw! Kan CM leh Pu Robert-a te an ni a. Anni chuan an lo thiamsa deuh tawh bawk a).

Demand 27-na, District Council & Minority Affairs hi han sawi lawk ila. District Council 3 kan nei a, MADC, LADC, CADC-te an ni a. An inrelbawl danah hian Grant in Aid-a pek thin an ni a. Kuminah hian sum kan pek zawng zawng chu ₹ 4,01,06,87,000.00/- a ni a. Pawisa an hmuh zawng zawng hi nikum RE aiin tlemin ₹3,623 lakhs in a tlem a. Hei hi chu RE kuminah kan la tih ve loh vang a ni a, a tlem lovang. Hlawh kan hmu thei dawn lo tihte a then ah an sawi a, mahse kan Finance Minister-in, “ Hlawh hi chu hnathawktu in nih chuan in hmu ngei ngei ang” a ti a. Chu chu rin mai a thain ka hria.

Sum kan hman dan leh kan hmuh dan hi a mimal te te in Autonomous District-ah khan LADC-in Grant-in-Aid Salary-ah crore 14,971.31 a ni a. Grant-in-Aid Non Salary-ah hian crore 1,012.34 a ni. MADC-ah hian Grant-in-Aid Salary-ah crore 13,571.92 a ni a, Grant-in-Aid Non Salary-ah crore 996.63 a ni. CADC-ah hian Grant-in-Aid salary-ah crore 8815.6 Grant-in-Aid Non Salary-ah crore 639.05 a ni. Avaiin nichina kan sawi ang khan crore 40,116.87 a ni.

ADC te hian assistant to excluded area hnuaiah capital set eng emaw zat an nei thin a. Hei hi hmasawna atana an hman thin deuh ber chu a ni. Tin, ADC 3 te hian 7th Pay an hman ve dawn avangin tuna kan pek ang hi an kham dawn lova, chuvangin kan pek belh a ngai dawn a, Finance Minister hian min hriat lawk sak a pawimawh a ni tih nichina kan sawi tawh ang kha a ni.

Tichuan tam tak sawi tur a awm lo va, tunah hian buaina, harsatna kan tawk deuh a hekna a awm a. Mara Autonomous District Council saw hekna a awm avang khan thiah tum ngar ngara sorkar che ang lek leka inpuhna kha a awm a ni tih kan hria a. Hei hi sorkarin a tum a ni lova. Miin hekna a awm chuan an hekna te kha a dik em tih chhui chu sorkarin a tih tur a ni a. Chuvangin sawlai saw one man Inquiry Commission tira chhui tur a ni a, chumi chu mi dik tan chuan min chhui mai sela, kan dik alawm tia lo tawrh ve mai tur a ni a. Amaerawhchu thufingin, 'misual chu um lohin an tlanhhia' tih ang deuh khan, vawiinah hian sawlaia ruling party ni lai te chu inhumhimna lal chhungkaw sutpui vawn tumin BJP-ah Pu BDA te pawlah an lo kal a. Anni hian an welcome meuh em ka hre lo va. Chutiang chu a ni a, a paw ka ti khawp mai a. Tihian lo tuar mai sela, engmah tihdik loh leh tihfel loh a awm lo a nih chuan sorkar hian engtikawng mahin a thiat thei lo reng reng. Thiat tumna rilru pawh kan nei lo reng reng a ni tih ka sawi duh a. Amaherawhchu hetiang dik lo taka an Conduct of Business Rule kalha an lo kal palh a nih chuan anmahni leh anmahni an invawchhe dawn a ni tih kha thil chiang sa a ni a. Helaiiah hian an CCB Rules 12(5)(a)-ah chuan disqualify tur a ni tih a ni mauh mai a. Amaherawhchu a disqualify-tu tur kha Chairman a ni a. Chairman kha a kal ve baw si chuan a buaithlak viau awm e. Vice Chairman kha a kal ve baw si chuan an vai chuan a thiat thei lo ang a. Governor tih tur a nih kher chu ka ring lova. Helaiiah dan anga tih a tul a hlauhawm khawp mai. Chulai chu kan lo hlau lutuk kha a paw khawp mai a. Kan tithaih ve mai mai a ni a, thil diklo deuha an ti hi a paw em em mai a. Um lova tlanhhia hi intih palh te pawh a awm theih a nia.

Tin, kan hriat tlana ka duh chu pawisa kan kawl zawng zawng atanga salary-a kal hi hre tlang ve reng reng hi ila a thain ka hria a. Development-a kal a tlem dan te, Lai Autonomous District-ah hian salary atan hian kuminah ₹ 14,971.31 lakhs kan pe a, chu chu 93.08% a ni, hei hi an hlauhah a kal vek dawn a ni. A pum puia ₹ 16,083 pawisa kan pek atang hian. Tichuan non-salary-ah chuan ₹ 1,122.34 a kal ang a, chu chu 6.92% a ni. Development han duanna tur kha a awm vak lo va, mi sawi a ni a, ka hriat a ni lo va. Thenkhat te pheih chuan development hi chu a kal tak tak lo, tute emawni an sawi zel te an ti a, a buaithlak ngawt mai.

Mara Autonomous District Council, tuna tlanhhie rih ta kan han tih kha a vaiin crore 14,568.55% pek a ni a. Chuta tanga 93.16% chu an hlauh-ah, salary-ah a kal a ni, development-a kal tur chu 6.84% a ni.

Chakma Autonomous District Council chu a vaiin crore 9,454.67% pek a ni a. Chuta tanga an hlawha kal chu 93.24% a kal a ni. Development-a kal tur chu 6.76% a ni. Chakma Autonomous District Council chu a vaiin crore 9,454.67% pek a ni a. Chuta tanga an hlawha kal chu 93.24% a ni. Tin, development-a kal tur a chu 6.76% a ni. Chutiang chu sawlaia kan tih dan a ni a. Kalphung tha deuh hmuhchhuah theih ni se chuan a duhawm takzet a ni.

Demand 23-na Art & Culture, vawiinah Art & Culture , demand sawi niah hetiang hi kan incheina te pawh a ni hlawm a, lawmawm ka ti a. Hengah hian tih dik lo palh kan budget buah khan kan nei a, hengte hi ka rawn ziak chhuak vek a, mahse, a hretute pawh in ni mai thei a, sawi tulah ngai tawh lo ila. Hun ka hmang rei dawn tak takin ka hria a, ka in thlahrung ve tan tawh ang e.

Art & Culture hian kumina sum kan dawn chu crore 1,257.55 a ni a. Kum hmasaa BE aiin a tamin lang mahse, kan inrelbawlina hi a lian ve hle mai a. Directorate hnuaiah hian Tribal Research Institute te, Museum te, Archive-te, Library te, District Art & Culture Office Lunglei te, Archeology Wing leh Institute of Music and Fine Arts te an ni a. Hengte phei hi chu Pu Andrew phei kha chuan a ngaipawimawh em em a, kei pawhin ka ngaipawimawh a, hengte hi kan tih changtlun leh zual a ngai a. Nichina kan ngaihthlak mawi tak kan Pathian hla te pawh hi Puma zai te leh eng emaw te pawhin inphuah siak te pawh han awm se tih te pawh kha, kan tih zel tur ni ah ka ngai a ni.

Tin, hmun hlui humhalh leh chei hi kan ngaihpaawimawh tak a ni a, Finance Commission atangin sum hi kan hmu thin a, amawherawhchu kuminah hi chuan kan hmu thei dawn lo a ni. Tin, lehkha chhiar zau te hi kan inzirtir a tul khawp mai a, chumi atan chuan library te a pawimawh em em a, hlawh nei lem loa neitu chan chang khaw tinah NGO, YMA ten library an duh a, hengte pawh hi sak sak zel theih ni se kan duh khawp mai a. Pawisa kan hmuh thinna hi Raja Ram Mohan Roy Library Foundation, Kolkatta atang hian a ni a, heta tang hian pawisa kan hmu thin a. Kuminah hian chumi lo do let na tur chu khulamah pawh kan dil hmam nuai 15/- lai kan Finance Minister zahawm tak hian min dahsak a, kan lawm viau a ni.

Vawiina kan dress ang leh hei aia mawi leh tha zawk te pawh kan tih theih zelna tur hian sum hi nei hnem deuh ila, a subsidize rate-in eng emaw chen hi chu inpe ila. Vai te pawh an dhoty tih te, eng engemaw an kaih hnek hnek a, tunah chuan

subsidize a ngai tawh biklo ang deuh hian nakinah chuan keimahni pawhin hei hi inchei nan kan la hmang tak tak thei ang tih kan beisei a. Tunah hian cheng nuai 7 leh sing 5 subsidize na turin min pe a, hei aia tam zawk hi nei thei ila chuan kan duh khawp mai.

Tin, Mizoram Publication Board tan Grant – in – aid atan nuai 10/min rawn dah sak bawk a, lawmnawm kan ti a. Ziak thiam te an pung zel a, hetiang a pun zel karah hian mahnia lehkhahu chhuah theilo mi harsa ve tak tak te kan awm a. Chung tanpuina tur atan te chuan thil pawimawh tak a ni.

A tawp berah chuan Art & Culture - ah hi chuan mi thenkhat ten ti teh ang, MNF ho chu hel an inzirtir leh ta em ni, tunhma thil an lo tih thin an awmna thin te an inkawhhmuh leh tak an ti a. Hmanniah Tuirial Jail hluiah Tourism Minister zahawm tak nen, kan party hruaitu te nen kan zuk kal a, hei hi tun hmaa Tuirial Jail an tan laia kan pasaltha te an tanna hmun a ni a. Thla hnih zet leiverhin an awm a, chung zawng zawng chu thiam takin, an finnate kha a ropui ka ti a. An thluak an hmang tak tak niin ka hria a, khithah ceiling chungah khami an verh chhuah leivung kha an kawmawl dawnin kil li ah an han suih a. Tah chuan an dah puar a, thawkkhat lai phei chuan ceiling kha a rawn delh puar a, an mangang viau a ni, mahse man chhuah lohian an tlan chhuak ta a. Khatih laia an sawi dan phei chuan ‘CNN te, BBC ten the greatest escape in the world tiin an puang kulh kulh a ni’, tiin an sawi nghe nghe a ni. Chutianga an tlanchuahna hmun chu kan zuk tlawh a, hengte hi humhalh chi niin kan ngai a. A chhan chu MNF movement hi a theuneu lo a, a ropui a ni. Hnam tana dinchhuah hei aia tha zawka kan ram a lo inrelbawl a, sovereignty kan neih theihna tur atana inpe te hnathawh kha a ropui a ni. Hei aia kan inlungualna khang hunlai angah leh tun ang hunah chuan eng thil ah mah hian Zofate kan inlungual dawn tawh lo. Chuvangin helna lamah kan let leh dawn e, kan inzirtir e tihna lam ni lo in, heng hi kan humhalha kan chei that a ngaiin ka hria a. Chumai chu ni lo in hmanni lawkah khan Tualbung-ah ka han kal leh a, Tualbung kah te kha a ropuiin a theuneu lo a ni. India sipai te tanhmun tha em em ah, khi aia tha khi an inkahna ah hian India sipai hian hmun an neih hi ka ring miah lo a. Chutiang tlang bawk tha taka rolling train te, laihkhuar vek, khatiang karah khan kan sipai, hnam sipai, MNF army te khan an han bei ta a ni a. A chhan chu khatih laia lo awm an major te khan, ‘ In Lal Isua nen pawh lo kal rawh u, kan cho che u a ni,’ a thawn kual vel kha kan hnam sipai ka bula Home Minister zahawm tak pawh hi khami

inkahnaah pawh khan a tel ve a ni. Chutianga kan Pathian nena min cho na na na chu tiin thih huamin Pathian rinchhanin an kal a, mak danglam tak maiin khalaia sipai awm 30 lai kha an zu kap hlum deuh vek thei a. Tunah hian chungte pawh chu a hriatrengna kan siam a ngai. Thangtharte hian hmana Vanapa te, Taitesena te, Chawngbawla te ho kha an ropui em em, hriatrengna kan thinlung ah kan nei a ni. Amaherawhchu khang ho chauh kha mihuaisen an ni lo ve. Vawiina thangthar lo piang chho zel te pawh hi an huaisen a ni, pi pute huaisenna kha kan thinlungah hian kan than hnan a ni tih kan hriat a pawimawhin ka hria a. Khing te pawh khi state sum atanga kan ti thei lo a nih pawhin sum dang kan zawng ang a. Tourist hoten (nakin ah chuan history a la chang mai dawn a) an tlawh huai huai na tur chuan hmun nuam takah kan siam ang a, MNF khatih laia thi te chauh ni lo in, India sipai thi te pawh kha an fakawm em em a ni. Chawimawi tur an ni khangte pawh kha. Khatih lai chuan MNF te kha misual, hel an ti a, sorkar thupek angin an lo kal a, chutiang tudai tur chuan an lo kal a. In surrender miah loa khatianga an tang ral raih kha India sipai te pawh kha hnam chhanin an thi tho a ni, a ropui em em a ni. Chungte chu ka rilruah chuan Home Ministry- ah an hming kan dil ang a, khang thi zawng zawng te pawh kha a hriatrengna tur lung kan dawh ang a, kan ziak ang a. Kan naute thi te pawh kha chutiingin kan ti ang, chutiang chu kan tih tur niin ka hria a. Chutiang piah lamah chuan, Remna Run - a martyr thlanmualte pawh khu party anga enkawl chi niin ka hre lo. Party anga enkawl lovin Art & Culture hnuai ah emaw, tu hnuai berah emaw sorkarin la lut ila. Chutiang chuan enkawl na tha tak nen, khulai ah ruang kan sengkhawm theih theih te kan dahkhawm zel bawk a. Tiang chuan hlu takin kan siam a ngai a ni. Chutiang thoin a siamtuten an phal a nih chuan Congress thalaiin Sesawng, CTI-ah martarte thlan, hriatrengna an siam a. Chungte pawh chu a tul ang zela sorkarin lak sak a, hmun pawimawhah, hriatreng tlakah kan siam a pawimawh em emin ka hria a ni.

Demand No. 33-na Land Resources, Soil & Water Conservation hi sawi tur a tam a. Amaherawhchu kan sawi chipchiar tawh lovang a. Land Resources, Soil & Water Conservation hi tui avanga leilung lo luang ral zel tur te, lo danglam zel tur te venna atana hnathawktu pawimawh ber zing ami a ni a. Kawng hnihin then a ni a Engineering Measure leh Biological Measure - a then a ni a. Chung chuan tih tur hrang hrang an nei a ni. Rubber leh coffee te, broom tih te hi kan crops ni thin a ni a. Amaherawhchu, hmanni lawkah khan tih danglam niin kuhva hi an kutahrawn dah a

ni. Tunah hian plantation leh soil erosion venna atana tha tak ni si, ram ngaw siamna, khawlum zel, climate change lo do ve na atan pawha thil tha tak ni si leh mihring, kan Mizo mipuite, kut hnathawktute tana hlawk si neihna a ni a. Hei hi sum kan ren lohna atan pawh a tha hlein ka hria a, income tha tak neihna niin ka hria a ni. Kuminah hian RKVY atangin nuai 51.48- in hna kan thawk mek a. Tin, kum kal turah hian hemi atang bawh hian nuai 105 beisei kan nei a. Tin, NABARD sum kum kaltaah khan nuai 313.77-in rubber plantation hi siam a ni a. Tun kum hman mek turah hian nuai 108- a chhunzawm leh tum a ni bawh a ni.

Tin, rubber plantation kawng hi all weather road a siam tha kan ti a. Chutiang a nih loh chuan a buaithlak riau a, nuai 514.26 hian siam kan tum a ni. Tichuan a hmingte pawh lo danglam chhoin department te pawh kan inthlifim chho zel a. Hotu tha leh fel tak tak ten min awp chho dawn a. Chungah chuan IFAT sum hmangin Agriculture leh Horticulture Department te nen tanghoin project hrawl tak Fostering Climate Resilient Upland Farming System (FOCUS) an tih mai hi bul tan nan hman kan tum a. Irrigation & Water Resources Department te nen thawkho bawkin JICA, ODA loans, Japan lam atanga project proposal Land & Water Resources Development and Management Project for Livelihood Improvement in Mizoram hi tih kan tum bawh a. Hei hi Central Water Commission-ah thlen a ni a, reiloteah min pawmpui ngei kan beisei a ni.

Environment, Forests & Climate Change Department nen tangkawp bawkin Adaptation to Climate Change in Mizoram project hnuaiah hian Soil & Water Structures and Cash Crops Plantation siam a, hma lak tum a ni bawh a. Green Climate fund atangin rubber plantation leh soil conservation work nasa taka thawh tum a ni bawh a ni. Chungte chu ka sawi duh tlangpui a ni a. Kan department-ah hian sanction post hi 486 kan nei a, filled-up hi 250 a ni a, vacant hi 236 a ni.

Tin, NLUP rubber hmangin rubber chingtute hi chhungkua 1558 kan nei a. NABARD sum atanga tanpuina dawngtute hi chhungkua 1200 an ni a, a vaiin 2758 an ni a. Private a ching hi tam tak an awm a, tunah hian kan chhiar chiah lem lo a ni. Tunah hian kung nuai khat vel hnai theih tawh turah ngaih a ni a Association te nena kan inkawmnaah an sawi a. 1 hectare hian 1500 kg tharchhuak theia ngaih a ni a. Tin, 1 hectare hmunah hian kung 500 chin theiha ngaih a ni. Tiang chuan 1 hectare hmunah hian 1.95 lakh wawi khat hnuaiah an la thei mai a ni. Hnaite a lo hun dawn

takah chuan tiin Association lam hian 'engtin nge a khawl/machine te hi kan tih ang', an rawn ti a. Kan Chief Minister, Finance Minister zahawm tak hnenah kan thlen a. Khawl hi a tira an sawi dan tak pheih chuan 50/60 vel an ti a. Mahse chu aia tam zawk chu kan ram intodelhna turin bamboo te, rubber te kan Chief Minister hian a ngaipawimawh em em a. A ngaihpawimawh zia entirnan tunah hian machine kha 100 lei sak kan tum a ni. Chutiang piah lamah chuan a hmanraw dang subsidize - a lei turin kan buatsaih bawk a ni. A ropui ka ti khawp mai keimah tak hian. Tunah hian W.Serzawl, Saiphal, Hortoki, hmanlai han ti ila, sorkar hmasa MNF hun hmasa, kum 10 ralta daiha an bamboo link road siamah khan/khami zul thla ah khan rubber tam tak private-in an ching tawh a. Khung khu kan hotute pawh hian an la hmuh sak mumal lo maithei, kan project neihna lam a nih loh avangin, mahni sum senga ti an ni a. Chumi kawngte chu all weather road - a siam tum a ni a. Hei hi sorkarpui a chet loh chuan 35-40 kms vel a ni a. Khu khu a tha em em helaiah khualzin tan pawh a tha. West Serzawl thlen hma km 1-ah a peng a, kawng chhuk chho awm miah loin a kal char char a, laih zau em em mai grade tha lutuk a ni a. Khutah Hortoki khuaah a zu fin a, chulaiah chuan lei dawh tur a ni, Tlawng lei dawh a ni a. Hortoki atangin khutah a kal thla leh a Bairabi-ah a kal leh mai a, hetah Kawnpui lama chhuak lo khan. Chuvangin zin kawng atan pawh khulai kawng khu, a tha a ni.

Tin, Aizawl District ti ila a ni chiah lo a, Mamit District mah mah zawk a ni a, a district ang chuan. Helai hnai Aizawl hnaivaiah chuan bamboo chin nan te, rubber chin nan te, kuhva chin nan te khu aia ram zau tha khu a awm tawh lo a ni. Chu chu cheibawl a ngaiin kan hria a, chutiang tih tum chuan kan awm mek a ni. Chung zawng chu ka sawi theih ni mai sela. Rei tak kan sawi hnua min lo ngaithla fan fantu, dawhthei taka min lo ngaithlatu zawng zawngte hnenah lawmthu ka sawi e.

Pu Speaker, ka Demand Nos. 23-na, Art & Culture Department- ₹ 12,57,55,000/- 27-na, District Council & Minority Affairs Department- ₹ 4,01,06,87,000/- 33-na, Land Resources, Soil & Water Conservation Department- ₹ 19,58,14,000/- 39-na, Power & Electricity Department - ₹ 5,67,39,13,000/- total- ₹ 10,00,61,69,000 hi member-ten min pass sak turin ka dil e. Ka lawm e.

PU C. NGUNLIANCHUNGA : Council chungchang kha ka sawifiah lawk ang khawngaih takin. Salary chungchanga kha cheng ₹ 1,04,971.31 kha salary

atan pek a ni a. Tichuan non-salary-ah khan ₹ 1,00,112 a ni. Salary atana kan pawisa pek dan kha, a development work tur kha kan pe tlem hrim hrim a ni tih lai kha Pu Speaker, khawngaih in han sawifiah a thain ka hria. Ka lawm e.

SPEAKER : A lawmawm e. Minister sawi dan nen pawh a in ang chiah e. Aw le, Minister zahawm tak Pu R. Lalzirliana'n a chanpualte kum 2019-2020 atana hman turin heng Demand Nos- 23-na, Art & Culture- ₹ 12,57,55,000,

27-na, District Council & Minority Affairs- ₹ 4,01,06,87,000 33-na, Land Resources, Soil & Water Conservation- ₹ 19,58,14,000 39-na, Power & Electricity- ₹ 5,67,39,13,000 te hman turin a vaiin ₹ 10,00,61,69,000-te House-ah pass a rawn dil a. Remti apiangin 'rem ti' ti ula, (Members : Rem ti) Rem ti lo in awm chuan 'rem ti lo' ti rawh ule. An awm lo a.

Tunah chuan Minister zahawm tak Pu R. Lalzirliana Department chante- Art & Culture Department, District Council & Minority Affairs Department, Land Resources, Soil & Water Conservation Department, Power & Electricity Department-te hman turin ₹ 10,00,61,69,000/- hi House-in lungrual takin a pass ta a ni. (PU R. LALZIRLIANA, MINISTER : Pu Speaker, ka lawm e).

Tunah chuan Minister zahawm tak Pu Lalruatkima'n sawihonate rawn wind - up turin kan sawm ang a. Sawifiah ngaite sawifiah in House-ah pass rawn dil nghal se. Tunah kan lo sawm e.

PU LALRUATKIMA, MINISTER : Pu Speaker, ka lawm e. A hmasain wawinah ka department enkawl demand-te sawihona hun tha tak min pek avangin ka lawm a. Kan hriat theuh angin Land Revenue & Settlement, Information & Public Relations leh Rural Development-te hi Mizoram-ah chuan department upa pawl tak leh pawimawh takte an ni a. Chuvang chuan member zahawm takte pawhin sawihona hunah thahnemngai takin Department kal zelna tur atan thurawnte min pe a.

Tin, zilh kan ngaihnaah pawh min zilh a, chutiang zel chuan tanpui kan ngaihnaah pawh min tanpui inhuam taka rawtna chi hrang hrang min rawn neih sak avang khan lawmthu ka sawi a. Chutih rual chuan department kan nih avangin mipui nen inngheng tlat kan nih avang hian a thawktute pawh kan infuih nasa a. Kan thawh

chhan mipuite tana thahnem ngai leh taima taka thawk turin nasa takin kan lo infuih ve zel a ni tih ka sawi hmasa duh a ni.

Kan hriat angin ka Demand No. 6-na Land Revenue & Settlement Department hi department harsa tak mai a ni tih chu member zahawm takten kan sawi tlang a, kan hre tlang vek mai a. Chhungtin mai file hi kan kawl ta mai a nih hi tih mai tur a ni a, chhungkaw thenkhat file-te phei chu kan kawl teuh mai a. Chutiang khawp chuan a harsa a, amaherawhchu a duh duhin an rawnhai changte a awm a, an hai let phet phung a, hmanlai ami tawhte kha a ni a. Chutiang chuan kan ram neih, mimal ram neih zau zawngte member zahawm takte pawhin an rawn zawt a.

Amaherawhchu mimal ram neih chungchangah hian keini department chuan uluk takin kan pass neih hrang hrangte kan chhinchhiah laiin mimal ram neih tih a nih miau si avang khan Village Council-in dan anga a lo pek tawhte, authority dang District Council lam 3-in an dan neih in a phal anga ram an lo pek ve tawhte kha han inzawh chhuah kha a lo har viau mai a. Duh angin member zahawm takte zawhna kan chhang fuh hlei thei lo a, in mi hriatthiamna ka han ngen hmasa ni se.

Kan hriat angin kan department budget, a bik takin Revenue Department budget hi nasa takin a pung a. Chutih lai chuan a punna hi hlawh lo san vangte pawh a ni pakhat a. Kan hriat angin Land Revenue han tih hian revenue earning department-te kan nih laiin mipui lam hriatah erawh chuan kan nih lohna chente pawh a awm a. Thahnem han ngaih lai hian mipui hnen atanga sum la khawm, chhiah khawn khawm kan nih avang hian khawn ngah pawh a har viau mai a. Chutiang te chu kan ni a. Chuvangin ram changkang apiangin kan ram neih ang chi land record an tih ang chi-te hi an nei tha a. Revenue Department hi development works department ang kan nih ve chiah loh avangin, mihring leh thil dang zawng zawng awmnate leh development hmalakna zawng zawng hi ram a ngaih si avangin, chumi record tha tak mai chu development kan tih zawng zawngte tluang taka a kal theih nana hna hmasa/thil hmasa ngei ngei tur a ni a.

Chuvangin Mizoram-ah pawh District Council leh a hnu lamah pawh department mawhphurhna zau tak a nei zui a. Kan department atang hian Excise Department leh Taxation Department-te hi a lo piang-ta a ni. Keini

department-ah hian harsatna chi hrang hrangte kan han tawk ve thin a. A bik takin, kan demand sawi rual hian in man-power, thawktuah te hian harsatna kan tawk nasa a, member zahawm tak te pawhin min hriatpui kha. A bik takin tunah hian sanction post 490 kan nei a, chutah chuan 344 kan fill-up a, chutah post ruak hi 146 zet kan nei a ni. Chuvangin revenue kan nih avang hian ram han teh te, mipui tana hna han thawh zung zungte a lo har a. Tunah hian Surveyor kan tih ringawt pawh hi Assembly zawhna kan chhannaah post ruak hi 45 ni a, kaisang an lo awm leh tawh avangin Surveyor - ah ringawt pawh hian post ruak hi 51 kan nei a ni.

Khang post ruak bakah khan kan fill-up chhun-a te pawh hi hrisellohna avangte leh harsatna chi hrang hrang avanga duty ti tha hlei theilo kha mi eng emaw zat an awm bawk si avangin, nitin mai hian ram teh tur, rambuai khatiang chi kha tam tak dawrtu kan nei a. Chuvangin, mipuite beisei ang kan phak lo va, amaherawhchu mipuite beisei ang phak turin kan infuih-a, tan pawh nasa leh zualin kan la chho zel a ni. Vawiinah kan hriat angin revenue beisei kan ni a, the fiscal policies strategy statement No. 18-na ah khan DILRMP-ah te; tin No. 19-na Directorate of Terms and Registration-ah te khan revenue tam zawk hmu tura beisei kan ni a. Chuvangin, kan beisei angte kha phak ngei tumin thawktute pawhin tan kan la a. Amaherawhchu, thawktu kan indaih tawk loh avangin harsatna erawh chu kan tawk dawn a ni tih chu min hriatpui ula.

A bik takin land revenue hi kumin chhung hian cheng nuai sangkhat leh za beisei/target kan ni a. Land record hi software E-Rom kan ti a, kan hman theih chuan target hi khum ngei kan beiseiin kan ring bawk a ni. Chutiang chuan Stamp and Registration Fees atangin nuai 500 target kan nei a, hengte pawh hi National Generic Document Registration System hman tum a ni a. Sum hmuh kan beisei pawh hi chutianga kan kal theih chuan kan khum ngei pawh kan ring a. Tin, land reforms atang hian cheng nuai 300 hmuh hi min beisei ang ngeiin rawn tlin pawh kan tum a. Chutiang chu kan ni a. Pu Speaker, member zahawm tak ten an sawi zawng zawng kha wawiinah hian ka react dawn lo va, a tlangpui zar zar han sawi ka duh a.

Kan hriat angin member zahawm tak Pu Andrew H. Thangliana, Tuirial bialtu leh Dr. B.D. Chakmate khan Assam Rifles ram hman zel dan tur te leh Assam Rifles ram dil a, pek ve an beiseina te kha kan ngaithla a. Amaherawhchu kan hriat angin sawlai Assam Rifles ramah sawn encroachers mi 56 an awm a, Council of Ministers thukhawm chuan heng ram neitute hi an ram hi cancel sak ni se an tih angin, chutiang tur chuan kan buaipui mek a. Mi eng emaw zat surrender tawh pawh an awm bawk a ni. Chuvangin, sawlai ram saw an chhuak ngei dawn a ni tih hriain kum 2002 khan “The Mizoram Restriction of Unused of Transfer Land Act, 2002” hi kan lo nei tawh a. Chumi dan hmang chuan vantlang leh sorkar tan a tangkai thei ang bera hmang turin sorkar chuan dan fel tak a lo nei tawh a ni. Chuvangin, member zahawm tak Dr. B.D. Chakma in sawlai ram saw Assam Rifles chhuah hunah min pe ve tur a ni a rawn dilna kha chu danin a pe thei dawn lo a ni tih ka han sawi lang a ni.

Tin, member zahawm tak Pu C. Lalsawivunga khan Survey & Training Institute Hualngohmun-ah sawn hawn ve dan a awm lawm ni a tih kha, hmanni lawkah kan va en a. Sawlai hmun saw khawtlangin an pek a ni a, a then sorkar-in a lei belh bawk a. Kum 2007 chho ah khan sawlai hmun saw sorkar ram atan lak a ni a. Amaherawhchu, sorkar-na kan neih loh chhung khan enkawl mumal vak leh hma lak loh te a nih avang khan harsatna kan tawh a. Chuvangin, tunah hian NEC lamahte, Fifteenth Finance Commission lamah te sawmi ti hlawhtling tur sawn chak takin hma lak a ni bawk a ni.

Tin, member ten kan ngaimawh em em land reforms kalpui a tul thu thahnemngai taka in rawn sawi kha zahawm kan ti a, chumi tur chuan kan dan-te pawh kan inherrem zel a. Naktip maiah khian Amendment Bill kan rawn pulut dawn a, chutah pawh chuan Land Reforms Board-te pawh ruahmanin, chutiang tur chuan sorkar pawh a rawn inherrem ve zel a ni tih ka rawn tarlang duh a.

Sawi tur tam tak a awm ang a, Revenue hi rambuai kan ni a, rambuai hi kan ngah khawp mai a. Pastor leh Pastor-te hian ram an rawn inchuh a, khati vel te kha kan ni a, thilmak tak tak, pa leh fa inkar-ah te harsatna nei, Court hi kan hawng fo mai a Pu Speaker, a manganthlak khawp mai a,

duhamnaa khat mihringte hi kan nih zia a langin ka hria. Ram teh an rawn dil a, a chuang bang a lo awm pawhin midang tan pe chhuak phal reng reng hi kan awmlo em maw ni chu aw tih mai turin kan hup bet tlat a. A dil lehna turin dilna form kan la chhuak a, keimahni vek te hian kan dil leh thin a, chutiangte chu mi tam tak kan awm bawk a. Chuvangin sorkar hian kalphung thlakin ram chungchangah hian heng dan kan neih mek atang hian landingte pawh siamin, in hmun lo ram la nei ve lo ten an neih ve theihna turin ruahmanna siamin dan tha tak mai te kan nei zui ta bawk a. Chutiang chuan cess rate and cess on land chungchangah hian land acquisition dan hnuaiah hian chhiah lak dan tur dan fel tak kan nei a. Mimal ram temporary allotment kan tih, house pass te, land lease te leh periodic patta kan tih ang chi acquire a nih chuan cess on value of 50% kha market value atangin sorkar-ah chhun a ngaih tawh dawn avangin chutiang tur chuan revenue pawh sorkar-in kan hmuh belh ngei pawh kan ringin kan beisei tlat a. Tin, chutih rual chuan Mizoram Land Survey and Settlement Operation Act, 2003 hnuaiah hian ram teh sak tura diltu ten ram demarcate a nih dawn chuan a fee sorkar-in a bithliah anga survey fee an pek zel kha a ngai dawn a ni. Chutiang tur chuan ruahmannate siam chhoh zel a ni a.

Tunah hian Non-Judicial Stamp paper hi stamp vendor-te hnen atangin a mamawhtu ten an lei mai thin a, amaherawhchu Registration Act hnuaiah document registered a nih pawhin stamp duty ngai zat Register emaw, Sub-register emaw hnenah khan a cess sak ang a, chung mite chuan chuta tang chuan leiin khang an deed an ziah hnuah khan, an document-te chu kan register tawh dawn a. Chuvang chuan, deed hi a ziaktu bik, deed writer kan tih ang chi kha license pek an ni tawh dawn a ni. Chung license holder te chauh chuan register tur deed te hi a mamawhtute an ziah sak tawh thin dawn a. Hei hi ti turin kan inbuatsaih a, dan-te pawh kan siam rem zel a. Tin, session hmasaa kan sawilan tawh ang khan franking machine-te hman a ni thuai dawn a, chumi tur chuan inherrem ngai hret hret thil tam tak a awm avangin, hengte hi sorkar-in chhiah kan hmuhna tur chi hrang hrangte zingah chuan kan ngai a ni.

Tin, Land Laws leh Land Reform chungchangah hian kan hun tawng mila kan land administration hi kan her rem chhoh hret hret hi a ngai khawp

mai a, Mizoram Land Revenue Act, 2013 leh a Rules pawh kha mipui leh sorkar mamawh thlirin siam rem chhoh mek zel a ni a. Chutah pawh chuan sorkar-in Land Revenue and Survey Board-te pawh a rawn din chho ta a ni. Tin, land records fel leh rintlak hi kan mamawh khawp mai a, chumi tur chuan kan official-te Delhi lamah te zuk kalin, theih ang angin hma kan la a. Chutah chuan Electronic Total Station (ETS) te, Global Positioning System (GPS) leh Geographic Information System (GIS) thiamna hmanga land record siam that chhoh mek zel a ni a. Chuvangin, vawiina kan harsatna, member zahawm tak Pu Vanlalhlana te pawhin an sawi, ram inthuah tam lutuk avanga harsatna kan tawh mekte pawh hi, khangte khan la sukiang chho zel turah kan ngai a. Chuvang chuan land survey hi man power leh sum senso lamah hautak zet a nih avangin chumi ti thei tur chuan sum hnar pawh kan dap zel a. Kan sorkar pawhin ruahmanna thar nei chho zelin National Land Records Modernization Programme tihlawhtling turin central lamah te kan bawhzui a. India ramah hian tha takin land records te state upa lamte chuan an nei tawh a, keini erawh chu kan land records a mumal loh avangin harsatna kan tawh a, chumi ti tha tur chuan sum te kan zuk dil a. Kei ngei pawh hmanni lawk khan New Delhi-ah hemi lam khawihute pawh ka zu dawr a, anni pawhin kan harsatnate hriain sum sanction turin ruahmanna an rawn siam a. Amaherawhchu, hei hi re-imburement basis a nih tawh dawn avangin harsatna erawh chu ala awm hret ang a, sum kan lo hmang ang a, chu chu min lo re-imburse dawn a ni tih ka sawi lang leh duh a ni.

Kan hriat angin staff indaihlohna kan han sawi rual rual khan member zahawm tak te a bik takin Dr. Z.R.Thiamsanga, Champhai North bialtu zahawm tak leh Pu V.L. Zaithanzama, Aizawl West-III MLA zahawm tak khan an rawn sawi a. Settlement Office, Aizawl-ah leh Champhai-ah khan Chowkider dah ni se tih te pawh an rawn rawt a. Hei hi kan lo enzui ang a. Hei hi a manganthlak khawp mai a, Champhai-ah khan Chowkider kha upa lam an ni tawh a, a hmuna riak tur khan harsatna an tawh a, kum lamah te an lo upa ve ta hret a, chutiang chu kan ni a. Khang angte kha a tul angin kan lo enzui dawn nia; tikhan Demand No. 6-na chu duhtawh mai ila.

Demand No. 26-na Information & Public Relations Department hi Pu Speaker, kan hriat angin sorkar thu leh hla, engkim puang chhuaktu an ni a,

Sorkar programme leh function-te, VIP movement leh department hrang hrangte hnathawh mipui hriat theih turin nitin an puangzar thin a ni. Department web site pawh hi Mizo tawng leh sap tawngin an dah a, tlawhtu pawh an ngah hle thin a ni. Press release-te pawh tun hnai atangin sap tawnga dah thin loh kha kan dah chho thei ta a. Chutiang chuan I & PR hi media lam enkawltu an ni a, sorkar leh mipui inkara inlaichinna leh Mizoram chhung bikah hian khatiangah khan inlaichinna tha kan neih theihna turin ruahmanna siamtu ber an ni a, I & PR thawhrah kan ti lo thei lo a ni. Officers leh thawktu an indaih vaklo chungin eng lai pawhin an tang a, media coverage te pawh theih ang angin an kalpui avang hian kan tualchhung chanchintharte pawh hi thil tha, hmasawna lam thilin a luah nasa em em a ni. Tunah hian thawktu hi sanction post 195 a ni a, thawk mek hi 110 awm in vacant post hi 85 a ni a. I & PR hi kan hriat angin kan indaihlo viau nachungin thil mak tak mai chu kan DIPRO, Serchhip hi vawiin thleng hian sanction post a lo la ni hauhlo mai a, tun hnaiah kan hotute hnenah kan han dil a, min lo pek ngei pawh kan ring a, hun kal tawhah a ti theitute chanvo a ni a, an tih mai kan rin laiin sanction post lova District Officer pawimawh tak, hun rei tak sanction post lova a awmte kha a pawh hlein ka hria. Tunah hian sorkar-ah chumi hnawhkhat tur chuan kan dil mek a.

Tin, kan hriat angin I & PR hnathawh tlangpui chu advertisement hi department hrang hrang ten an rawn thekhawm a, chungte chu chanchinbu hnenah rualkhai takin kan sem a, Mizoram Journalist Welfare Society kan ti a, Journalist nena inhne hnai, thawhhona tha hi sorkar hian kan mamawh tih kan hria a, chumi tur chuan Journalist Welfare Society siamin thawhhona tha tak kan nei a, an harsatna te, an dam mawh leh chhiat an tawhin a ralna tur te, a enkawlna tur te, hemi Journalist Welfare Society hnuaiah hian kan nei bawk a. Tin, chubakah chuan Press Accreditation-te kan ti a, chung mite tan chuan chanvo tha tak mai sorkarin a siam sak a. Tin, Press tour te, Press project, site visit te a buatsaih sak thin bawk a ni.

I&PR hnathawh pawimawh tak pakhat chu Film Industry hi a ni a. Thalai te leh mi bik te talent haichhuah kawngah nasa takin department kaltlang hian hna thawh a ni a. Film siamtu te leh film chan lama tui mi te tan workshop leh training tum eng emaw zat a buatsaih a. Chutiang chuan Mizo Film Industry tihhmasawna

tur atan leh khualzin mite hipa environmental-friendly ni bawk tur Film City ni turin Ailawng khu tunah khuan kan zuk buatsaih mek bawk a. Heng bakah hian India ram hmun hrang hrangah Film Festival-ah te chhim turin kan thalai film lama tui mi te kan tirchhuak bawk thin a ni.

Chutiang chuan painting chungchangah te pawh hian hma nasa takin kan la a. A bik takin lemziak thiam te leh lemziah lama tui mite tan department-in kawng hrang hrangin hma a la a. Sikul naupangte puala lemziah lama intihsiakna te a buatsaih bakah Mizorama Art Development Society te nen tangrualin Art Workshop te kan buatsaih thin bawk a ni. Chutiang chuan New Delhi thlengin khatiang khan ruahmanna siamin contemporary painting by Mizo artist pawh kumin January thla khan siamin New Delhi-ah kan zuk nei nghe nghe a ni. Tin, kan hriat angin he House zahawm taka ka sawi duh chu Mizoram Calendar leh Mizoram Diary te I&PR hian an buatsaih a. Kumin sorkar inthlak transitional period lai khan Choice of the People Pu Speaker, kan siam a. Member zahawm tak Pu K.T.Rokhaw thlalak kan lo tvisual palh a, siamthat leh a ni a. A hnenah he House zahawm tak kaltlang hian department enkawltu ka nihna angin thupha ka chawi duh a. Ka hmuhtirh pawhin a pawl ka ti khawp mai a, han cancel leh turin tihngaihna a awm tawh si lova, a siamthat dan kan han zawng ta ringawt mai a. Tunhnuah a thlen tawh lohna turin fimkhurna min petu ni ni se ka duh tak meuh meuh a ni.

Tin, kan sawi fo thin angin Advertisement Bill tihsan te, Journalist Pension Scheme te hi thil awm tak mai a niin sorkarin a ngaihtuah mek a. Hengte hi kan hotute nen kan en chho zel ang a. He thil hi thil pawimawh tak a ni a. Hun kalta March thla tawp khan Journalist Workshop te Pu Speaker, Chanchin bumite nen inlaichinna tha, thawhhona tha kan neih theihna turin kan buatsaih a. Zoram hmun hrang hrang atangin Journalist rual an rawn fuan khawm a. Chutah chuan kan House Leader zahawm tak hi Chief Guest a ni a. Thil mak tak chu MJA President in a thusawia a rawn tarlan chu kum 1987 khan Pu Laldenga, khatih laia Chief Minister khan Journalist Workshop hi min rawn hmanpui a, a dawt leh tu chu tun tum hi a ni, a ti a, a chhang a khat khawp mai a. Kha chen kha Chief Minister-in Journalist Workshop kha an lo hmanpui ngai lo va. Journalist-te ngaipawimawhtu Chief Minister kan nei hi MJA-te pawh an lawm hle a ni.

Tin, kan hriat angin, 'Lianchhiari Run' kan ti a, kum 2017 June thla khan a sakna tur sanction kan hmu a, chu chu bawhzui zelin chu kan sanction chu ₹ 100 lakh min rawn pe a, state matching share engemaw zah kan hmu a. Amaherawhchu harstana chi hrang hrang avang leh kan bawhzui that tawk loh avangin chu file chu NEC-ah a tang reng a. Chungte chu a bawhzui tur lamkal te intirin kan han bawhzui a. Tin, Delhi lamah Ministry of Culture lamah te an zuk zawt bawk a, an zuk vet a, chungte pawh chu hmanni khan Delhi kan kal remchan lai a ni a, kan zuk kal a, Ministry lamte dawrin kan harsatnate pawh min sutkian sak a, hun reiloteah heti laiah hian 'Lianchhiari Run' sa turin hma kan lak chhunzawm leh thei dawn niin a lang bawk a ni.

Tin, hei baka thil lawmawm dangdai leh deuh mai chu Lok Sabha Secretariat, India Parliament-ah khuan BPST training hi engtiklai pawhin kalpui reng a ni a, anni kaihruainain. Chutah chuan kan ram chanchinbumite leh kan hnathawktute intuaithar nan kal tir ve dan a awm lawm ni tiin ngaihtuahna kan hmang a, kan zuk dil a, an Secretary-te hnenah. Chutiang chuan kumin chhungin mi 25 tan training min rawn phalsak a. Pu Speaker, Commonwealth ram (Countries) ten subject hrang hranga training an neih thinna hmun a ni a, kan MLA zahawm tak takte pawh hmanni lawka an zuk training na hmun a ni a, chulaiah chuan kan Finance Minister, kan House Leader zahawm tak hian sum pawh min pek ngei kan ring a, chumi tur chuan ngaihtuahna kan hmang mek a. Kan chanchinbumite hi Mizoram mai ni lo, Mizoram pawnah mi hmasawnnate zuk hmuin, mi tih dan te rawn hmuin mipuite min zirtir se tih hi kan duhthusam a ni a, chumi tur chuan sorkarin ngaihtuahna a hmang zel dawn a ni tih ka han sawi lang leh a ni.

Pu Speaker, ka Demand No.38-na Rural Development Department-ah hian RD kan tih hi mipui hne kan ni a, thingtlang, Mizoram kilkhawr ber berte thlengin RD hnathawh hrelo chu mi tlemte kan ni awm e. Chuvang chuan department pawimawh berte zing ami niin, kan inngahna erawh chu CSS, central-a scheme hrang hrangte kan ti lo thei lo a. Chutah pawh chuan kan Fin. Minister zahawm tak hian sum eng emaw zat min ruahman sak a, a chungah pawh lawmthu ka han sawi a. Amaherawhchu than zel mamawh leh thang zel tur kan nih avangin member zahawm tak ten an rawn sawi lan tam em em RD Block thar hawn a tul thute kan ngaihtla a. Kan mamawh dana zirte leh, district thar a lo piang a, chung ang mil te chuan kan inherremte pawh a ngai dawn a. Tunah hian ruahmanna eng eng emaw

chu han awm mahse, ruahmanna thar neih belh zel a tul avangin kan hotute nen kan la sawiho zel turah ngai ila.

Kan hriat angin RD hi hmunhma nei tha leh Block-ah chuan thut hmun nei tha kan ni a, amaherawhchu kan staff quarter-te hi a awngrawp khawp mai a, fiamthu in ka ti a, kan staff quarter-te chu a chung a tui-ek rem rum a, RD colour emaw tih mai tur hian a awm a. Chutiange chu kan nih fo avangin khang sak thatte pawh kha kan mamawh khawp mai a, a sak thatna tur fund hi kan hotute ngaihtuah mai bakah dap dan kawng kan zawn tlan zel a tulin ka ring a. Tin, hei bakah hian Social Education kan ti a, hun kaltahte kan dah thin a. Hun eng emawti atang khan a awm ta lo va, nikum lamah NEDP-ah rawn dah lehin sum eng emaw zat vantlang hmunhma siam nan te, a bik takin BADP area ni lo tan khan a tul lehzual a. Community hall te, chi hrang hrang vantlang assets siamna tur khan thil tul tak a ni a, hengte hi member zahawm tak ten in rawn sawi ang khan kan Finance Minister kan sawipui ang a, chungte chu kan thlen zui dawn bawka ni.

Tin, member-ten an sawi uar em em chu Rural Housing Scheme kan ti a, rangva kan sem thin a. Tun dinhmunah hian Budget-ah hian tarlan a ni lova. Amaherawhchu min pe ngei ang tih kan beisei tlat a. A bik takin thingtlangah in chung tur rangva nei pha lo chhungkaw tam tak kan awm a. Chutih rual chuan in chung rangva nei, pawp tawh si far tluk tluk mai chungkuate hi kan lo awm teuh mai a. Chung mite tan chuan malsawmna kan nih theihna tur leh rikrum chhiat tawhte a lo thleng a, thlipui a lo tleh a, kangmei a lo chhuak a. Chung anga chhawmdawl na han kalpui zung zung nan chuan thil tangkai tak a nih avang hian Rural Housing Scheme atanga rangva leina tur kan Finance Minister pawh he House kaltlang hian ka dil nghal ni sela.

Pu Speaker, kan hriat angin RD hnuai ah hian hmalakna chi hrang hrang kan nei a, kan hriat lar em em pakhat chu MNREGA kan tih, mipui nawlpui chuan ni za inhlawhna tiin kan hre thin a ni. Kan hman tangkai dan chu sawi tam a ngai loin ka ring a. He scheme hian thingtlang mipuite tan inhlawhna a siam mai a ni lo va, mipuite tan tui dahkhawl na te, lei te, kawng te, step-te leh lungrem mawi tak takte hi he sheme hnuai ah hnathawh hi a ni. Chuvang chuan he scheme hi theihtawp chhuaha tihlawhtling turin department chuan hma a la a. Tunhnaiah hian 'New India 2022 milestone 75' tiin thil thar ruahmanna thar a lo kal a. Chutah chuan kum 2022-ah

hian India ram chuan independence kum 75-na lawm turin a inbuatsaih a ni. Hetah hian keinipawh tel ve tura ruahmanna siam turin ngaihtuahna a rawn hmang ta a. Mipuite hnenah khua motor-in a la tlawhpawh lo zawng zawngte tlawhpawh vek turin ruahmanna siam turin min rawn ti a. Chumi ti tur chuan theih ang anga PWD-te nen pawh kan tan tlan a tul dawn a ni.

Tin, hei bakah hian faina leh thianghlimna chungchangah hmalak a tul dawn a, RD block tinin solid waste, liquid waste leh toilet nei vek thei tura kan inbuatsaih chhoh zel a ngai dawn a. Chutah chuan individual toilet te, anganwadi toilet te leh school toilet-te pawh khawtinin kan nei kim vek tur a ni tihte a rawn ni a. New India 2022 hian target a set angin NREGA leh day NRLM tang kawp hmang hian mimal tin, chhungkaw tinte sum laklulh tipung thei turin programme hi a duan a ngai dawn a ni.

Tunah hian NREGA-ah hian waste employment atan ni 96 vel average-in inhlawhna kan siam a. Nikuma kan sum hmuh zawng zawng atang hian crore 56.96 hi material component atan leh administrative cost atan hman a ni a. Tunah hian inhlawhfa rate cheng 198 ni thin kha cheng 211-ah a lo kai chho ta a. Tin, job card hi nikum lamah khan nuai 189000 kan awm a, tunah chuan nuai 198000-in kan lo pung chho ta a. Hetah hian kan SMS hi a tangkai khawp mai a, thingtlang khaw hrang hrangah hmasawna kalpui a ni a. Chutah chuan sorkar pawh a inhawng hlein ka hria a, a bik takin Finance Department leh Finance Minister zahawm tak ten min lo hriatpui se ka duh chu material component-ah hian 90:10 anga a kal theih avangin sorkarin sum tam tak kan hum thei a. Khami kaltlang khan sum tam tak kan lalut thei bawka. Hemi kaltlang hian vantlang hmasawna leh vantlang assets kan create thei dawn a ni.

Tin, material component bikah hian State Level Empowered Committee kan thu a, hun kaltaah khan 90:10 angin kalpui thin a ni a. Amaherawhchu chu Committee chuan tunah chuan Project Director-te 40 ni se BDO-te 30, VEC-te 30, chutiang tur chuan ruahmanna a rawn siam zui ta bawka ni. Kan hriat angin PMAY hi (Pradhan Mantri Awas Yojana kan ti a) kum 2016-2017 atanga thawh tan kha a ni a, Housing for All kan tih kha a ni a. Hun hmasa lamah chuan IAY tia kan hriat a ni a, tunah chuan kum 2016-2017 chiah instalment pawisa la hmuh niin hemi atan

hian in 2401 sak a ni tawh a. In 2401 atang hian in 2233 sak zawh tawh a ni a, la sak zawh loh hi in 168 zet kan la nei a ni.

Tunah hian technical issue, AWAAZ soft kan ti a, bank account chungchangah a awm avangin in sak hi chawlh lailawk rih a ni a. Ministry lamin min siam that sak veleh he hna hi chhonzawm leh turin Pu Speaker, kan inruahman a ni. Kum 2016-2017 1st instalment kan hmuh rual hian 2nd instalment hi Ministry of Rural Development hian ni 27 March khan crore 29.23 min rawn sanction tawh a. Expenditure sanction hi state Finance Department lam atanga nghah mek a ni. Hemi sum hian in 2405 sak leh a ni ang a, beneficiary registration Geotaggingan ti a, khatiang sanction-te lo siam lawk vek a ni tawh a. State nodal account-a sum a luh veleh in sak hi tan nghal theih tur a ni. Chutiang chuan 2016-2017-ah kan la tang leih leih a, kum 2017-2018, financial year atan hian Ministry of Rural Development chuan target 1794 min rawn allocate a. Pawisa erawh chu Ministry lam hian min la rawn sanction lo a. Kum 2018-2019 atan hian target siam sak kan ni lo thung a ni. Financial Year 2019-2020 phase II atan hian Ministry of Rural Development chuan target 1500 min rawn allocate a. Hei erawh hi chu state lam atanga hmalak a la ni lo thung a. Chutiang chuan PMAYG beneficiaries te hi deprivation score hmangin waitlist-a tel tur te hi thlan an ni thin a. He wait list hi SECC data 2011 hmanga thlan a ni a, helaiah hian harsatna kan tawk a, a AWAAZ soft auto generated list-a siam a ni a, hetah hian he data hi a dikhlel avangin beneficiaries pek tlak tak tak hi an awm tlem khawp mai a, chu chuan harsatna nasa tak min thlen a. Ministry lamah kan harsatnate thlenin, AWAAZ plus hmangin beneficiaries dawng tlak ni si, SECC system a auto generated list -a tel ve si lo te identify a register tura tih kan ni zui ta a ni.

Chutiang chuan Pu Speaker, AWAAZ soft lamah kan hriat tur chu payment zawng zawng hi direct benefit transfer kan ti a, DBT hmanga tih vek a nih tawh avang hian system-ah hian beneficiaries duh duh hi a thlan mai theih lo va, a thunluh mai theih loh a. A hun laia kan lo tih loh avang khan harsatna kan tawk a, chuvangin, a hma SECC data ami kha tunah hian a lo kal bek bek a. Chuvang chuan mi thenkhatte pawh awm ang lo lutuk thlan chhuah a lo awm a, member zahawm takte pawhin kan dawn chamchi kha kha thil kha a ni a. A bik takin Tuichawng bialtu MLA zahawm tak khan ka biala dawngtu tam tak chu officer te an ni a ti pawh kha a awm tho in ka hria a. Hun kal tawh a ni a, kan sorkar ve hma kha a ni a,

kan sorkar lai chu ni se kan ti tha viau chuan ka ring deuh a, chutiang tur chuan kan inbuatsaih a.

Tin, member zahawm tak Lawngtlai West bialtuin PMAY list hi dan angin a siam theih lawm ni a tih kha, dan angin a siam theih tehreng mai, chumi tur chuan tan kan la a. Amaherawhchu, hun kal tawhah khan an lo entawn si a, hun kal tawha tihdan kha an lo hre ve si a, chulai takah chuan harsatna kan tawk a. Chuvang chuan, a tha thei ang berin tih kan lo tum ang a, helaiiah hian thlan dan tur, Gram Sabha te, tih dan phung fel tak a awm avang khan, a guideline anga kal hram hram kha theih chin chinah kan lo tum dawn nia.

Tin, Pu Speaker, kan hriat angin BADP hi sawitu tam ber khan a area hi a tih zauh theih lawm ni, km 10 huam chhung atang hi chuan harsatna nasa tak kan tawk a tih kha kan sawi nasa a, a dik khawp mai a. He thil hi tun atang chuan km 10, international border area discharge a lak a ni tawh dawn a. Hemi tur pawh hian BADP map pawh hi kan draw that a lo ngai tawh dawn a, a zau thei sawt tawh dawn a. Chuvang chuan harsatna pakhat (kan han tih zauh lai hianin) kan tawh chu saturated village hi kan nei thei tawh lawm ni han tih lai tak hi a harsa khawp mai a. Health-ah te, Education-ah te, khatianga hmasawwna, engkim thawh zawh vek tawh khua kha kan inti duh mang lo va, chumi tur pawh chuan a thlangtu strategic privatized village chu BJJF leh DC ten an thlang chhuak thin a ni. Chutiangte chu kan nih avangin khang ang chiah khan kha district level committee khan saturated village kha an thlan dawn avangin chumi tur chuan hma lak kha a sak khawp mai a. Khang khuate khan 'hma kan sawn viau tawh e, keini chu kalsan theih kan ni tawh e' han ti mai duh khua kha kan la nei mang si lo va, chulai chu kan harsatna tawh pakhat a ni a.

Thil lawmawm deuh, mahse lawmna famkim lo deuh kan tawk a, kar kalta mai khan BADP- ah hian tentative allocation, Delhi kan zuk kal khan crore 30 min lo pe a. A lawmawm chiah lo ka han tih nachhan chu nikumah crore 32 min pe a, chuta tang chuan 15% in rawn tipung rawh u, rawn siam rawh u an ti a. Chumi tur chuan kan han siam a, crore 48 kan zuk theh thla a, mahse min pe ta lova, crore 30 kha tentative allocation min pe a. Chutih rual chuan anmahni official lamte nen pawh kan sawiho a, 'additional hi rawn dil leh nghal mai rawh u' an han ti zawm zat a. Chumi tur chuan kan han inbuatsaih a. Tin, Ministry thar a rawn piang a,

guideline thar te pawh a rawn awm chho ta a, chu guideline ang chuan hna thawh tura kan ruahman, a tlem thei ang ber kha 10 lakh ni rawh se an rawn ti leh a, harsatna kan tawh a, han siamtha leh turin hun kan nei tawh lo va, annual action plan kan thehluh vek atang khan ruahmanna an lo siam bawh a.

Tin, Tuipang bialtu MLA zahawm tak khan a rawn sawi a, Selection Committee – ah hian kan tel ve thei lawm ni, annual action plan-ah hian a ti a, a tel turah ka ngai a. MLA zahawm takte hi an tel vek a, district level-ah DC hovin meeting an nei a, screening committee an nei a, an tel vekin ka hria a, a lo hrelo palh nge ni.

Pu LALDUHOMA : Pu Speaker, district level-a committee hrang hrang hi a koh hun hi tunahte pawh session kan nei a, kan neih reng laite pawhin an ko a ni. Kha kha memberten tel ve kan duh ngawih ngawihna, kan bial mipuite tan a pawimawh a, kan tel thei lo a ni hetiangah hian. Hei hi a department pum puiah hian district level koh ang chi reng reng hi chu MLA te remchan lai hun hi min ngaihtuah pui thei turin instruction te pe thei ula a lawmawm khawp ang. Ni e, a dik khawp mai, member zahawm tak Serchhip bialtu khan a rawn tarlang a. A bik takin BADP hi February thlaa thukhawm an ni tawh a, a area bika constituency neitu MLA te nena sawiho an ni a. Tahchuan DC te khan an ko thin a ni. Tin, hei bakah hian District Level Monitoring Committee te kan nei thin a, a bik takin a nodal department chu RD a nih loh theih loh chin a awm a. Amaherawhchu a Chairman kha MP te an nih avangin, MP te hun neih remchan hun kha an rawn melh ve thin avangin District Monitoring and Vigilance Committee erawh hi chu kan thuneihna piah lam deuh hret a ni a. Chutih rual chuan district level committee hrang hrang (kan House Leader zahawm tak pawhin min lo hriatpui se) hi chu MLA ten session kan neih loh lai deughtea ko thin tura instruction pek chu a tul khawpin a lang a ni.

Pu Speaker, SPRM kan ti a, hei hi Union Cabinet –in dt. 16.9.2015 khan he project hi kalpui a remti a. Hemi atan hian India ram chhungah cluster 300 a kalpui a ni. Keini pawh a tirah chuan kan tel mai lo a, amaherawhchu chumi tur chuan cluster 2 Thingsulthiah leh Aibawh te min rawn thlang a, kan ti tha khawp mai a, kan thawktu kan official te an fakawm khawpin ka hria. A titha berte zingah telin he kan RURBAN Mission hmalakna ah pawh hian lawmman an dawng nghe nghe a ni. Chuvang chuan kan lawmman dawn denchanin Phase III-ah khan East Lungdar

Block leh Khawzawl Block te cluster tharah minrawn thlang leh a. Chumi tur chuan Delhi lamah cluster thar kan neih belh lehna turin kan zuk dil leh a. Amaherawhchu, ministry tharte a pian avangin chuti mai chuan a tih theih dawn lo va, hemi hmang hian convergen scheme- a kalpui thin a nih avang hian he thil hian thingtlang mite tan eizawna mumal leh hmasawna, lei rem an rah ve theihna tura ruahmanna chi hrang hrang a kalpui a. Chuvang chuan he district hnuia Deputy Comissioner khu a khaipa niin SPRM hnuia hna te endik leh enfel chu a kutah a awm a, chutiang bawkin Block hnuia Block Development Officer te ruat niin Block Co-ordination Committee tih a ni zui baw a ni.

Chutiang chuan SPRM hnuia hna reng reng hi CSS sector leh state scheme hnuia hna awmsa te lakkhawm niin RURBAN cluster-te tihmasawna leh tihchangtlunna atan hma lak niin SPRM tum bul ber chu heng project awmsa te hian a hna senso tam zawk chu phuhrukin theih ang angin thingtlang mite chawikan a, indaihlohna tlem a zawng critical gap funding hi Mission katlang hian central Ministry chuan a rawn tum ve chauh a ni tih ka sawi duh a ni.

Tin, Pu Speaker, hmalakna chi hrang hrang a tam khawp mai a, Mizoram State Rural Livelihood Mission (MZSRLM) kan ti a, National Rural Livelihood Mission, Ministry of Rural Delvelopment, Govt. of India hnuia thingtlang retheihna umbona hnuia hnathawh nan hman a ni a. Chuvangin, Mizoramah hian kum 2013 April thla atanga bul tanin tunah hian district paruk 6 Kolasib, Serchhip, Mamit, Lawngtlai leh Saiha ah te Block Mission Management Unit 17 ah te hna thawh mek a ni a. Chutiang chuan heng block – Thingdawl, Bilkhawthlir, Serchhip, East Lungdar, Champhai, Khawzawl, Ngopa, Khawbung, Zawlnuam, West Phaileng, Reiek, Lawngtlai, Sangau, Chawngte, Bungtlang South, Siaha leh Tipa RD Block te an ni.

Hetah hian thingtlang miten eizawna mumal an neih theihna tur leh lei rem an rah theihna turin ran vulhtute an kawt chhuah maia enkawl na leh tanpuina an dawn theih nan Self Help Group mamberte zing atangin live stock community resource person thlanchhuah an ni a, chutiangte chuan hma an la a. Tin, Self Help Group mamberte zing atangin Agriculture Community Resource Person thlanchhuah ten hlo tur hlauhawm hmang lo tura inzirtirna te pawh an kalpui a, tunlaia kan manganna em em leh kan harsatna tawh mek laka kan fihlim theihna turin Self Help

Group ten hma an la a ni. Chutiang chuan Firm Livelihood hmalakna chi hrang hrang bakah hian Self Help Group 4593 kan nei a, bank loan dawng zat hi 1069 an awm baw a ni. Self Help Group-ah hian chhungkua 42831 kan tel a ni. Chutiang chuan he MZSRLM hmalakna hi kan chhawr tangkai em em a.

Tin, hei bakah hian hemi hnuai hian Startup Village Entrepreneurship Programme kan ti a, Mizoram State Rural Livelihood Mission chuan thingtlang miharsa zawk ten sumdawna bul an tan theihna tura zirtirna, thiamna pek leh intunnunna tura sum puk tur ruahman sak turin Startup Village Entrepreneurship Programme hi a buatsaih thin a. Chutiang chuan chhungkaw tam takin eizawna an lo neih theih phah ta a ni. Tin, hei bakah hian Ajivika Gramin Express Yajona an ti a, NRLM sub-scheme niin thingtlang kilkhawra awm ten damdawi in leh bazar an pan awlsam theihna atan leh an dinhmun chawikanna atan Community Investment Fund atangin Self Help Group loan a pung awm lovin motor leina atan pek an ni a, tun dinhmunah hian motor 48 zet tangkai takin an service tir mek a ni.

Tin, financial inclusion kan ti a, MZSRLM chuan financial inclusion hi retheihna umbona atana hmanraw pawimawh ber zinga pakhatat ngaiin hei vang hian sum leh pai enkawl dan inzirtirna financial literacy te Bank-a hamthatna financial service an dawn theihna tura hmalakpui te bakah hian Social Security Scheme hrang hrang an dawn theihna turin kawng hrang hrangin hma a la baw a ni. Tin, heng bakah hian Pu Speaker, Mizoram Rural Development Agency kan han tih DRDA hi member zahawm tak Dr.Vanlalhlana te pawh khan arawn sawi lang a, member zahawm tak Pu C.Lalsawivunga leh Pu Vanlalhlana ten DRDA employess dah ngheh chungchang hi Supreme Court thu ni lovin High Court thu zawk a ni a, chutah chuan mi 92 dah nghet turin ruling arawn nei a. Amaherawhchu, mi 3 zet maiin chatuan ram min pansan tawh a, tunah hian 89 an awm a. Hengte hi tunah hian Sorkar in theihtawp in hma a la a, Finance Secretary chairman na hnuai hian Committee dinin absorb dan tur hi a ngaihtuah mek a. Tunah hian kan hriat danin DP&AR lamah recommendation hi an thehlut a, department-in an hmalak dan hi kan hriat chiah loh avangin engtin nge absorb dan tur hi tih kan la hre thei rih lo a ni. Chutiang chu kan dinhmun a ni a. Kan hriat angin DRDA hi India ram chhungah a tawp tawh a, prarishad hmangin anrawn thlak chho tawh a, kan sum hmuh pawh a tlem tawh khawp mai. Amaherawhchu, thawktu kan la nei a, heng mi 92 te bakah hian 26 te an la awm baw si a, harsatna kan taw nasa. Chuvang chuan hlawh la

thei lovin Champhai District DRDA phei chu thla 4 zet an awm a, Serchhip-ah phei chuan thla 8 zet hlawh la thei lovin an awm a, hengte hi state sorkarte nen kan Finance Minister zahawm tak pawhin min lo hriatpui se. Hengte hi ngaihtuahna hman zui ngai a ni a

Tin, heng bakah hian SIRD hi kan hriat angin SIRD and Panchayati Raj kan ti a, kum 2000 August 21 khan din a ni a, tunah hian Extension Training Centre 3 leh Panchayat Resource Centre (DPRC) 4 din a ni tawh bawk a. Training chi hrang hrangte buatsaihin kumin chhungah pawh hian training tum 343 a buatsaih tawh bawk a ni. Chutiang chuan training hrang hrangah hian sorkar tha tichak turin RD official mai bakah line department official-te, VC memberte leh NGO hrang hrangte training pek thin an ni a, heng bakah hian ministry dang atanga fund an hmuh te atangin training kha pek thin an ni bawk a ni. Chutiang chuan he SIRD hi kan chhawr tangkai khawp mai a. Tunah hian sorkarin flagship programme te pawh kan nei a, chu kan programme te pawh chu training pe tur pawhin mithiam tak tak awm khawmna a ni, sorkar pawhin kan hman thiam a ngai hle a ni.

Pu Lalduhoma sawi state level monitoring cell and internal a kha duh angin ngaihsak an hlawh tawh lo an ti a. Official te inko khawmin meeting te kan nei a, review meeting - ah pawh fimkhur a ngaihzia leh heng mite hian hlauh nei hauh lova hma la tur leh kan tihdik lohnaah pawh min zilh a, hrem kan ngaihnaah pawh min hrem ngam tura hma la turin kan fuih nasa hle a ni. Chuvangin he thil hi min chhanhimtu leh kawng dik min kawhmmutu a ni tih kan hre reng a ni.

Tunah hian RD hmalakna hi a zau va, block 26 leh Project Director office kan tih hi 8 kan nei a ni. Chung chuan Mizoram chhunga hmasawwna leh thingtlang miten lei rem an lo rah theihna turin nasa takin hma an la a ni. A thawktute an inpe a, an tui tlang em em bawk a. Heng ang zawng zawng ah hian sorkar-in flagship programme SEDP tihlawhltling tur pawh hian department chhunga hmalakna te pawh a pawimawh hle a ni. Department official te nen nasa takin hma kan la chho zel a ni. Member zahawm tak tak ten ka department chi hrang hrang anrawn sawi a thurawn tha tak tak te kan hria a, min fuih phur a, min ti tang a, zilh kan ngaih hunah pawh min zilh zel turin ka han ngenin ka han sawm duh a ni.

Model Village Shaggy kha central lam atangin model village kha MP zawng zawng te kalpui turin a rawn ti a. MLA te pawh rawn tih thin a ni a, central lam atanga rawn kalpui tur a nih thin avangin duh angin kan kalpui tha thei lo a ni. An rawn thlang leh a nih chuan thurawn min pek ang khan VC te nen ruahmanna siamin kan kalpui dawn a ni tih ka han sawi duh a ni.

Pu Speaker, ti khan a tlangpui chu duh tawk dawn ila, ka department enkawl te (Pu Lalduhoma: Model Village thlang tura tihna kha kan dawng der tawh a nia, chuvang chuan kalpui leh awm tak a nia, Central lam vak ni lo khan helaiiah MLA te model village min thlan tir a nih chuan awmze nei deuha tih dan kha rawn ngaihtuah chhuak thei ula tih ka rawn sawi nawn leh duh hram a. Revenue - ah khan computerisation kha inkalpui ta lo em ni kan ti hram teh ang) kan lo enzui ang a, a hmasa khan a thlan dan a dik tawk loh avangin an thik deuh tlat mai a. Chu chuan harsatna min siam a, dan angin kan enzui ang e.

Tin, land record computerize kha kan kalpui mek a, theihtawp chhuahin kan kalpui a ni. Tun hnaiah pawh hian NIC Pune nen tangkawpin theih ang angin hma kan la mek a ni. Chumi tur pawh chuan launching programme nei turin hun reiloteah hian kan inbuatsaih a. Kan ram hi a theih ang anga computarise a land record nei turin theihtawp chhuahin sorkar a inbuatsaih chho mek a ni. Tin, SAGY model village-ah khan MP te tan khan a rawn tlang a, chung mite chu convergence scheme ang khan hma a rawn la a. Keini pawhin khatiang khian ruahmanna siam a ngaih ka ring a ni. NREGA atang te pawhin kan village thlan chhuah atang khan enzui a ngai dawn a ni tih ka han sawi lang a ni e. Ka department enkawl ten kum 2019 – 2020 chhunga an sum hman tur

1)	Land Revenue & Settlement	-	₹ 40,84,50,000.00
2)	Information & Public Relations	-	₹ 15,26,37,000.00
3)	Rural Development	-	₹ 3,97,62,99,000.00
	Total	-	₹ 4,53,73,86,000.00

hi House in min pass pui turin ka rawn ngen e.

S P E A K E R : Minister zahawm takin a Demand hrang hrang kum 2019-2020 chhunga hman atan heng Demand No. 6,26,38 te hman turin a belhkhawmin 4,53,73,86,000.00 te House-ah pass a rawn dil a. Remti ti apiangin ‘Remti’ ti ula, (MEMBERS: Remti)

Remtilo in awm chuan ‘Remtilo’ ti rawh ule. Remtilo kan awm lova. Tunah chuan Minister zahawm tak chanvo te Demand No. 6, 26, 38, a vaiin 4,53,73,86,000.00 te chu lungrual takin House-in a pass a ni. (Pu Lalruatkima: Pu Speaker, ka lawm e.) Vawiinah Mizo takin kan inthuum a, kan thalaiteah Mizo nationalism a rawn intuh thar leh a, kan NGO ten Mizo inthuum te an ngaisang chho em em a ni. Kan Pu Vuttaia puan ngei mai ka bat thei a, ka lawm hle a ni.

Vawiina kan business chu kan duhtawk ang a, naktuk zing 10:30-ah kan thukhawm leh dawn nia.

Sitting is adjourned. **8:20 PM**